



সিকান্ডেইনি

ব্রজেন্দ্রকুমার সিংহ





মিকাডোনি

ব্রজেন্দ্রকুমার সিংহ

প্রতিশ্রুতি প্রকাশনী

SIKADEINI
SHORT STORIES IN BISHNUPRIYA MANIPURI
BY BROJENDRA KUMAR SINHA
COPY RIGHT : SUKHADA SINHA

উপনী হানিকুড়িহান

পঞ্চম প্রকাশ : বিষ্ণু ১৩০৪ সন, ১৪ই এপ্রিল ১৯৯৮
প্রকাশিকা : সুখদা সিংহ
প্রতিষ্ঠা প্রতি প্রকাশনী, আশ্রম রোড, হাইলাকান্দি ৭৮৮১৫১
প্রচ্ছদ : সুভদ্রা সিংহ
প্রচ্ছদ মুদ্রণ : জ্ঞান বিচিত্রা প্রেস আগরতলা ৭৯৯০০১
নাঙহান ইকরানি : শ্রীকান্ত সিংহ
মুদ্রণ : লিখা ভট্টাচার্য
সাহিত্য প্রিন্টার্স, হাইলাকান্দি ৭৮৮১৫১
দাম : রূপা আককুড়িহান

শ্রীইন্দ্ৰকুমার সিংহৰে

যেগৰ আঁতে
বিষ্ণুপ্ৰিয় মণিপুৰী কথাসাহিত্য
শিল্পৰূপ পাছে

লেখকৰ আৰ আৰ লেৰিক

চক্ৰবৰ্ত্তি

লেহাও ফুলগৰে

এলাৰ খুংতল

ধ্ৰুবপদ

মেৰাক সেৱাক

কণ্ঠগিৰো

পুংলল

মেইকেই

বিৱহী যক্ষৰ এলাহান

জিনজিনি

পোৱেই (সম্পা)

মেৰেক মেঠেল ১ম ভাগ

বসবিলাস

চিকংলেই

ed. Bishnupriya Manipuri Language & Literature

ধনঞ্জয় ৰাজকুমাৰৰ লেৰিক

ৰুৱাইয়ং-ই-ওমৰ থৈয়াম

ডিগল আতহানল মোৰে

মিকুপৰ চেৰি ফুল

হপনৰ বাবুয়ানি

ভূমিকা

বেলিহান হমানির পরে য়ারি ঔহান পাকরিয়া বিমল সিংহ মোরে উনা
অনিং আহেছিল। বিমল সিংহ নেয়ইল, আরতে কুংগই মাতে দিতাই এতার
হবা সাকতি।

প্রসন্নকুমার সিংহ আরাকৌ আগেদ মোরে এরা দিয়া গেলগা। বেলিহান
হমানির পরে পাকরিয়া গিরকে বেগাছিল আহির পানি সিটা এবাকাউ মোর
ঠইগং উময়া আছে।

দিলীপকুমার সিংহ বার উত্তমকুমার সিংহ নেয়ছি। পাঠকহীন আকখুলাংই
কিসাদে এপেই থানা।

মাঙছে য়ারি ঔতার মা চিনো-এগ-কুঙ্গং নিকুলেছিল 'সরারেগতে রাজারো'
বিসারেয়া নাপেইলু। য়ারি এহানল পিছেদে নাটক আহান ইকরেহিলু ঔহানল
বিমল সিংহই সিনেমা আহান করেছে।

সালয়া যানা-রে ত্রিপুরা চে-ৎ সমরজিৎ সিংহই মাতেছিল য়ারিহান করেউ
পাকরানি য়াকরের। ঔহানে এপেই য়োকরে দিলু। য়ারিহান বা নাটিকাহান
ষেগই যেসাদে মনেইতাই ঔসাদে দেখতাই।

লেইমাতল য়ারি ঔহানাং আছে এলার অংশ ঔহান আমার কনাকে বহুল
প্রচলিত অছিল। ঔবাকা বিষ্ণুপ্রিয়া মণিপুরী ভাষাল ইসালপার এলা রচনার
উৎসাহ আহান দেখলাং। এতা এলা ইসালপাই গরে অরেইতেউ নাঙছু।

মুদ্রণর সময় মোর নানা অত্মীয় আবদার য়াকরে দেছে রুচিমতী লেখিকা
শ্রীমতী শিখা ভট্টাচার্য লেখকর কৃতজ্ঞতা ভাজন অয়া থাইলি।

ছাপার লাল সম্পর্কে মাতিয়া লাভ নেই। পাঠকরে ডাক করেদেই
বুলানির মেইথঙহানো নেয়ছে। শুদ্ধিপত্র দেনাউ নাইল। পিতা স্বর্গ য়ারি
ঔহানর পয়লাকার পারেঙে 'কার্তিকর ঠুম' অইতই। কার্তিচানর সমসকির্তি
য়্যারিহানাং সুতহিবুক শব্দ ঔগর সারকক বিষ্ণুভ্যোগ অইতই।

সমাজদরদী ডঃ দেবেন্দ্রকুমার সিংহ (গ্রীনভিউ) শ্রীমান জ্যোতির্ময় সিংহ,
কল্যাণীয়া মণিদীপা সিংহ, শিল্পী সুভদ্রা সিংহ, শিল্পী শ্রীকান্ত সিংহ গাহিরকা
বানা নুংশি বার আশীর্বাদ থাইল।

ব্রজেন্দ্রকুমার সিংহ

- বেলিহান হমানির পরে ৯
মাননীয় সম্পাদক গিরক ১৫
লয়নির ফাল্গুনে ২০
লেইমাতুল ২৯
সিকাডেইনি ৩৭
উত্তরা ৪৩
কীর্তিচানর সমসকিৰ্তি ৫৩
- * পিতা স্বৰ্গ ৬১
 - সালিয়া যানা ৭০
 - * সাঙা ৭৬
 - * ডাক্তারবাবুর শৌগ ৮১
- * আগেদে প্রকাশ নাহেতা

বেলিহান হমানির পরে

মালক কাদে কাদে এবাকা খানি ঠেঁমইলি। মালক আহিগি জিপাছেহান দেহিয়া ননীয়ে হাতে হাতে গিয়া টাকহানাৎ লেরিকহান বিহারেয়া আনলগা। মালকে দেখলেতে গুজুরনইছ। ননীয়ে বনকর লেরিক কিতা সকইলেগা মালকে তারে গুজুরিরি। আজিয়ে দেখলেতে গুজুরতই। মাততই—“তোর ইচে নেয়ছে বুলিয়া বার লেরিক ওতা আতারগাতা!” জাতে লেরিকহান ফারে দেনারকা নাগই। বনকে লেরিকহানাৎ তার নাঙহান ইকরে দেছে ওহান চানারকা লেরিকহান নিকাললতা। ওহানলহে লেরিকহানতে নাদিয়া থেছে নাই।

বনকরে শ্মশানে নিতেগা তা হাবিতাউ দিয়া দিল। তেই স্বর্গে গিয়া খেলবগাতা। হোপেই তেই আকগরো নাচিনে থাংতে কুংগই তেইরে খেলানির বার দিতাইতা! ওহানল তেইর গেটি ওগি, আলু কতগ, চৌল কতগ বার বেরেনডি আগো দিয়া দিল। তেই বাত রাদিয়া খেলানি নিয়াম মনেইরি। ওতা থাইলেতে অউনা গিয়াও বাত রাদিয়া খানা পারতইগা। আকগইও নিংসিং নাউ অদেছি। হাবি কাদানির বারাদে অয়া তেইরেতে কিংতাউ নাউ দিলা। তাহে নিংসিং অয়া দিলতানাই! ওহানলহে রাধাই তারে হাবিরাংত জিঙে বানা পেইল নাই। নাহ্! তা আর নাং দরিয়া না ডাকতৈ। এখুরুমতে ইচে বুলতই। শ্বৈগেয়ো তেইরে নাঙ দরিয়াও থাকা! ননীয়ে বনকরে নাং দরল বুলিয়া মালকে তারে গুজুরল। তা মাতেছিল—“অইছ! তুমিতে রাধা বুলিয়া ডাহানি বার মিতে ইচে বুলানি! তুমিয়ে ইচে বুলিয়া মাতিয় বেনাই।” বনকে পিঠির দারিগদে ডাহিয়া তারে মাতেছিলি—‘কিয়া ওসাদে পাওয়া টটরারতা! মানুয়ে এবাকাউ তোরে কনাক শোগ বুলতাই। এরে চা! মিতে হাবির তাউ খুলিগ নাই, বার তোর তাতে জেঠিগ। ওহানল তিতে মোরে ইচে বুলিছ।’ ননীয়ে মাতেছিল—“কিয়া? আগেহে কনাক অছিলু আর খুলাগ অছিলুতা নাই! এবাকাতে ডাঙর অয়া আহোরি থাংতে এবাকাউ মাতানি? বনকে

মাতেছিলি—হাই চানে ! ইমাইতে ওহান নাউ খালকরিরি নাই । কিংতাউ হার নাপেইরিগ না ! আবেরা থুংপি ! ইমাই গালেইরি বুলিয়া না সৌঅইছ । তি মোরে চরেদেতে রাধা বুলিয়া ডাহিছ, বার ইমার মুঙেতে ইচে বুলিছ । নাইলেতে ইমাই গালেইতই ।’

এথুরুমতে ননীয়ে আর রাধা নাবুলতই । চরেদেউ ফঙেদেউ ইচে বুলিয়া ডাকতই । আজিৎততে স্বর্গে গিয়া দৌগ অইলিগা মানুগরে তা আর নাউ নাদরতই । ননীয়ে বনকর লেরিকহান সালকরল । লেরিক এহানতে বনকরে শাশানে নিতেগা নাউ নিংসিং করে দেছে । নিংসিং করেদিলেতে মালকে মাংলইছ—‘দিয়া দেই লেরিকহান । নাইলে বার পইসা মাংকরিয়া আরাক নুয়া লেরিক আহান লইতইগা ।’ ওহানলতে নাউ নিংসিং করে দিল । ইচেই কৎতদিন নুয়া লেরিক আহান লদেই বুলিয়া লাগেছিলি । মালকে মাংল—‘হাপ্তাহানাং লেরিকহান খাউরিতা কিয়াকা?’ ইমাতে আবেরিগ না । লেরিকৌ মানুষে খেইতারাতা ! ছাগলেহে লেরিক খেইতারানাই । ইমাতে কিতাউ হারনাপেইরি ।

ইচেই লেরিকহানর দৌ আগর তলে ইকরেদেছে—‘এগতে আমার ননীবাবু ।’ ননীয়ে ছবি ওহান চেয়া থাইল । ইচেই মাতেছিলি—আমার ননীবাবুরে এসাদে সাজ করে দিতাঙাই । তা ডাঙর অইলে, ইমা, এসাদে আঙেই আহান হিয়াদিছ ।’ ছবি ওহান চেয়া চেয়া, বনকে তারে ওসাদে করে চুল কিতা আচুরা দিল । তেই ননীরে চুল কিতা আচুরা দিয়া হদেইতই ওপেই তা অর কিতাং লামলে যে নুঙেই নায়া গুজুরল । —‘ননীবাবু কিয়া অর ছানিয়া থারতা ! সেনাক্ক খুড়ার ডেকি তিয়ো বাবুগ অইতেইগ না ! সেনাক্ক খুড়ারে না দেহরতা ! হাফলঙে গিয়া বাবুগ অয়া আহেছে থাংতে অর নাছানের, খেতিং না লামের তা । ফেইচম পিদিয়া, মুজার আঙেই উরিয়া, চুল আচুরেয়া, সিগ্রেট পিয়া পিয়া থারতা । ইমাই হজ্জকারি দিলে পিনা নাকরের । তিওরে না, ননীবাবু, ডাঙর অইতেই ওপেই বাবার ডেকি বার হজ্জক পিবে সিঙইছ ! সিগ্রেট লয়া পিছ । নাইলে মানুষে তোরে বাবুগ বুলানি নাকরতাই ।’—ইচেই ননী ডাঙর অইলে-পিনারকা সিগ্রেট আগ সেনাক্ক খুড়ার জেপগৎত চরেদে আনেদেছে । ওগ তারকা লুকা লুকা খদিরি । নিক্কা তানু খেলতারি সময় ওহানাং উগ মুঙে নিকালেয়া থইলি । তানুর খেলাহান অইলতাই—ননীবাবু হাফলঙেৎত

আছেছে ঔবাকা বনকে চাহা, বাত রাদিয়া দিবি । লেরিকর ছবিহানর
সাদে সাজ করেদেছে ননীবাবুরে খুটি চকিহান বুলিয়া, বোয়ে বেলাছে
হেইনো ঔজারর গজে বহাদিয়া মাতল — ‘ননীবাবু ! হাফলঙেত আইলেতা !
আমার কাতে কিতা আনেদেহু ? খানি বাছা । হিনপেইলো জিরা ।
মি চাহা ফুটি রাদিয়া দিং । হজকো নাপিয়র থাংতে, তোর সিগ্রেট ঔতা
আগ পিবে নাই । আমার ওতে খেতি কারয়ার মানুর গর । তি
অইলেগাতাই বাবুগ ।

সেনারুক খুড়া আইলে ইমাই যেহাদে কথা মাতিরি ঔসাদে ইচেয়ো
তারে মাতল — “অহো ! গরেতে চাহাপাতিয়ো নেয়ছে । বাছা মি
খানি বিছারেয়া আনিংগা ।” ফাগি ফাগি চাহা রাদিয়া হদেয়া মাতল—
‘দিবে নাই ননীবাবু, তোর হাকলঙর য়ারি খানি দে, ছনিক । আমিতে
গরে পড়িয়া আছি মানু ।’ সেনারুক খুড়া আইলে ইমাই যেসাদে করল
উসাদে ননীবাবুরে ইচেয়ো করল । সেনারুক খুড়া আইলে ইমাই যেতা
যেতা কথা মাতল উতা ইচেয়ো মাতল । তারে গাঙেদে কোনোগই
ননীবাবু না বুললে ইচেই নুঙেই নায়া গুজুরল । ইচেরে নিংসিং অয়া
ননীবাবুরতা কাদানি আহিল । আজিতে তারে থককরে বেলা দিয়া স্বর্গে
গেলিগাতা । ‘চেইতো তানা, মিঙে চেইতো । কইদিন তি আক্খুলিগই স্বর্গে
থাউরিগাতা । এখুরুম আয়া চরেদে পঙিতল জারর তলে থায়া ডাকলে,
নাউ খুমকরিয়া থাইতো ।’—ননীবাবুরে হকগই ডিফেইল । ইচেই
তাপ উঠিয়া কাচা হেইনো থানা মনেয়া ননীরে কতগ আনানিরকা মাতেছিলি ।
তা গিয়া মালকরে বাগা দিলগা আর, ইমাই ইচেরে গালাছিলি বুলিয়া
ইচেই না টটরল । হাবিয়ে মাতলা তাপহান নিয়াম জবর আছে । —‘মিয়ে
হারপাউরিতা না তেই সৌঅছে ঔহান ! সৌঅয়া বিয়ানত মরিয়া গেলিগা !
মি কিতা করেছিলু থাং !’ ননীয়ে কাদানি অকরল । আহির পানির
ফুটা লেরিকহানর গজে পড়িয়া লেরিকহান তিঙিল । লগে লগে ননীয়ে
আহির পানি পুছল । বার বনকর লেরিকহান তিঙাদেছে বুলিয়া ইমাই
গুজুরতই । লেরিকহান পঙিতল জারর তলে মাদানকার বেলিহান আয়া
পড়েছে ঔপেই থদিল । দারিগৎ লগ থছি উতার তলেংত সিগ্রেটগ বিছারেয়া
আনলগা । আনিয়া ঔগ দরিয়া থাইল । আজিতে ইচে নেয়ছে থাংতে
কুংগই তারে চাহা রাদিয়া দিতাইতা ? —‘ইচে মি হাফলঙেত আইলু !

কইতে চাহা দিবেনাই ।’ —না থাক্ ! আজি তেই স্বৰ্গে গিয়া ঠুঁঅছে দিনহান । ইচেরকা ননীয়ে আজি নিজে চাহা রাতে দিতই । আইলে মাংতই—ইচে ! দিবে নাই, তোর স্বৰ্গর য়ারি ।’ —ননীবাবু উঠিয়া বনকে পাইজন্ল হংকরেছে হরনি ঔহান দরিয়া পণ্ডিতল জ়ারর তলহান সেকরাং লাগিল । বনকে হংকরেছে চাকাম ঔহান পুছিয়া, বাগেছে উতা কিতা, হংকরাং বহিল । বনক নুয়ারা অছে দিনেংত তানু আর পণ্ডিতল জ়ারর তলে খেলাং নাহিতারা । চাকাম কিতা হাবি বাগেছে । পাতা কিতা পড়িয়া বুজিয়া আছে । ঔতা হাবি ননীয়ে সেকরাং লাগিল । ইচেই আইলে মাতবতা—‘আমার ননীবাবুও বাক্কা কাম জানানি অকরল । অইল্গা থাক ননীবাবু ! তি জ়েলেইর কাম নাকরি । ডাঙর অইলে হাফলঙে গিয়া বাবুগ অইতেইগই এতা কাম করলে মানুয়ে তোরে কিতা বুলতাইতা ! সেনাক্ক খুড়া গরে আইলে জ়েলেইর কাম নাকরের ঔতাও খানি চেইছ ! এবাকাতে কনাক শৌগ নাইলে নাই ।’ —ননীয়ে হুৰুকাং পণ্ডিতলশৌ ধরেছে ঔতা কতগ ছিড়ানির চেফা করল । লাগাল নাপেয়া বারি আগ ধরিয়া লাক্করানির তাল করল । নুয়ারলে বার ইচেই মাংতই—“কইতে ননীবাবু ! এবাকাও পণ্ডিতলজ়ার লাগাল নাপার থাংতে, কোনদিনো হাফলঙে যিতেইগা কিগই জানে !” —“ইচে তি ত্বরা করে স্বৰ্গেংত আই । এখুরুমতে চরেদে অইলৌ গিয়া, তোরকা হাফলঙেংত হজ্জক আনে দিতৌগা ।” —বার ননীরতা আহির পানি পড়ানি অকরল ! ইচেই নুয়ারা অয়া নিক্কা তারে মাংল—“ননীবাবু তি হুয়াং হুয়াংতা খেয়া চালাক করে ডাঙর অয়া মোরে হাফলঙেংত হজ্জক খানি আনেদেগা । তি হজ্জক নানলে মি বালা নাউ অইতো ;” —আকদিন মাতেছিলি—“ননীবাবু ! বার মি নুয়ারা অছু বুলিয়া তি আকখুলাগই পণ্ডিতল জ়ারর তলে যিবেগা ! তিতে, অইলে কনাক আনে ! কোনদিনো ডাঙর অয়া তোরকা থদেছু সিগ্রেট ঔগ পিতেইতা ?”—ননীয়ে সিগ্রেট ঔগ চেয়া থাইল । আহির পানির ফুটা আতহানর গজে পড়ের । —“ইচে আইয়ে ! মি চালাক করে ডাঙর অইতো, আইয়ে ।” —ননীয়ে পণ্ডিতল জ়ার চেয়া চেয়া কাদানি অকরল । হক্গ আহেরতাও আচ্চুলে না কাদের । পণ্ডিতল জ়ারর দৌগই বারেয়া ইচে নুয়ারা অছিলি বুলিয়া ইমায় মাতল । হারপেইলে বার তারেও এপেই আহানি নাদতই । তা নাহিলেতে ইচেই আয়া গুজুরতই—‘মি আকদিন গরে নেয়ছুথাং তি

পানিরে না ডাহেছ। কোন্দিনো বুঝ পড়িতেইগো কিগই জানে! কট দিনো তোরে পানির য়ারিহান দিতু। কিয়াকা পাহুরতা! বুড়ী ঔগট কটদিনো তোরে পানির য়ারিহান ছনেইত! পানিরে বার বেয়কে গাটহান লালইতে, বেয়কে তেইরে উলটিয়া চাহিল বুনিয়া, পানি পাহিয়াগ অলছিলি। —“সিঙইছ ননীবাবু! মি খঙ কিতা লালইতে তি বার চেইবে! নাইলে মিও পাহিয়াগ অয়া মাঙইলগা বার তি কাদতেই।”

—বেলিহান বাহার পাতার হাদিয়েদে আয়া পড়িতল জ়ারর গজে পড়েছে। এবাকা পানি আহানির সময়হান অইল। আন্দিয়া রঙর পাহিয়াগ অয়া পানি এবাকা পড়িতল জ়ারর গজর ডেং ঔগং বয়া মালকরে নিংসিং অয়া, রহে রহে, মালকরে ডাহিয়া কাদতই। —হারপেইছ ননীবাবু! পানি পড়িতল জ়ারে আয়া বহিলে, তি বার ফরহুয়া দিবে। কনাক শৌগ থাংতে কিংতাও হার নাপার নাই! —নিক্কা পানি অয়া পড়িতল জ়ারে বহিলে ইচেই এলাহান দিল—‘পানিও পানি, আইনে গরে য়িকগা!’ আজিও পানি আহানির সময়হান অইল। বনক নেই থাংতে তা আজি এলাহান দিয়া ডাকতই—‘পানিও পানি আইনে গরে য়িকগা’ —নাইলে ইচেই ছনলে মাততই—কোন্দিনো ডাঙর অইতেইগ ননীবাবু! অরতে পানিরে আজি না ডাকলে নাই। তেই কাদে কাদে আলখক অয়া গেলিগা। বুড়ী ঔগট দিল পানির এলাহান পাহুরতানেই না কিতানেই কিগই জানে!” —আজিতে পানি আইলে ননীয়ে যেসসাদো ডাকতই।

বেলিহান হাতে হাতে লামে য়ারগা। মালতী জ়ারর কুড়ি ঔতার গজে বেলিহান আয়া পড়িল। পানি আহানির সময়হান অইল। ননী কুপ্‌করে পড়িতল জ়ারেদে চেয়া থাইল। পড়িতল জ়ারর ডেংগং আন্দিয়া রঙর বেলিহান আয়া পড়েছে। ঔপেই যেসাদো পানি আয়া বহিয়া মালকরে নিংসিং অয়া কাদতই। ননীয়ে পানির এলাহান নিংসিং অইল—‘পানিও পানি, আইনে গরে য়িকগা!’ পড়িতল পাতার গজে পড়েছে বেলিহানাদে চেয়া থাইতে থাইতে, বেলিহান আন্দিয়া রঙর পাহিয়াগ অইল। ননীয়ে ডাক্‌ল—‘পানিও পানি, আইনে গরে য়িকগা!’ চেইতে চেইতে বেলিহান পাহিয়াগ অছিল ঔহান ইচের ডেকি অইল। ননীয়ে ডাক্‌ল—‘ইচে! ইচেরো! আইরে ঘরে য়িকগা আই!’ মি ডর পাউরি!’ —ননীয়ে কাদানি অকরল। বেলিহানে ইচে অলয়া মাতল—‘ননীবাবু! কিয়া কনাক শৌগর ডেকি কাদরতা!

এরে চা! তিতে মোরে রাধা বুলিয়া ডাহানি মনাছিলে নাই। ওহামল
 মি খালকরলুতানা—মি স্বর্গং গিয়া বার আলখক অয়ারে না, তোর খুলি বনকগ
 অয়া ইমারাং জরম অইতো, ওপেই তি মোরে রাধা বুলিয়া ডাহিছ।
 নাইলেতে ইমাই গুজুরতই। মি জরম নাছু পেয়া তি অর কিতা না
 সানিছ। বাবুগর ডেকি থাইছ। হুয়াং হুয়াংতা খেইছ। ত্বরা করে
 ডাঙর অয়া হাফলঙে যিবেগাতা।” —“ইচে! ইচেরো! আয়! তি আয়িরে!
 গরে যিকগা আই।” চেইতে চেইতে বেলিহানো হমেইলগা। পণ্ডিতল
 জারে ছেয়াগ পড়িল। (১২৬৪)

মাননীয় সম্পাদক গিরক ! আপনার পত্রিকাহানাৎ “সূর্যমুখী” বুলিয়া গোবিন্দ সিংহর স্মারি আহান প্রকাশিত আছে। ঔহান অনেক সমালোচকে কচ-দেবযানীর স্মারিহান বুলিয়া মন্তব্য করেছি। কিন্তু মি হারপাছু ঔহান কচ দেবযানীর স্মারিহান নাগই, ঔহান মোর পরিচিত মানু আগর ঘটনাহান। মানু ঔগর নাঙ গোবিন্দ সিংহ। হাই ! স্বয়ং ‘সূর্যমুখী’ স্মারিহানর লেখক গোবিন্দ। নিঙল ঔগর নাঙ, এবাকারকা বুলিয়া থইক কৃষ্ণা। কৃষ্ণার জীবনর স্মারিহান প্রকাশ করিয়া গোবিন্দই তেইরে বিশ্বাসঘাতকতা করেছে। আজি আপনারাঃ এরে চিঠি এহান ইকরানির দরকার নাইলইছ। কিন্তু লেখকে নায়ক ঔগরে মহান চরিত্ররগ হংকরিয়া, নায়িকা ঔগরে নীচ চরিত্ররগ হংকরেছে। ঔহান পাকরিয়া নিঙল জাত এহানরে মুনিয়ৈ নিন্দা করতাই বুলিয়া মি নিঙল আগ হিসাবে এহানর প্রতিবাদ করাং পরলু। হাই স্মারিহান হাবিয়ে হারপানি থকর। অবশ্য স্মারি-লেখক গোবিন্দর সাদে মি সাহিত্যে ভাষা দিয়া চিঠিহানরে কঙালা করে নুয়ারতৌ। ভাষাং ভুল থাইলে দয়া করিয়া শুদ্ধ করে দিবাং। মি লেরিক নিয়াম না তাম করেছ হানতে মোর চিঠি এহানাং ভুল থা থাইব।

নায়িকা চিত্রার রূপর বর্ণনা যেতা দেছে ঔতা হাবিতা হাইতা। আহিগর তাল তিল আগ আছে বুলিয়া ইকরেছে—ঔহান পেয়াও মিছাহান নাগই। ঔহানল পাউরি আজি কৃষ্ণার আহির পানি লয় নারতা। যেতাও অক ! নায়িকার রূপর প্রশ্ন আজিকার চিঠি এহানাং দরকারী নাগই। নায়ক ঔগ কলোজে তামকরতে তানুর (অর্থাৎ চিত্রাগাছির) গরে আছিল, ঔহানৌ হাইহান। গরগর বর্ণনাহান দেছে ঔহানাং কোন ভুল নেয়ছে। অবশ্য উঠানর আগার ফুল ঔজার লেহাওজার নাগই সেনারেইজার। চিত্রাই তার লেরিকর টেবিলহানাং লেহাও কতগ থদেছিলি বুলেছে ঔহান নাগইহান। কারণ লেহাও তেই কুরাং পেইতইতা ! নায়ক সুধীর হবা ছাত্রগ নাগই।

স্মারিহানাং যেতাও থাক—তিন খুরুমে সাপ্লিমেন্টারিং ম্যাট্রিক পাশ করিয়া কলেজে হমাছেগ। কলেজেও মনার দিন ঔহান যারগা। দিনহান লেরিক চেইলগ নাগই। তারতা ইমা সরস্বতীর লগে সম্পর্ক হাবিংত কম। একমাত্র শ্রীপঞ্চমী ছাড়া আরতা নেই বুললেও স্নাকরের। অবশ্য খেলাং জবর নাউ করল।

কৃষ্ণাই তার প্রতি যে ব্যবহার করল ঔতা গরগং আছে অতিথিগ হিসাবে। অন্য কোন ভাবল নাগই। অথচ স্মারিহানাং মাতেছে “তেইর আহিগি প্রেমর রঙহানে কঙালা আছে। তেইর পূর্ণিমার হপনহান পারা মেইখংহান তারে দেখলে আপপানে রাঙিরা অর।” অথচ তাতে তেইর প্রতি কি ব্যবহার করল, কিছাদে তেইরে চেয়া থাইল; ফাগিসায়া তেইর আতহান ধরল—ঔতাতে নাউ ইকরেছে। কতি মিথ্যুকগ আছেতা! তা উনি বিদ্যার সাধন করাং লাগেছিল ঔবাকা তেইর রূপহানল তার তপস্যা ভঙ্গ করানির চেষ্টা করল! হায়রে মুনির জাত! তার আসল সাধনহান অছিলতাই কিছাদে তেইর মনহান জয় করানি। কুরাংকার পীর আগরাংত আনেছিল কবচ ঔগর কথা ইকরানিতে কিয়াকা পাল্হরেছেতা? লাজপেয়া! লাজহানো হারপারহান থকছে! কৃষ্ণাই গোবিন্দর লগে হবা করে কথা মাতে পেয়াও মি হারনাপাছু। তা দশ কথা মাংলে তেই কথা আহানর উত্তর দিল। ঔতাংত অয়া তা কইদিন কৃষ্ণার মালকরে মাংল—“ইন্দ! মিতে চানে কৃষ্ণারে জরম বনকগ করে দেহোরি নাই! তেইতে কিয়া মোরে দূরেই করিরিতা?” মালকে কৃষ্ণারে গুজুরল আর তেই আহিয়া এরলি। তেই অন্য কোন কারণে তার লগে কথা না টটরলতা নাগই। ঔহান তেইর স্বভাব হান। কারো লগে তেই নিয়াম কথা নামাতিরি। লেইকেইর মানুষে মাতলা পৃথিবীহান লরলেও তেইতে না লরিরি। ঔ কৃষ্ণারে তা কলঙ্কর কালি গছে দিতে বানা নাপাছে। তেইর জীবন হানাতো কলঙ্ক ডালে দিল। স্মারিহানাং তেইর চরিত্রহান তার কলমগর কালি ঔতার ডেকি কাল্য করেদেছে। ঔহানল, ঔ পাপ ঔহানে, তাও বিয়া করিয়া শান্তি নাপাছে। মইলকর লগে খেয়ইল। কলিকালে কীর্তনর খুংতেই নাছকের।

তা ফুটবল খেলতেগা মানুর লগে লাগিয়া তিনখুরুমহাবি মরণ ফাঙোছিল ঔহান হাইহান। তেইর সেবাল তা জিংতা আছে ঔহানো হাইহান।

স্মারিহানাং আহেতাই—“চিত্রার সেবাং, তেইর স্পর্শর আঙুলিগিত প্রেমর আকৃতি আহান আছে। যে প্রেম তেই খতাহানল নিবেদন করে নুয়ারিরি, তেইর সেবার কঙালা ভাষাং ও কথা ওহান আছে। তেইর খামকরে নুয়ারিরি আহির পানিং গোপন করেছে প্রেমহান গলিয়া পড়ের। উঠানে শাতছে লেহাও ফুলর সাদে তেই আজিকার দুখের আহির পানির বরনে নিজরে শাতকরিয়া মাতিরি, আয় মি তোরকা বাছেয়া আছু। মোর গ্রহণ করিয়া।”—অন্তর্যামীগে পাউরি! দৌ দরেছে আর পাউরি হার পেইলতা।

অথচ পরীক্ষা বিংতা অইল, নুয়ারা অয়া পরীক্ষা দেনা নুয়ারতই সাং বুলিয়া কৃষগাই গোবিন্দরে সেবা করলতা। সেবার প্রতিকলহান হবা করে দিল নাই ওহানল। তেইর জনমহান পানি সানি করিয়া নষ্ট করে দিল। যারি হানাংতে উল্টাহান ইকরেছে। তা যেতাও ইকরক; আজি মি সম্পাদক গিরকরাং দিয়োরি চিঠি এহানাং হাবিতা প্রকাশ করে দিতো। যেগার বিম্বুপ্রিয়া মণিপুরী সাহিত্যর ডাঙর লেখকগ বুলিয়া থছি ও গোবিন্দ সিংহ কি জাত স্বভাবরগ ওহান আপনি হারপাদিক।

টেস্ট পরীক্ষার আগে আকথুরুম জাহান বাগিয়া কামহানাং পড়িয়া আছিল ওপেই তেই সেলকমর গিলাসগল তার কুঠাং গেলিগা। গোবিন্দই গিলাসগতে না দরিয়া তেইর আতহানাং পপকরে দরল। তেই সিকেয়া আতহান ছুটেয়া গিলাসগ টেবিলহানাং থদিয়া নিকুলিয়া আইলি। মাতেছিলি—“তি বালা অয়া পরীক্ষাহান দে! পাশ কর! নাগইতাদে মন নাদি।” তা তেইরে পাষণী বুলিয়া গালাছিল।

তেই হারপেইল এগ কিজাত মানুগ এহান। আর তার কাদাদে না চেপইলিগা। কারণ তেই হারপাড়ে কলঙ্কর ছাকাহান তেইর গাজ পড়তই। মুনিগরে আকগীয়া দোষ নাদিতাই ওহানল তেই সাবধান অয়া চলানির চেষ্টা করল। অথচ পিছেদেতে গোবিন্দর মালকে মাতেছিলি—“নিঙলগ দেনারকা বাজার করতে, মোর পুতকরে ফেইল করুয়া দিলা। নিংথিং গাভের আঠি দরেছে জিলক আগরে মুনি বুলানিরকা বিয়া নাদিয়া থছিতা।”

মাননীয় সম্পাদক গিরক! মোর চিঠিহান নিয়াম ডিগল অযারগা খানি সংক্ষেপ করিং। দুখহানে এতা ইকরোরিতানা! বিনা দোষে কৃষাবে দিল কলঙ্ক এহান জারে নুয়ারিয়া ইকরোরি চিঠিহান। নাইলে কুংগই এতা কথা প্রকাশ করানি মনারগ। তেইর হাবিৎ ডাঙর সর্বনাশ করল দিনহান

তেইরে আংকরাং আহেছিল। ঔদিন। হাই! তেইর হাবিৎ ডাঙর দিনে, তেইর হাবিৎ ডাঙর সর্বনাশহান করলতা বিষ্ণুপ্রিয়া মণিপুরী সাহিত্যর হাবিৎ ডাঙর সাহিত্যিক আগই। যেগই মিছা কথা ইকরিয়া নাঙ করেছে। কৃষ্ণারে বি. এ. পাশ করিয়া শিলঙে হবা চাকুরী করেব আগরকা হমাছি। ঔদিন বরগর মালক বাপক বার বনকে তেইরে চানাং আহেছিল। কৃষ্ণার মালকে তেইরে সাজেয়া চাহাল দিয়া পেঠেইল। কৃষ্ণার বাপকতে আগেংতো তানুর লগে বয়া স্মারিদেব। কৃষ্ণার লক্ষ্মীর ডেকি রূপ বার লক্ষণ দেহিয়া তেইরে ঠিক পেইলা। কৃষ্ণাই হমা দিল আর বরগর মালকে তেইরে ছনার আংঠি আগ পিদা দিয়া মাংল—“মোর বহকরে দিলুতা।” তেইরে মাঠিয়া দিল। কৃষ্ণার মালকে হারোহানে আহির পানি বেলল। স্মারিহানাং অছেতাই—“চিত্রাই আহিগি তুলল। ও আহিগিৎ নেয়ছে আহির পানি! আগেকার তেইর কঙালা আহিগি নাগই। বজ্রর সাদে কঠিন অছে। ডালিম ফুলর সাদে রাঙা অছে। অটগি নিককরল তেইরতা,—মাংল— “ইমা! মোরতা বিয়া অয়া হদাছে। গরগৎ বজ্র লিপিং আহান পড়িল পারা। মালকে মুর বুলেয়া মাটিত পড়লি”—আরতাউ কততা ইকরেছে! ঔতা হাবি মিছাতা। ঔতা হাবি নাগইতা। মিহে হারপাছু নাই! মোরাংত জিঙে কৃষ্ণার য়ারি আর কুংগই হার পেহতাইতা! আরতা কুংগই জানি! গোবিন্দরে কোনদিনো তেই কামনা নাকরেছে। কৃষ্ণা ঔ স্বভাবরগ নাগই।

জোনাকর রাতি হান। স্মারি হানাং অছে তাই চিত্রাই নায়ক ঔগরে মাতিরি—“আজিকার রাতিহান আপচন্দন গছেছি তোব নিরালহান পারা অছে। মোরে রাতি এহান, জোনাক এহান বার তোরা এতারে সাক্ষী থয়া তোরাং কাংকরলু। তি যেদিন লেরিক তামকরাত আমারাং আহিলে ঔদিনেংত মি মনে মনে তোরে বরেছুগ। তোব মোর পথ আকগ।”—অথচ ঔ আপচন্দনর রাতি অছিল ঘটনাহান মি মাতিং। আজি মি হাবিতা প্রকাশ করতো বুলিয়া কলমগ দরেছু দিনহান। ঔ রাতি ঔহান অছিল কাণ্ডহান মি স্মারি দিং। কৃষ্ণাই রাতি চাকাম গর করিয়া পানি ফুটি আনাং তানুর পছরিগৎ গেলিগা। লম্পট, তসভ্য গোবিন্দই কাণ্ডজ্ঞান পছরিয়া তেইরে, কিতা মাংতু সম্পাদক গিরক ইকরতে মোরতা বুকগ ফাটের, তেইর সর্বনাশ করল।

সম্পাদক গিরক! অবলা জেলেই জাত এহানর শত্রুর অভাব নেই।

গোবিন্দই বরগরাং চিঠি দিয়া বিয়াহান বাগে দিল । কথা এহান হারপাহারপি
 আইলা আর কৃষ্ণাই গোবিন্দরে মাতল—“মাত তি মোরে বিয়া করতেইতা ।
 নাইলে মি বিষ খেয়া মরতো ।” লম্পট গোবিন্দই মাতল,—“ওহানতে মি কিতা
 বুলতু ! মোর গজেতে মালক বাপক আছি নাই ।” গোবিন্দর মালকে
 বিয়া এহান নাকরল । —‘এজাত বাজারি জেলেই মোর পুতকরকা নান
 তোগা ।’ আরাক কইনা আগর লগে গোবিন্দর বিয়া দিল মালকে ।
 —না ! কৃষ্ণাই বিষ নাহাছে । ঠই এগরে বানা নাপাকুরা সংসারে নেই ।
 কিন্তু কিয়া তেই বিষ খেয়া নামরলিতা ? দুর্গাম ওহানর পিছেদে আর
 কোন সম্বন্ধ নাহেছে । তেইর বিয়া নাহে । গাঙর মানু বার মালক
 বাপকর ঘৃণাল জিংতা অয়া তেইর কিতা লাভ ! গোবিন্দর মালকে কৃষ্ণারে
 দোষ দিয়া এরলি ।

স্মারিহানাং কিহান আছে ওহান হাবিও হারপাছি । কিন্তু আসল
 ঘটনাহানতে এহান । কচ দেবযানীর স্মারিহান নাগই । দুঃখিনী কৃষ্ণার
 স্মারিহান । আজিতে কৃষ্ণার শিরাপহান ফলেছে । যে শিরাপহানর কথা
 স্মারিহানাং আছে । ভগবানে হাবিতা দেহেরগ—তা বিচার করের ।
 মোর শত কোটি হমা লইবাং । ইতি—

মালতা দেবী

(১৯৬৪)

ল য় নি র ফা জ্জ নে

চৈত্রর বেলিটিকহান । চিকচিকি রইদহানে চারিয়বারা ছকিয়া খারাংগ আছে । গাছে গাছে পাতা জড়িয়া ছদালা ডেউ ওতা হাগহানাদে প্রার্থনার আংহানি তুলেছে । পছরিং পানি ছকিয়া অর নিকুলেছে । গরর চালে শণ, বেণীং খড়ি খের ছকানিয়ে আকিয়া খরং খরং করেব । টেঙারাং শণ কাপাং গেছিগা মানু আয়াও ভাত মাংতাই বুলিয়া লেহাও উহ্ম হুহ্ম লাগেছে তানজা ওগং মেকুরগ বার চাকামহানাংত সেচানি নাকরের । এতাউ সপদানিরকা করেব ; হোঁতাও গং ছনানিরকা করেব । খেদলে ‘মি’য়াউ’ বুলিয়া খানি সেচিয়া বহের । শক করিরি ওপেই খানিপপারাদে মেকুরগ খাঙহানাং পড়িয়াও হুদাছিল । লেহাওনুর মালক সরকারিগং ফুতি দনাং গেছিগিগাং আয়া চিকারি দেনা অকরল—“অ আটেলপি ! এবাকাউ বাত না লয়করলেতা ! চাকামে হমেয়া গুমজিলেতা না কিতা ! বাই, আগরেল কাম আহান অইলতা নাগই । গিলানির সময় না আত দশহান অউরিতা ! ওরে টেঙারার মানু আয়া ফোঅইলাহা । তোর বাপক মানুখোরা ওগ আয়াও মোরে মারিং বুলতই ।

রইদহানে সারছেতাই, মালকে চিকারি দিরিতাই, দারোএ কাচা অছেতাই, লেহাওনু হপস্ লাগেছে । ওবাকা চেয়া মেকুরগই কিতা সপদিং বুলতে লেহাওনুয়ে জ্বি আগল মেকুরগ উর দেহেইতে মেকুরগরাং জ্বিগ লাগে পড়িলগা । মেকুরগই গারিগর জ্বিগল খেরর বেণীগদে দাবদিয়া গেলগা । ‘হইমা ! জ্বি লাগিল এ ! তাহো’ বুলিয়া চিকারিয়ে মিকারিয়ে অনাই ওয়া করে মানুহান পুলিয়া কলোল, বলটিংল মেকুরগর জ্বিগ নিবানিরকা তালকরানি অকরলা । তালকরতারা মাহেই মেকুরগ দাবদের । ‘ওরে, চালহানাং কাইলগা, তালকরো’ বুলতে বুলতে বাহার তলেদে । বাহার পাতা জড়িয়া বাহার তল ওহান বুজিয়া আছে । “পানি ডালো, পানি ডালো, বাহার পাতাং জ্বি লাগতই” বুলতে বুলতে মেকুরগ ছরুবাবুর চালেদে কাইলগা । “খেংকরো খেংকরো” বুলতে বলডাবাবু গাছির গরে ফুতির পালাংগর গজে গেলগা । ওপেইংত নিয়া তস্থা গাছিরাং খেংকরিয়া পানি ডালিয়া মেকুরগ জ্বিগ নিবেইলা । মিকুপহানাং এতাপারা কাণ্ড এহান

অপড়িলগা। মেকুরগতে না মরেছে, চুল হাবি পুড়িয়া দলাগ আছে।

উঙহানে লেহাওনু খাং লাগিয়া “হ ইমারো! কিহানএ! কিতা অইলুতা!” বুসিরি ঔপেই ধনসেনাই তেইরে সান্ত্বনা দেনাং লাগেছে—“খাং না লাগি লেহাওনু, মি আছু নাই।” তার আছে ঔহানাতেই এতা পারা অগ্নিকাণ্ডর সম্ভাবনা আহানাংত গাঙহান জিংতা অইতাই সাং।

যেতাউ অক ধনসেনার টেইপাঙর পরম মুহূর্তহান ঔহান। িরকাপর পৃথিবী এহানাং দুগ নরনারীর অন্তরে নুয়া ইতিহাস আহান লেঙইল উদিন। লেহাওনু বার ধনসেনার জনমে এরে পৃথিবী এহানার হাবি তুচ্ছতার হাদিং নুয়া রূপ আহান অপরূপ অয়া শাতইল।

আজি জঙানির আগে লেহাওনু নাতি নাতলর হাদিং দলা আঙালুরি পিদিয়া, ফলালির আঙেই উরিয়া, কাকালিং খাংচেত বাদিয়া, দুহুনিং দুহিয়া ওয়া খেয়া সংসার করিরি।

ধনসেনা কলর আরিং হজক পিয়া, লাঠি ধরিয়া আটের। কলদিন অইল বাগিনাক লকেইরে উনা অনিং আয়া খানি তয়য়া থা পড়িলগা। বাগিনাক লকেই ঔতাউ বুড়া মামাকরে পা বেলেয়া যানা নাদতারা। বহকলকেই ঔতাউ হবা। বহক ঔগয় তারে নিয়াম লুকরে করিরি। বাই, তেই করক নাকরক তার বাগিনাকে তারে আদর-যত্ন হবা করে করের মাছেইতে! তার খানা পিনা, উরানি পিদানি হাবি লক্ষ্য থর। হৌদিনো নুয়া ফেইচম আহান লয়া আনেদেছে। আজি বাত খেয়া হজক আককারি পিয়া, বাগিনাকে আনেদেছে ফেইচম ঔহান পিদিয়া ধনসেনা লেহাওনু গাডিয়াং সালইল। বাগিনাকে মাতল—“মামা, নাযেইগা রইদ এহানাং। পিছেদেও যিছগানে।” কিহান আহান খুমকরিয়া ফুতি পিদল। নাতিয়ক ঔগই মাতল—‘বুড়ি ঔগরে দেহানির তাইসহানে পাউরি। সিঙইস ইপু। পুতক ঔগ হিনচাপাগনা। আকবারিং ছপি বাঘ আগ মারেছিলগ। দৌ হমাদিং ঔহানাতে নেই। ফলালর গং আহিল থাঙো...’ বহক ঔগই মাতল—“এবাকা নাগেলেগাও স্নাকরের নাই। খানি রইদহান কমক। বুড়া মানুগ, কুমপেই আকপেই মুর বুয়েয়া পড়লে কি দশাহান।”

নেই চানাপা জ্বালেয়া থা বেললা বুড়াগ এহানল। কতি বয়স আছে খাং ধনসেনারতা! চারি কুড়িয়ো না পুরেছে। গাবুরাপুয়াগ বুললেও স্নাকরের।

ইমে সলছে ঔহানরকা লাঠিগ নারা আটানি হিনপার ঔহান নাই । ঔতাউ কিতা আছে থাং ! কালিকার শ্যামু, যাংখেই ঔ নাছেগ, দাত হাবি পড়িয়া লয়ছে । আহিগতো আনকহান বরার । তাতে ঔসাদৌ নাছে নাই ।

নিককাউ মাদানহান আইবতাই লেহাওনু গাছির যারগা । নিককাউ নাতিয়ক ঔগই ফাগি করেব, লাংকরের । লাংকরিয়াও থাক । নাতিয়কগ আছে । তাতে কোনো হবা নেই ভাবল যারগাতাতে নাগই নাই । ইমে গাঙর নিঙলগ ; আহছে থাংতে আহে এদিনেই নিককা য়ারি বেনাং যারগাতা । আটানি অকরলতাই বুকগং অয়া হাবি রকত পুলইল, নিংসাহান ডিফিলপারা ।

জনমতো অয়া আহেছেহান । লেহাওনু গাছির গরগ পানাহান বিংতা আইবতাই এহান । ধনসেনাই খালকরিয়া কুল নাপার । কিহান করত ! দাবদুয়েয়া নিতগা না কিতা ! ঔহানৌ অমাটিক ইজজু কামহান নাগই । বিয়ার কথাহান মালকরাং আরতারেল উল্লেখ করুয়া পারের । কিন্তু বিয়াহানতে নাউ আইতই । অথচ তেই ছাড়া ধনসেনার জনমহান থায়াতে কিতা ! তার বাপকে লুনলেউ পরলেই করতই । ‘মিহা মকদ্দমা করিয়া আমার গাটর পারর তিনপওয়া ঔহান কাড়লছে ঔগর জিলক আনতুগা’ বুলিয়া চিকারি দিতই । লেহাওনুর বাপকৌ তানুরাং নিঙল নাদতই, জাত তলতা, ঔতা, এতা, বুলিয়া । তার দুঃখহানতে হার নাপেইতাই । এগদে লেহাওনুয়ে বার ক্ষীরহানি রাদলৌ—‘দাদা খেয়া য়াগা ।’ ফিতুপহান বুনলৌ ‘দ দাদা পিদিছগা ।’ কুমেইহান আইবতাই—‘কইতে দাদা ফুতিহানি মি ধদিং বেনাই ।’

ঔ লেহাওনুরাং আজি ইচু বছর পিছেদে যিতেগাও লাজপা-লাজপি করেব । কুংগই ঔতা হারপাছিথাং ! কুংগই ঔতা নিংসিং অয়া আভিথাং ধনসেনা ছাড়া । তারাং ঔতা কালিকার য়ারি পারা আছে, কাকেইহানি খানি ডিগল করল । ডিগল কাকেই ছহান আহান দিয়া ঠুকরলতাই খানি তাপইল । নাই ! এবাকা বুড়া মানুগই এসাদে করলে মানুষে কিতা খালকরতাইতা ! আরতাই না খালকরলেউ লেহাওনুয়ে কিতা খালকরতাই । বার ইচুদিন পিছেদে আজি কাকেই ডিগল করিয়া কানাহান কিহান ! ঔ দিন ঔতাং ফোঅ পারতইগা থাং !

ঔতারমা এবাকা তেইর শৌ জিপুত নাতিনাতলে সন্দেহ করলেউ কিহান ! কিহানতে সন্দেহ করতা ! গাঙর নিঙলগ । ইচুদিন পিছেদে

দেহাদেহি । তা কোন হবা নেই ভাবল যারগাতাতে নাগই । তেইও শুক
ভাবল দাদা বুলিরি । জেঠা বেসকগ বনকগর গরে যিতেগা কিতার লাজ
ডর । অইলেউ লেহাওনুয়ে কিতা খালকরিরি কিগই জানে ।

ধনসেনারে গানি ছচিয়ার অইলইছতে আজি লেহাওনুর গরে যিতেগা
লাজ ডরর প্রশ্ন না উঠিলইছ । ওতাউ ধনসেনার দোষতে কিতা । হাবি
ভাগ্য । চামহানর তলর কপালহান । ওহানাং বিধি উগই না ইকরলে
মনুষ্টই কিংতাউ পারিলহান নাগই ।

তার বাপকে হারপেইলৌ পরলেই । তেইর বাপকে হারপেইলৌ পরলেই ।
কারাঙৌ মাতে নুয়ারিয়া চুচর জ্বিগং হা আগর সাদে মনহান পুড়ের ।
লেহাওনুয়ে বার—‘দাদা, আমারেতে পাহুরলেতানা কিতা ! নাহরতাতে । হাই
এবাকাতে ফুললেইমা গাছিরাং যিতেইগা নাই’—বুলিয়া অভিমান করিরি ।
গুরুদেবই সাক্ষী ; তা গেলগা একাদশীর পিছেদেংত ফুললেইমা গাছিরাং
নাযারগা । ফুললেইমা গাছির সংকীর্তনর দিন ওহান ডাহাং আইলাতাউ তাপ
উঠেছে বুলিয়া নাগেছেগা । ফুললেইমাই কথা মাংলেউ নুঙেই নাইরি লেহাওনু
সরকারিগং হিনাং যিতেগা ফুললেইমাই কিতাই উনাউনি অইলে কাদিরি
লেহাওনু । কাদে কাদে এগদেতে তারকা নারাইন সেবার প্রসাদ থ দিরি
তেই । কিহান করত, কিহান নাকরত ! গারগং লেহাওনুয়ে দেছে রুমাল
ওহান বাধিয়া বসন্তর খুংতেই আহান পিদিয়া, বিড়ি পিয়া পিয়া আটের ।
আটে আটে খালকরের । খালকরিয়া কুল নাপার । আকদিন আমুসেনারে
মাংল—‘ইতাও জ্বিতা কর । নাইলে মি ছ খেয়া মরতৌ ।’

হাবি যারিহান ছনিয়া আমুসেনাই মাংল—‘অবাই ইতাও, এহানরকাউ
হিনপাছংতা ? তোর মানুগহে তি ঠিক কর এনে ! মি আছুতাতে কিতারকা ?
দাবছুয়া বেলেইক । দাবছুয়েয়া মই গাছিরাং খইতাঙাইগা । রাতিয়ে রাতিয়ে
ফোঅইতাঙাই । ওহানরকা না খালকরি ।’

বিবেচনা লইকরিয়া আমুসেনাই মাংল—‘বাগা তোর মানুগই হে কিহান
বুলিরি ওহান হারপাগা ।’ আকদিন বেগিটিকে লেহাওনুর মালক সরকারিগং
ফুতি দইরি । লেহাওনুর বাপচ বিয়নত দা অহানল কুবাং
নিকুলিয়া গেছেগা । হাতে হাতে চারিয় বারা চেয়া ধনসেনা লেহাওনু গাছিরাং
হমেইলগা । গরে লেহাওনুয়ে বাত রাদিরি । আরতা আকগৌ নেই ।
—‘লেহাওনু, কথা আহান আছে ছন’ ।’ —লেহাওনুয়ে তারে উঙয়া

চেয়া মুরগ নঙেইল। ধনসেনাই হারপা নুয়ারল কিয়া লেহাওনুর আহি এগিং বিপদর সংকেতহান। যেতাউ অক এবাকা নিয়াম খালকরিল সময় নেই। আমুসেনা বিজয় গাছিরাং বাসেয়া আছে। এপেইৎত তা পোহানল গেলেনা হাবিতা ঠিক অইতইগ। “—হন লেহাওনু! আমুসেনাই কিতাই টটরলাং, নিংখোকাপার রাতি ওহান ফুল গাছির ডুমুর জারর তলে বাশিগ বাজেয়া ইম্পানি অয়া, বার বাশিগ বাজানির পিছে তি তোর হুনা রূপাল ফুল গাছির মাংকেই জারর কাদাং আহিছ। ওপেই আমুসেনারে পেইতেই। সুপ না টটরেয়া তার লগে আইলে ডাঙর থংহানাং মোরে পেইতেই। ওপেইৎত আমি হিংগরে দাবদিয়া যিতাঙাইগা...

“—হে কিগ? কিতা বুললে?”

গরগ হাবি বাগিয়া ধনসেনার মুরগং পড়িল পারা। লেহাওনুর বাপক বারনর তলে খুটা সিলকরের ওহান কুংগইতে হারপাছে।

কিতা বুললে জেলেই দাবদুয়া কুরা’—বুলিয়া ধরেছে শাবল ওংল বারনগর তলেৎত উরাডিল। ধনসেনারাং নাতে লাগিলগা। তা আকদাপে ধনদেনা কুরাং মাঙইলগা। চিকারিগ ছনিয়া লেহাওনুর মালক পছরিগৎত আইলি। হাবিতা ছনিয়া মাংল—“কারেউ পরথেইল দরকার নেই। তোর নিঙলগ তি সমালা। এহান মানুষে হারপেইলে দাবদুয়াছি নিঙলগ বুলিয়া ঢঙগ অইলকো পুরি ঠাচা করে নুয়ারতেই!”

জেলেইর বুদ্ধি অটর আগাগৎত আহের বুলতারাতা হে; সময়ে পড়লেতে ও বুদ্ধি ওতা নালয়াউ উপায় নেই। “—আঃ! না টটরেই। অটগ কামাড়েয়া কান্দিহান মজা। ক্রোধ ওহান হজম কর। নিঙলর বাপকগ অনা এহান হেলাহান নাগই। মুনিগরতাতে কিংতাউ নেই।” লেহাওনুর বাপক কান্দিহান হজম করানিং বাধ্য অইল।

বিয়ার দিন ওহান লেহাওনু লোদিয়া কাদেছে উনি! কাদিয়াতে কিতা করত! ঘটনা ওহানর পিছেদে ভেইরে রাহে রাহে থয়া বিয়া দিলা। ধনসেনাই ঠুনিংসা বাগিয়া আমুসেনারে মাংতলগা—“ইতাও মি মরোদিগা নাই! সংসার এহানাং থায়া কিতা করতু?”

আমুসেনাই তারে নানান কথা মাতিয়া ঠেম করল। মনে মনে ধনসেনাই মাংল—“মাগা লেহাওনু তিহে, বুড়েই অয়া থাকগা। বিধাতাই আমার কপালে যেহান না ইকরল ওহানরকা কাদিয়া কিতা করতে!”

তাউ আহির পানি বেলল।

ইচুদিন পিছেদে ঔতা কুংগই নিংসিং অয়া থাইতাইতা। তেয়ো পাহুরে থাইব। ধনসেনাইতে না পাহুরেছে। ঔহানেহে আজি তেইরাং যিতেগা লাজহানে কানহান রাঙাং অর, খৌনুং হুকের নাই।

ঔরে ধর্মচেলপা যুধিষ্ঠির গাছির বারিহান। ঔহান লালয়া পিছেকার জাংগাল ঔগ লেহাওনু গাছিরগ।

তা যারগা বুলিয়া তেই নুঙেই নাইরিতা? কিয়াতে নুঙেই নাইতগা! নাইলে কিয়াকাতে দেহিয়া মাতল—“দাদা! জাহং এদিনেই নিককা আমারাং বুল্যাং আহিছ। দাদা গাছি আইলে উময়ার নাই।

ইমে কনাকে মাতল ঔসাদে—“দাদাতে কিয়া নাইব। আহিছ এনে আমারাং, দনু খেলবাংতা। বৌবরনর সময় দাদাগাছি থাইলে উময়ার নাই।”

এসাদে বিয়ুং দনু খেলতে বৌবরনে লেহাওনু গাছির বেরহান পড়িয়া বের ঔহানর তলে মালক জিলক পড়েছি। নিকলাউরিগা বুলতে ধনসেনার আতহান কাপিয়া রকতে জঞ্জাল! ঔ রকত ঔতার সিক তেইর গারিগং, মেইথাংহানাং রাঙাং অয়া লাগেছিল। অমাটিক চালাক করে লেহাওনুয়ে ঠইগংত রকত ঔতা পুছে থাইবতা।

ঔনা লেহাওনু মাংকলে পিড়া আহানাং বয়া গুয়া হুহিরি। কাদাং শৌ আগ হুয়া দেছি। নাতিয়কগ পাউরি। বহকে শৌগ তেইরাং খদিয়া কাম করিগিং সাং। “—অ সিঙ্গা! দাদা আহিল এ। মাংকলে ফিটা আহান দে। শৌগ থয়া কুরাং মাঙইলিগাতা।” তেই গুজুরে গুজুরে গিয়া ফিটা আহান আনেদিগা। ঔহানাং বয়া খানি জিরেয়া ধনসেনাই মাংল—“হবাই এহানি আইতে ঠুকের বেলল সুপ চানাপা।” মাতিয়াও হারপেইল নাগই কথাহান মাতলতা। তেই খালকরতই এমাটিক তুরা করে বুড়া অইলতা বুলিয়া। —“বাই ঠুকেরানিতে, ইমে রইদহানে দিতেগা না! নাইলেতে এবাকাউ বিয়ানকার আদলহানাং বি কিয়ারহান চা দিয়া উকেই দেনা পারৌরি। বাই আমি তুলিয়ার মুঠি ঔতা এবাকার শৌ এতাই তুলানিতে থাক, দেখলে থাং লাগতাই।

তেই উঠিয়া গিয়া হজক আককারি লাগেয়া আনে দিল। গুজুরে গুজুরে আইলি—“যেগদে যেগ যিতাইগা ঔগই উগদে দিনহান খেদতাই। এতারেল কাম আহান অইলতা নাগই। এবাকাউ মি হাবিতা সামালা দেনা।

কোনদিনো মরিয়া সাঙাইতোগ থাং !

তেইর নারগৎ বার মেইথংহানাংতে মরাণি মানাছে ইঙ্গিত নেই । বুড়া অইলে মানু এতা গুজুরানি গাঢ়ইতারা পাউরি । হজ্জকারি পরম তৃপ্তি কত আচুল দিয়া মাংল—“আমুসেনা মরিল নাই ! হুনলেতা ? জিপুত ঔতা খেয়রা পরলেই আহান অছি । মালক ঔগ কারাঙো চেপো নুয়ারিয়া ডেই ডেই হারা দিরি । চাকুরাতে নেই কিমেতে করত । জিপুতে এগদে কোলিল অছি ।”

—কিতায়া মরিলতা ?

—কিতাতে অইত ! বুড়া কালর নুয়ারা নাই । আমিও আর কই দিন থাং, বুড়া অইলাং । আমিও মরলে কিতা অয়ার, হিয়ালে কুকুরে আচুলিয়া খেইতাই নেই, না কিহান, কুংগইতে জানে !

“দাদাতে এবাকাউ গাইটহান হবা অছং না । কিয়াতে অমাটিক চালাক করে মরতেগা ।” হারো অইল ধনসেনা । মরণহান কাদা অয়া আহের মাহেই মানুষে মরণ এহানরে নিয়াম ডরপেইতারা । যে কোন আগর নাগই আশ্বাস আহান হুনলে নুঙেই লাগের ।

ধনসেনাই লেহাওনুর মেইথংহানাদে চেইল । বয়সর চিন মেইথংহানাং । চামহান খজছে । বাট্টি করে কাপেছে চুল ঔতা কতগাছ এবাকাউ কালা অয়া আছে । মরণহান ইমপানি কাকেই কারিয়া আহের ।

—‘জিতে এবাকাউ বলী অছং না লেহাওনু ।’

মিসরি গসেছে দাত ঔতা নিকালেয়া আহিয়া মাংল—“কিতার বলী থাং ! বুড়া অইলাং, দাতৌ পড়িল । অরতে গুয়া চাবে নুয়ারুরি । বুড়া অইলাং নাই । ক—ই দিন অইলতা বিয়া অইল । ছয়ত্রিশ বাংলার পানির পিছেকার বছর ঔহান না । নিংসিং অরতা দাদা, চানমনি পানিং বাহিয়া গেছিলগা ঔহান । আরো তি থাইতেগা জিংতা অইলতা ।”

“—অবাই, ঔ চানমনি কালিকার টেপানা ঔগই আমার আলি ঠেলার । মোরে ছজাল তাল করের । ঘোর কলি হমেইলতাতে আপপানে থাং ! ছয়ত্রিশ বাংলাং চউল পেইলাংতা মনহানাং মাহেইগ করে । বাবাই রঙ্গুমর চউল খেয়াহে নুয়ারা অছিলতা নাই ।

—এবাকাতে ধান কাঠিং রূপাহান । আমি বেহলাংতা এরে হাদি এহান ।

মাদানকার ছেয়াগ উঠানহানর তুলসী পুংগ লালয়া, দলাতেরা ফুলজার লালয়া। লেউ ফুল শাতছে বি হানাং পড়িলগা। বুড়া বুড়ি দিয়গি য়ারি দিতারা। প্রেমর য়ারি নাগই। সংসারর তুচ্ছতার, সামান্ত ঘটনার, সার্থকতার অসার্থকতার, দুঃখর, বিচ্ছেদর। এতাউ প্রেমর য়ারি। জীবনর প্রতি প্রেমর য়ারি। ডিগল জীবন আহান পিঠিয়েদে বেলেয়া আহেছি ওহানরে বানাপাছি য়ারি। ওহানর পুলকরেছি স্মৃতি। কুংগইতে হারপাছে যৌবনর প্রেমর য়ারির সাদে এতাও এমাটিক মধুর।

“—চরা সাজোর ফুলহানল পুতক এয়ারি তীর্থং গেলগা, হুনলেগ। আমি মরলেভে কিহান অর!” জেঠা পুতক ওগ ডাঙর আইল আর লেহাওনুয়ে ঢাকা দক্ষিণে গেছিলিগা য়ারি ওহান অকরল। হাদিং সিজা আয়া শৌগরে ল গেলিগা। নাতিনক ইফুলেংত আইলি। বাঙ খেয়া চিনা আহানল উঠানে উবা অয়া চুল আচুরেইরি।

“—সবিতা। যাগাতা তোর মালকরে য়াতগা তোর ইপুরে সেলকম ফুটি ফুৎকরিয়া দেক।” সবিতা গরে গেলিগা। লেহাওনুর পুতক কুঞ্জবেহারী ওমেংত উঠিয়া উঠানে বেত ফেরাং বহেছে। সবিতাই হজক দ্বিকারি লাগেয়া আককারি ধনসেনারে, আককারি বাপকরে দিলো। সিজা আয়া ধনসেনারে সেলকমে কাপকে দিলো বার হেয়করে চাহা গিলাস আহান দিয়া ধান বানাং ধরলিগা।

ধনসেনা বার লেহাওনুর য়ারি লইনার। ছেয়াগ আরাকৌ ডিগল আইল। লেহাওনুয়ে মাংল—“কুঞ্জবেহারী! বিলেদে মাছগুলি চেইগানে। অমরেন্দ্র নেইতা। ওগরে আইলৌ দিয়াপেঠা।”

ধনসেনা বেরহানাং ডায়া লেহাওনুর পরিপূর্ণ সংসার এহান চার। খালকরের এরে সংসার এহান তারহানৌ অনা পারলইছ। এহানৌ তার সংসার আহান পাউরি। ডাঙর সংসার আহানর অংশ আহান। তাও সংসার ওহানর-আগ। প্রত্যেক-জার গাছ, সালিয়া পড়েছে লপুক এগ, ওরে হাগহানাং ডায়া আছে বরনর টুমা ওহান, ওতা হাবিল তার প্রিয় পরিচিত সংসার। লেহাওনুর সাদে এতা হাবির লগেউ তার গোপন য়ারি আকেইহান আছে।

চকরা জুরা আহানে মাংকল হানর চালহানাং মেইকখুগ অয়া জম হংকরতারা। মুঙর হেইনৌ জারে ফুল শাতছে। লেহাওনু ওয়া হুহিরি। শৌগ কাদের। ধান বানানির শব্দ এহানাং তাল আহান আছে। চারিয়

দারার গিরতি এহানর চলানি মন উঠানর ভালহান দেহ পাৱা।

মনসেনা গুমহান আয়া গেজেগা। হপন আহান দেহের। ভয়ত্রিশ
বাংলার পানিহানে লপুকগ বুৱা আনের। নৌগল আয়া আমুসেনাই
মাতের—‘উঠ! কিতা কররতা। চালাক করে আই। মি পৌহানল
আহোরিগ, লেহাওনু হৌপারে বয়া আকখুলিগই কাদাং লাগেছে।
কালকরিকগা ষিকগা।

ওপেই লেহাওনুর বাপকে শাবলগল উৱা দিল। শাবল ওগং মৱা
মেকুর আগ বিদিয়া আছে। লেহাওনু আয়া মাতিরি আকগৌ নাইলাই
নাই মি কাদতে। এখুরুমতে মি আছিলু ওপেই বয়া তুমি কাদগা।
মি এপেইৎত চেইং।

এগদে পানিহান ঠেলা আনের। উঠানহান বুৱেইল। মাংকল হানাং
কায়া আহের। লেহাওনুয়ে উঙয়া মাতিরি—“কিমেতে করতাং? গরগ
বুৱা আনের। দাদা! দাদা!”

আহিগ মেলিয়া চার থাংতে লেহাওনুয়ে তাৱে উঠাং লাগেছে। “দাদা
গারিগ নুয়ারর থাং? উঠবেনাই ফামহানাং অইলৌ খানি গুমজেগা।”

(১৯৭০)

লেইমাতল

লেইমাতল গাঙহানর কারো লগে চান্না নেই। তেইর লগে দিন আহানর গজে দ্বিদিন তিলকুরা জেলেই মুনি য়ো নাছি। তেইর চৌদাগ পাহিয়া পলেই নাবইতারা। কালাচিংখেইর ঔবাকা গুমেংত উঠিয়া উঠানহান হুৰে হুৰে গুজুরানি অকরতই এগ, রাতি নঙেইর ঔবাকা এরিরি। তেইর জালক, দেহরক, গাঙর জেলেই, মুনি, শৌ, বুজন কারঙ লগে মেঙয়া কথা আহ'ন নাটটরেইরি। জুহানাং হু গছেছে পারা। “অবাই! হাবিহান মোর শত্রু, মোর পুতকর শত্রু! মোরে হিংসা করতারা ঔতার উঠানে ঢুকগাছ উঠক, মড়কি আহানাং নির্বংশ অকা, পথে গাটে মরকা, হিয়ালে কুকুরে আচুলিয়া থাকা, লাংটিয়াই পেট বুজকা।” লাংটিয়ার শিরাপে গুরু মইচ নামরতারা বুলেছি। তেইর শিরাপেও কোনগ নামরিয়া, নুয়ারাপানি নায়া। হারৌপিয়ম অয়া জিংতা অয়া আছি। তেইর লগেতে গাঙর মানুর মিলামিশা নেই। এমাটিক চিকারি দিয়া দিনহান মানুরে শিরাপ সাকা দিরি এগরে কুংগই বানা পেইতাইতা।

লেইমাতলরে বিয়া দিয়া আনলা ঔপেই হাবিয়ে মাতেছিল—“বহকশৌ এঙলিতে ঠাণ্ডাবাণ্ডা অইতই। তেই আটিরি খংচেত এহান চেই এনে! কথা টটরেইরি নুংশি এহান চেই এনে! যেইগা কালাসেনার মইলক লেইমাতলরাংত হিকগা।” গাঙহানাং বহকগ ঠিক নাপাকুরা মানু নেই, বানা নাপাকুরা মানু নেই। তেইর বেবার লামচেং গাঙর আলোচনার বিষয়হান অইল। বুজন দুগ বইলে ঔহানে য়ারিহান। “আজিকালিকার বোয়েই এতা মাঙছি। ঔতারমা লেইমাতলতে মুলুকেংত আলাদাগ।” জেলেই দুগ তিলইলেও “হবাই, কপাল হবা অয়া পাছি বহকগ। আমার বোইতে—”। গাঙহানাং রাস করলে তেইরে বৃন্দাগ দিলা। বছরহান লালইল আর তেই মুনিশৌ আগ অইলি। “বাই লেইমাতলর শৌগর হবাহানরো! চেইতে আকয়া! খাইশৌগ মালছে।”

লেইমাতলর হেরক কালাসেনা খেতি নাকরল । বি বাগি দিয়া মেস্তরির
কাম করল । কিন্তু তার মেস্তরি এহান ঠিক মেস্তরি করানিহান নাগই ।
মাগানা মেস্তরিহান । কোন মানু আগর চকি, কলর উপু কিতা
হাকরাং লড়লে নিয়ানত উঠিয়া আতিয়ার কিতাল গিয়া তক্তাহানাং সেং
আহান দিয়া ঔপেইংত গপ অকরতই—বিঙসির কিসাদে সেয়াপগই তার
কিসাদে কামহান দেহিয়া তারে কোট আহান দেহিল, সিলটর কিসাদে জমিদার
গই তার মেস্তরির পরিচেংহান দেহিয়া পিঠিহান খাপারেয়া কিতা বুলেছিল,
ঔতাল সেদাহান করিয়া কাম নাকরিয়া গরে আয়া ফোঅইল । এসাদে করে
তার দিন গেলগা । বিহানি বাগি দিল, বাগি আলাই ধান পেইলা । গরে খেইলতা
নেই, সংসারহান না চলের । এগদেতে তেই আরাক আগ জরম দেনার
দিন বিংতা অইলি । জেঠা পুতক ঔগ বাক্সা ডাঙর অছে । খানাপিনার
চিন্তা, পুতক খাইমুনিরে ইঙ্কুল তামকরুয়ানির চিন্তা, জরম দিতই শৌ ঔগর
চিন্তাল তেইরতা গারিগ খুতপ আহান পড়িল । গুম নাহানি অকরল ।
এগদে খাইমুনির বাপক কাম না করিয়া বুলে বুলে খার । দিনে গপ দিয়া,
রাতি তাস খেলেয়া সময় খেদের । কোন কাম আহান তারেল অইলহান
নাগই ।

আকদিন রাতি গরে আয়াও মাংল—“বাত না লয়ছেতা? বাক্সা বক
পাউরি । কই দেই ! লেইমাতলে খুমকরল—হাগেংত বাত বাদতু । গরে
খুদগ পেয়াও নেই । আমিয়ে দিনেহান নাহেয়া আতি, চৌল কতগ আনগা
বেনাই !

তা মাংল—“আইংতে ছাতারারে দিলুতা ! মি সাতাইশ ডাকতে তা
ডবল দিল । মি রি দিয়া রাঙা সেটগ দিয়া মেইখঙে ছুন্ কালি গছে দিলুতা ।
কিমে ! —ইয় ! আইংতে পেটগৌ খানি ফুলেছে পারা, রাতি বাত
নাহেইমতা না কিতা !”

আকদিন লেইমাতলে মাংল—“শৌগ তাপহানে জ্বির মেইপুলগ অছে ।
দিনহানৌ গরে নেয়ছিলে, এবাকা অইলৌ মেইপাগরাং খানি যাগা বেনাই !”

—“আজি মনহান খারাপ অছে দিনহান, মোরে কোনো কথা না মাতি ।
আতলে চব্বিশ বুলতে মি কাণ্ডিহানে পচিশে কায়া ডাকহানতে থইলু ;
এবাকাতে বড় খনার উপায়তে নেই । সাত ভাসে আতুলিয়া চেইতে লামচা
তাস আহান আয়া—বাই কালা সেট ছগ খেয়া উঠিয়া আইলুতা । হাই গিরক,

কালী সেটতে আহোঁগো দে নে ; রাঙা সেটরে নাদেহং মাহেইতে ।”

লেইমাতলে হারপেইল এরে মানু এগর লগে নরম অগা কাম না চলতই । আহিগ পাকেরা মাতল—“তোর রাঙা সেট কালীসেট ঔতার গছে খরখরিয়া আহানল বারা দিং । মেইপাগরাং নাযারগাগ ?”

গাঙহানাং কালীসেনার ডেকি য়ারি দেকুরা, তাস খেলাকুরা মানুর অভাব নেই । ঔতাই কালীসেনা যেপেয়ো যাকগা, গিয়া পুলয়া য়ারিল তারে বের করিয়া কাম সিং করে দিতারা । কালীসেনাই কোন কাম আহান দরলে—বাহাতা তা মেস্তরি, জুরাল এগর বাউক এহান অইলতা ? “বুলিয়া হাতে হাতে কাদাং চেপয়া বহিতারা । কালীসেনাই “না, না, বাছেই মোর কাম না সিংকরিয়, খুটি চকি এহান আজি যেছাদো না লয় করলেতে. গরদে—বাই, গরর জেলা ঔগরেতে মোর বেঙগয়ো ডর নাপাউরি । জেলেইর তলে থাইতারা মুনি ঔতাও মুনি থাং ? মি মোর কাম করতো খেইতো । জেলাগই মোর কোন কথাং য়োঅইলেতে জুরা ঔগং দরে বেলেয়া—হেরা ! হাই চানাপা” । “—না না ! তি তোর কাম কর । ইমে আতিয়ার কিতাল বহেছং থাংতে অইলুতানা, তোর কাম তি কর । মোরে বাইসহান খানি দে ।”

“—বাইস এহান ! এতা মাল তুমি এবাকা পেইতারাইতা ! অজাই দশ আনা দিয়া লছিলহান । এয়া, এরে বাইস এহানল নাই মোরে আশীর্বাদ করলতা বাবা, কালীসেনা ! এরে মি মরতে তোরে আশীর্বাদ করৌরি—বাহা ! বাহা ! নাইল ! অহোং ! অরতে নফট করলে নাই জুরালহান । মাঙকরলে ! কই দে, মোরাং দে, বাই, বাইস দরানিও খেলির কামহান থাং ? মি বাইসহান দরলে দেশহানর মানুষে হারপেইতারা এহান কালীসেনা মেস্তরির আতহান বুলিয়া ।

কথাহানতে মিছাহান নাগই । কালীসেনাই মনহান দিয়া কাম করলেতে দ্বয়ং বিশ্বকর্মাই পেয়াও খানি খালকরের । অইলৌ কালীসেনা মেস্তরিয়ে আজি পেয়াও পরর কাম ছাড়া নিজর কামে বাইসহান নাদরেছে, মাগানা কাম ছাড়া পইসার কামে নিনিগ, আতুরাগ সকছে । মইলকে গুজুরিতাতে আপপানেথাং ! তা যে কামহানাং দরতই ঔহান ছাড়া আর হাবি কাম করানি তার স্বভাবহান । যেহানি করে ঔহানি মইলকর ডরে । তারে এবাকাতে কোনগই মেস্তরিরকা না ডাকতারা । হারপেইলা, এরে মানু এগরাং কাম করাং দিলে দশ বছরেউ কামহান লয় নাইতই । বার তা কাম

করের ঔপেই চেপইলেনা মিকুপহানাং কামহান আইতই । এরে তত্ত্ব এহান কালাসেনা মেস্তরির মইলকেউ হারপেইল দিন ঔহানাংত গাঙর মানুরে বিষগ করে দেহানি অকরল । বিনা পইসার গ্রাহক ঔতায়ো তেইরে বিষগ করে দেহানি অকরল । কাফাম এহানাং বিষে বিষক্ষয় নাগ্না আর জিঙে য়াম অয়া বিষ ঔতা পুলইল তেইর হুদিগৎ ।

দিনে দিনে তেইর জুহান ইস্পাতহান অনা অকরল । কালাসেনা মেস্তরির জনমহান পানি সানি অনাং পড়িল । আতিয়ারল মানুর গর কাম করাং গেলেনা হাদি হাদিৎ গিয়া চেয়া আইরিগা হুতুমেও কাম করেরতা, না মানুর লগে য়ারি দিয়া বয়া আছেতা । তার লগে য়ারি দেনাং মানু আগরে দেহে বেললেতে লয়ইল নাই । হেয়করে দিল ঠার বচন ঔতা মানু ঔতারাত্তো গিয়া বিদিলগা । ঔহানেতে তার লগে য়ারি দিয়া বহানি এহান খানি ডরপেইলা আরতাই । য়ারি দিলো তেইর নারগ, তেইর লবহান পেইলে ফুৎ করে কুংগদে মাঙইলাগা । তেইরে গাঙর কোলিরি ঔগ বুললে চিনলা হাবিহানে ।

কানহাই এইগা তার নামসার উপুগ হংকরাং আহিল দিন ঔহানকার মেইচাক ঔগতে পরলেই আগ ।

—তা মেস্তরি, ধর্ম করানি এহানাঁতৌ পইসা লাগের এ ! পইসা ছাড়া কোন কাম অয়া ঔনা নেই ।

—কিতা বুলরতা এইগা ! পইসাইহে ছনিয়াহান দরিয়া থেছে নাই ।

গর বিতরে থায়া “তা মেস্তরির” মইলকে নারগৎ কুকিতিতা গহিয়া মাতল—বাই, ডগাট বাঙরার কথা ছনতেক ! পইসা ঔতারে চারহান করে না নিংকরের ঔগই ! এবাকা বিনা পইসার কামে লাগতই ঔগই দেবগা কথাহান ছনতেতে !

কালাসেনাই মাংল—বাসা এইগা ! তি নাই কুষ্ঠিহান চেয়া রাজ্যোটক বুলিয়া মাতিয়া হিনচাপি এগরে মোর নারগৎ পিদা দিলেতা । এবাকাতে রাজ্যোটকতে থাক, দিন মাদান কা কা করিয়া গরগর চৌদ্দাগৎ পাহিয়া পলেই বহানি নাদিরি । এহান তোর রাজ্যোটক হান না রাইক্ষসী য়োটকহান ?

—পাজিহানাং রাজ্যোটক বুলেছিল, ঔহান কোনদিনকার পাজিহান ! বছর বছরেতে পাজি শিলকরিয়ার নাই । নুয়া পাজিৎ হাবিতাউ বদলি অর । তোর রাজ্যোটক ঔহানৌ বছরহান শিলকরলে বদলি অর নাই । এবাকাও ধন মাংকরিয়া কাম আহান কর এনে । মিহে কবচগ দিতৌ নাই !

হাইদে বাসা, ঔহানতে করতাঙাই নাই, এরে নামসার উপু এগ খানি হংকরে দেতা। বামনর কামহান গিরকগ, ধন কিতাতে লোভী নাকরিছ।'

তা মেস্তুরিনি এহান হাবি নেপথ্যে আছিলি ঔগই এবাকাতে প্রকাশ্যে আইলি—“হাই! তোর কামেতে ধন হমার, বার মানুর কামেতে—ধন কিতাতে লোভী নাকরিছ। লাজ নাপারাইতা! এগ মাগানা মানুগ পাছোতা! ধন কিতাতে লোভী নাকরিছ। ধন লোভী নাকরলেতে তোর চাকুম ঔতা লককরিয়া খেয়া থাইতাঙাই পাউরি। এরে হমলহান লকুরা এগো, বিনা পইসার কামহান অইবতাই আতহান অর চোরিয়াহান—”

বামনগ নিয়াম কথা ছনানির আগে আনেছিল কুকর টুমাগানিল গরে সালইল। কালাসেনার মইলক জুরানি অকরলো—মি মরিঙএ! হ-ইমারো! কিগর আতে মোরে দেছতা! অ বাবা! নুঙেই অয়া মোর পিণ্ডগ খেইছ এ।

মালক, বাপক, হেয়ক, বেইবুনি বেয়াপা, গাঙর মানু আকগরো বাদ নাদিয়া থতাহান চালেইল। কালাসেনাই মাতল—নাহ্! আর মান-ইজ্জৎ, ধর্ম-কর্ম, বামন বৈষ্ণব, আকগো এ চণ্ডাল জেলা এগর পাল্লাং টিকানির খেমতা নেই।

ঔদিন মাদানে কালাসেনা মেস্তুরি তার খুচ্ছু হাবিলো—‘থং আহানর কাম ধরহু—বুলিয়া গরোত নিকুলিয়া গেলগা। মা আহান পিছেদে গরে আয়া ছনল মুনিশো ঔগ মরেছে। ঠুনিংশা বাগিয়া কালাসেনা দারিগর কোন আগদে বয়া থাইল।

লেইমাতলে পুতকরকা মিকুপ আহান কাদিয়া বাকি সময়হান হেয়করে, গাঙর মানুরে ঠারেয়া থাইরি। দিন কারকাও বয়া নাথার। লেইমাতল বার কালাসেনারকাউ বয়া না থাইল। দিন যারগা। যারগা মাহেই মইলকর থতাহান আরাকো তিতা অয়া আহের। তেইর গুজুরানিহান কোন দিন অসহু অইলে কালাসেনাই মাতের—চামার জেলাগ, মি কোনদিন আকদিন তোর মুরগল সরকার গরে যিতোগা। কোনদিনতো জিমগাগ ইমে ধৈর্য ধরিয়া খাংকরোরিতা।

কালাসেনাই নিয়াম দিন ধৈর্য ধরিয়া খাংকরানি না লাগিল। মুনিশো আগ জরম অয়া বহর আহান অইল ঔপেই কালাসেনা মেস্তুরি, তার পুণ্যবলে, দৌ অইলগা।

এহানতে কি কথাহান ! থাইতেও শান্তিহান নাদল, মরতেউ নাগই সময়
ওহানাং চেয়া মরিলতা ! আরতাই মরতারাহান আহিগল নাহে দেহেছে
পাউরি ! মূলুকর হোঁনাবি আহানতে আছে নাই !

না, মরিল গুটি থুংপা ঔগরে গালেয়া কানা নেই । সংসারর নৌগর
কেরালিহান চেংকরে দরানি লাগতই । যেতা তেইর শত্রু, পুতক কমলবাবুর
শত্রু ঔতার লগে খাংচেং বাদিয়া কোলি লাগানি লাগতই ।

ঔতার লগে কোলি লাগে লাগে আছে ভিটাগ, বি সম্পত্তি রক্ষা
করল । পুতকরে ছাত্রবৃত্তি দিয়ৌএইল । ইস্কুলর বাবুর লগে কোলি
লাগিয়া পুতকর মাফরি চাকুরিহান পৌয়েইল । ডগাট বাগুরা ইস্কুলর বাবু
ঔগরে মাঠা আহানে দরিয়া আহানেতে দেছিলি ।

তেই জীবনে নুয়ারলতা কাফাম আহানাং । জালকর কুটুম আগর
জিলক আগরে কমলবাবুরাং দেনারকা কমলবাবুরে হোঁখেরি, সেলকমসিটা,
উটংচাক খোঁয়ানি অকরল জালকে । লেইমাতলে পইলাতে মনেইলতাই
এতা পুতক মাফরগ আছে আর বানা পেয়া দিতারাতা । কিন্তু না, নাগই ।
এতা বানার হোঁখেরি নাগই । স্বার্থর হোঁখেরি । নাইলে আজিতে পেইরাক
করে কিতার বানাহানতে ! ইচুদিনতে বানাহান কুরাং আজিল ? বার এমারি
বারে বারে দলগিলা পুরি জেলা আগ জালক গাছিয়াং আহিরি । ঔগ
আইবতাই কমলবাবুরে বাত খওয়ানিহানো নিয়াম অর । লেইমাতলে
নুঙেইনায়া জালকরে কুকুরর মূরে চুচ জারে দিল । কমলবাবুরে বুজেইল
বাবা কমলবাবু ! শত্রুর কথাল না চলি এনে ! এতাই কোনোদিনো তোর
হবাহান না মনেইতাই । মোর কথা লইছ । মালকগর কথা মাটিং বেলানি
এহান গম নেই ।

কমলবাবুরে খুম করল—‘ইমা ! মোরতা কনাকত বাপকগ নেইগ ।
খুড়তাকগই মোর বাপক সাকছেগ । তার কথাহান মাটিং বেলানি এহান
মোর ঠই এগল কিছাদে পারতু !’ লেইমাতলে কপালহান চাপাড়েয়া—

আহান নাগই দুহান নাগই জ্বালার গজে জ্বালা ।

এতা হাবি জ্বালাংতে মরানিয়ে বালা ॥

বুলিয়া এলা দিয়া কাদল । সেইতা করল তেই পুতকর বিয়াং না হমেইতই ।
কিংতাতো না যৌঅইতই ।

বিয়া করিয়া কইনাগ আনলা দিন ওহান তেই কাদার গর আগং

কাদিয়া বয়া আছে। কাদে কাদে হেয়করে গালেইরি, গাঙর মানুরে
গুজুরি—দেহরকরে পেলকরে ঠারেইরি। বহেছে গর ঔগর জেলা ঔগই
মাত —‘বহকগ না ওককরোরি থাং!’

“কিতার বোয়েই! মোরতা আকগৌ নেই। মোর হেয়ক থাইতেতো
মি কপাল থিপিগ। আজি বহকগ ওককরিয়াতে নুয়া করে কিহান হারো
অইতৌথাং? কিহান পেইতৌতা? কিছাদে স্বর্গহানাং কাইতৌ তা?
ঔতাউ মাতৌরি বুলেতে আকখুরুম চেয়াআইংগা।

গিয়া চেরিগা থাংতে জালকে কইনা দামান ওককরানির জুং করেছে।—
“মি থাইতে কুংগই বহকর গিরিগ অছিগ? কিগরতা এপেই ডাঙর সায়া
কইনাং ওককরাং আহেছত্তা হেই খোরিতে।” কথা আরাকৌ নিয়াম অনির
আগে জালক অন্তর্ধান করল। তেই বহকরে নুয়া করে চেয়া পেলইলি। শাংহানে,
লক্ষণহানে লক্ষ্মীর স্বরূপিনীগ আছে। তেইর দুঃখ হাবি আকখুরুমে সিয়াও
করল। হারোহান থইল পথ নাপেয়া বতি দরিয়া, কাপক জিটেয়া পুতকরে
বহকরে কলকরিয়া গরে হমেইলি। লেরিক দেকুরা ঔগই “চালাও-অ চালাও-অ
রথ দেব দামোদরো”—বুলিয়া বাসেয়া আছেগ, নিরন্তর দেনারকা। ঔবাকা
তেই আয়া মাতল—‘অইলগা এরো বেনাই, অধ্যায়হান থুংকরানি মনেইলে
গরে গিয়া থুংকরগা। রাত্তি নুঙেই নংতল অইলতাউ না এরোরাইতাতে!’

মঙ্গলাচরণর কাম সংক্ষেপ করিয়া কোলিরি এগর আতেত্ত নিস্তার
পেইলা। অর্থ দেব ঔগ কালাসেনার লগে তাস খেললগ। ঔগরে মাতল—
“দেহর নাই! মরিল বাগে খোরা ঔগ নেই থাংতে পুতকর বিয়াহান বুলিয়া
কিহান শান্তি পেইতু। থাইতেউ জালেয়া পুড়িয়া গেলগা। মরিয়াও
পুতকর বিয়াহানতে নাদেগল, মোরেউ ঔনাপা ঔহান হিন দিল। অরতে
বিয়া এহান হাবির বারাম্বার মোর গঞ্জে বেলা দিয়া তাতে নুঙেই অয়া
শাশান হানাং গুমজিয়া আছেগা।”

অর্থ দেকুরা ঔগ আগেত্তৌ তেইরে ডর পারগ। আজি হেয়কর কথা
এতা মাতিয়া তেই বিলাপ করানি অকরল এহানাং উঙহানে ঠই মামি চয়য়া
মাতল—‘হাই’ চুম নাই।’ —ডরহানে কিহান মাতলতা তা নিজেও হবা করে
হার নাপেয়া আরাকৌ জিঙে উঙইল—‘কিহান চুমতা, করল চরিত্র এহান!
তিতে মাংতেই নাই, অকসাটে তাস খেললাই মানুনা!’

অর্থ দেকুরা ঔগ ডরহানে ফিট অয়াছে পড়তই পাউরি। মনে মনে

হরি নাম সলকরানি অকরল । হাজারো মাত হরি নামহানে মিছা অয়া
ঔনা নেই । কমলর মালক খাংতা নারগ আচানক কঙালা আহান
করিয়া মাতল—আজি এপেই বাত খেইছ । মরেছে হমল লকুরা ঔগতে
নেই নাই ।

তেইর নারগর নুংশিহান, কঙালাহান ইমে তেই বহকগ অয়া আহেছিলি
ঔবাকার ঔহান । অর্থ দেব ঔগ তেইর মেইথঙ হানাদে কুলকরে চেয়া থাইল ।

(১২৬৩)

সিকা ডে ই নি

মাংকলে খুটি চকি আহানাং বয়া হজক পিয়ের বাবাই খুড়াই হজক পিয়া পিয়া কিতা আহান খালকরের। কত আচুল দিতে ধুমা আহানি নাকরল ঔপেই উপারারিগ কারিয়া আচুল আহান দুহান দিয়া-মাতল উতলা আগ থছিলু ঔগউ কুরাং কিতা করলা কিগই জানে! গর এগৎ বার আহান বিসারেয়া পেইবে।

এথুরুম আচুলহান দিতে হবা অয়া ধুমা নিকুলিল। ছয়াং করে ডিগল আচুল আহান দিয়া ধুমা এরা দিল। মাদানহান অ ষারগা। কুর্—র্ কুর্ কুর—বুলিয়া জারল জারিং ডুবি আগ রাহর। মন এহান আপপানে কিতা আহান করের পারা। কিতা কিতা মাহেই নিংসিং অয়া আহের।

বইরাকর পারগ। আছি গর আটোগির খুড়তাকগ এরে বাবাই খুড়া। আর নিয়াম দিন নাথাইলগা, আছি গর আটোগিয়ো গাট হানে পারগ বাগিয়া পেটগৎ বরেইতই। গরগ সেচেয়া কুরাংতে নিতইগা। বাকি বেইবুনি ঔতার সাদে ছংকারগ ডাঙরগ নাগই। লাজপেইতে ডরপেইতে, উঙইতে, লুকেইতে জনম এহান গেলগা।

হজকারি পাহরিয়া থাইল। কতহান থায়া ঠুনিংসা আহান বেলল বাবাই খুড়াই। জিলক মেডেলে মাংকলহানর কোন আগ দখল করিয়া জিমকি আহান পাতেছে। সংসার ঔহানাং তেই আক্ খুলিগই গিরিগ, শোগ, হৌরিয়ক বহক হাবিতাও আছে। —‘সিকাডেইনি ধান বান চৌল টেক।’ কুরাংত সিকাডেইনি আগ পেয়া ঔগল খেলেইরি। —তিতে কুমবারারগ? এবারার না হৌবারার লেইকেইর সিকাডেইনি ঔ গরে আংকরিরি

তানুর গাঙ ঔহানাং লেইকেই দুহান লকেইয়ো দুহান। পাতাগ লকেই বার মুরালিগ লকেই। বইরাকর পারগৎ আছিল গাঙহান। বলীয়ে পাংকালে, ছননরে চিকারিয়ে মানু ঔতা নাঙ করেছিল। লকেই দিয়হানর মানুয়ে আকতার শাং আকতাই নাচেইলা। যেহানাংতো কুরুঙ করলা। আকতোরেল আকতাই এলা বানেইলা—মচিয়া মালপা মুরালি। হৌতাই অনাচার ঠারল উত্তর দিলা। টেমপাক উরা দিলা। নাইলে আরতাউ হবা হজক আছে। এহান আজিঙত নাগই মাওসাংতো

আছেহান ।

‘পাতাগ লকেয়ে টিনের মালঠেপ দিতাই ।’—ওতা বুলিয়া এতাই পো পেইলা । হাইহান নাগইহান ওহান পিছেকার হান । বুমাগ পড়িল পারা । —‘মরলেতে কিতাইল !’ বাত হাতচারা নাহেইলেতে কিতাইল । —আমিয়ো দেনা টিনের মালঠেপ ।’

‘হাটো — ।’ মাদানে হাবি তানুর শনর-মালঠেপ ঔগৎ তিলইলাগা । —পক্ষাইং কিহানতে করানি ।

—কিহানতে করানি বার ! টিনের মালঠেপ দেনা নাই আমিয়ো । আমিতে বয়া থাইতাং ।

—ষেঙ, পাতা খোরা ওতাই আমার আগে টিনের মালঠেপ দিতা ! আমি থায়াতে কিতা করতাঙ !

—য়া, তা ইসালপা, তিতে কিতা বুলিঙ বুলর ! চাউবতলদা দ হজ্জচারি পি !

—না না পি বাহা । মি ইসালপার কথাহান হনিং ।

—চাউবতলদাই ধান আটমল দিতেই ।

—গিরাজা তিনহে লই এন । দশমল ধান দিতো । ইসালপাইতে কিতা বুলর ।

কনুংসেনা ইসালপা বিয়া দুহান করেহেগ । হাদি এহান কনাক য়ারি জেলা আগ আনেছেগা গ । তা তলনি না মনেইল । —‘মিয়ো দশমল দিতো ।’

লালবেহারিয়ে হাদিং য়োঅইল । —বাসেই তুমিতে ইমে টিন লনার হিচাপ কররাই । কুকতে ?

—কুকতে আমার যুবকে নিককা গিয়া সিবরাজনর টেঙারাংত আনতাইগা নাই ! বনাক নাইলে চাম আনিয়ো ।

টিন লনা লেপইল । কনুংসেনা ইসালপার য়ারি জেলা মইলক ঔগর পুতক বাবাই খুড়া । এবাকাউ হাবিতা আহির মুহে দেহের পারা । মালঠেপ সাংকার দিন ওহান বার মুনির ইসালপা ডাকুলা প্রতাপগড়র ইসালপা, দুধপুরর দুয়ারল তিন পালা দিলা । হোতারে তিকজানেয়া সুবিবঘলা ফুটেইলা । হোবারার বৈষ্টেপো বারতন পেয়া আহেছিল । ওহানতে আজ কিয়াকা ।

—‘বাককা দিলাহে । মুরালি ঠাকুরার বংশই টিনর মালঠেপ দিলা ।

—কিগই জানে আমি উনি টিনর মালঠেপ দিতাঙাই বুলিয়া টটরাতি ।

— আমিতে হানতে নাদিয়া থাইতাং ?

এতাই মালঠেপ সাংকা করত, রাত্তি বাসাকা দিলা । খানিতে জিংতা নাই হোঁতারে । হোঁবারার দর ৩৮ বার্তন পেয়া আহেদিলা । কুমেই হানিল দ্বিগবারাতারো দ্বিগতারে ঠৈলাই কলা ।

পাতাগ লকেইর ঙাংবাতলে একাদশীর দিনে বইরাকেন্ত পলগল জাতেরা রো আগ ধরেছিল । ঔগব পরবার পিহনে বার বাত খাছিল ঔতাংত গাঙহানাং দলাদলি অকরেছিল । ঔ বছর ঔহান বাবাই খুড়া জরম অছেগ । খুড়া মিংকউ এহান কিসাদে পাছে ঔহানর ইতিহাস নেই । কিসাদে পাছেহান এবাকা আকগয়ে মাতে নুগারতারা ।

বাবাই খুড়াই এবাকাউ নিংসিং অর আকখুরুম অশেচে খরা করেছিল ঔনাকা রাত্তি বরন ডাকলা মূনির ফুতি পিদিয়া কেলন কিতা দরিয়া রাত্তি জেলেই এহান লখুকেদে গেলগা । বাবাই খুড়া যানারকা কাদল আরো মালকে যানা নাদিয়া গুম লওয়া দিয়া গেলগা । রাত্তি গুমর হাদিং খাংলগিয়া উঠিল । দুৱেইং এলা দিতারা—‘খঙর মাটি ছকেইল বরন দে বোৱাজা ।’ হপনর হাদিং ছনেছিল পারা এলা ঔহান ।

পূজাহান আহিল । ইমা গিখানকর পূজাহান । চাউবাতলদা গাছির পূজাহান । গরে বহানিরকা অছিল আরো সাকেনে মাতলা—‘কিয়ান্তে টিনর মালঠেপ দিলাং । আকখুরুম ঔতারে তিক জানেইক, চাউবাতলদা ।

লকেইহানর কুমারী নিঙলে পূজার পানি আনতেগা ফিজ়েং আকজাত পিদিয়া, আসাংপার আঙেই উরিয়া ডেল, করতাল ঝাল বাৱেয়া আনগা । দ্বিগবারাদে কুমেই চাকুরা মানুহান, জ়েংই মূনিগো, বুঝব মিয়ং বঙাল মেকহান অয়া পুলছিল ।

হোঁতার পূজা ঔহানাং কুমারীয়ে পানি আনতেগা এতাৱাংত ডাঙর জগরগ করিয়া পরলেই কুমেই আহান করলা । নিঙলশো হাবিয়ে ফুলরঙর ফিজ়েং পিদিয়া গেলগা । কনাক বাবাইয়ে ননীল উটেছি কাপক খেরি আহান আধাঙাদা খেয়া দাপদে চানাং গেলগা হোঁদাপাই জিংলাতানা কিতা ।

পূজাহান অকরলা । গিখানক ঘাটে বহিল । কুমারে দৌগ চোখদান

করলা । হিনচাপা ঔগরে নংসা ঔগই আতহানাং কামাডেয়া দরেহে ।
মটহানর গজে মহাদেবগ । দেবীয়ে কিগ খেইরি ঔহান রাহেরতা
তেই মাছুমাংস খেইলে ঔতাং সেপ বেলা দিতকরে ।

খেতিহান লয়হে । হাগহানর নীলুয়াবে চারিয়ে বারার লপুকর
কুমারী ধানে ছনার রইদহানর কাঠিসুরি পিদিয়া লিরি লিরি বোহানাং
নাছে নাছে পূজার পানি আনাং যিতারাংগা পায়া ।

বিস্মানত গইগ অকরতারা । বেলিটিকে প্রসাদ পানা । সেদাং
আরতি ফাংনা রাতি গাওন । বরর দিন ঐহান দুধপুররতা আরতি দেনাং আয়া
জেলেই এহান বাহুল অয়া পড়লা । মালকে মাতল দুধপুরে গুয়াগাহর
আগাং কৃকগ নিকুলেছিল । ঔহানে ঔপেই মানু নিয়াম বাহুল অইতারা
রাজনগরর রাজা জিপুতে খইর হৌ কমছে বুলিয়া আকদিন কোলি লাগেছিল ।
লেমপা রাজা আগ আহেছিল ঔগর পাণ্ডুরি ঔহান দেহিয়া কনাক বাবাই
মালকর কাদাং চেপছিলগা । বাগরাজনর ফেসকেলেই বুলিয়া শৌ-আগ-আহেছিল ।
ঔগ যেহানাতৌ কাদল যেগই মাংলেউ ঔগই কৃষ্ণর নাছা দেহয়েইল ।
এবাকাত্তে রাসদারিগ আছে । পল্লেইর বেপার করের । নিয়াম সরল বুজনগ ।
রাসবাগাদিয়া লংচাক ভার আহানল দহিনা করলৌ না নাবুলের । যত
লেইরাপা এতাই রাস মানস করতারা তা তারেল করতাঙাই বুলিয়া ।

তিনদিন এহান আহিগ জিপেইতে গেলগা । বিদায়র দিনহান আহিল ।
ইমা সালইলি । আহির পানির কুমেইল মঠ দ্বিয়হান বিসর্জন দিলা ।

মঠহান বইরাকে বিসর্জন দিলা আরো কনাক বাবাইয়ে কইদিন
খালকরল, তা ডাঙর নৌ আগং চড়িয়া পৃথিবী এহানর যেপেই পেয়া
গাট এহান গেছেগা ঔহান পেয়া গিয়া মঠহান বিসারেয়া আনিয়া বছরহান
হাবি গরে পূজা বহেইতই । তা দেহেছে সেন্দাং গাটহানর পারগং গুণটি
নৌ আয়া খেঙর । নৌউলি ঔতাই লেঙোর সেকতাইগং বাত রাদিয়া
খেইতারা । তাও মঠহান বিসারাং যিতেগা রাতি অইলে এসাদে
বিদেশ আহানাং গাটর পারে নৌগ খেঙকরিয়া বাত রাদিয়া খেইতইগা ।
ঠেকতইগা দেশ ঔতার নাঙ ইকরিয়া থইতই ।

উত্তরর টেঙারা ঔতা লালয়া হ দূরেয়েদে কৈলাস আছে বুলিয়া ইমাই
য়ারি দেছিলি । গিথানক কৈলাসেত্ত আয়া বার কৈলাসে যেইরিগা ।
সেন্দাং ঔগদেত্ত আইতারা পাহিয়া ঔতাই হারপা থাইবা । কৈলাসে

বহরহান হাবি পূজা বহের পাউরি।

ভাঙর অইল। সাজোবি...না থাক, ও কথা ওতা নিংসিং অয়া কানাহানতে কিহান। তেই দূরেই অইলি। কথা ওতাউ দূরেই অয়া মাঙকগা। মাঙক বুললেই মাঙর থাঙ! পাহুরিং বুলের মাহেই আরো জিঙে নিংসিং অর। পাতাগ লকেইর নিঙলগ। মালচ মানুর ধান বানলগ। হাদি হাদিং তানুর ধান বানাং আইলি। লগে সাজোবি। খনতিনা খুংতেই শৌ আহান পিদিয়া বেংকির সাঙগর কোন আগদে বয়া থাইলি। কনাক বাবায়ে তেইরে পঙিতল দেছিল ওতা নাহেয়া আতহানাং দরিয়া থছিলি। ওসাদে করতে করতে দ্বিগিয়ে খেলানি অকরলা। তানুর মুঙর ইঙ্কুল ওগৎ। য়েবাকাউ ওপেই খেলয়া থাইতারা। খেলাহানতে কিংতাউ নাগই। তা খাটলর পাতাল মইচ হংকরিয়া আল দরল। তেই বাতল ফাগি ফাগি লপুকে গেলিগা।

কনাকে দ্বিগই খেলতে সোণয়া হিলগল তেইর নিরালহানাং দেছিল বারি ওহানর দাগ ওহান এবাকাউ আছে। এরে কার্তিকে বেয়াপা মণ্ডনিং আইতে পেয়াও দাগ ওহান আছিল পারা। এবাকাতে হবা অয়া চলিবি। পুতক হুগ মেলেটারিং গেছিগা। ওতাই মাহান লেহে রূপা দিয়া পেঠেইতারা।

সাজোবিরো হিনচাপিগ নাই। বাবাই খুড়ারে বুকগৎ দেছিল খত ওহান এবাকাউ আছে পারা।

তেইরে কইদিনো গাছেত হেইনৌ ছিড়িয়া খোয়েইত।

এবাকাতে লেইকেই দ্বিগহানির বংশাবলীর গর আটগ শিচ্চিল আছে। এতারতা পাচগ। হোতা পাতাগ লকেইরতা।

গেলগা দিন ওতা বার আলথক অয়া আইতইতা! নাউ আইতই। কালর গর্ভৎ মাঙইল ওতারে স্মৃতিল বিসারেরা পানা।

আরাক আকখুরুম ঠুনিংস। বেলল বাবাই খুড়াই। হজকারি আতহানাং ডেছে। আরিগ থইল।

“অইমা! এঁ! এঁ! বাবা! মোর মোর সিকাডেইনিগ! এঁ! এঁ!—

পাতাগ লকেইর তনজাওসেনার দুই শৌ উঙলিয়ে খেলানিং অয়া কোন হেরগদে সেপ চেয়া মেডেলর সিকাডেইনিগল দাপদেছে। মেডেলে হাগে মাটিয়ে সুপকরাং লাগেছে।

‘হঃ! এহানতে কিহান এ। ইমে লাগবা ঔহান চেইতারা। আগেকার
খাচেলংতে কুরাং যিভগা।

তাউ সাজৌবির চের পাহিয়াগল দাপদেছিল ঔহান নিংশিং অইল।

(১৯৪৪)

উত্তরা

বসন্ত ! তি বিহান মাতরতা মোর কানে কানে । বসন্ত তি কিয়া
আহর ঐহান গানিক করে মাত । তোরে মি না পাহরেছ । মোর
উনিশহান কার্তিকর ইঙহানর মা লাগাদেছিলে জি ঔগ নানিঃবেছে । তোরে
মি জনম এহানাং গাবি এগং পাছগ ।

বিয়ার পিছেদে এরে নুয়া সংসার এনানাং মি তোরের আহেছ । কিসাদে
তোরে বেলিয়া আইতু । ঔহান কিসাদে আইতইতা । মোর মাঝেই এতাই
ঠইগর ডুকডুকানিং তোর উমহান । তোর জিগর ফাপগ । ঔ জিগং শান্তির
ইঙহান আয়া-চিক মাঠিয়া আহান দেবগা । ঔ মাঠিয়া ঔহানে মোর জিঙতা
অয়া খানার মন্তহান দেবহা ।

মোর সংসার এহানর আশ্রয়র হুদিং মি আছ মানুগ । তি তেরায়
বুজেছে হাগ এহানর তলে আছে পৃথিবী এহানর হিন হারো
নুঙেই নুংশি এতাংত দূরেই অয়া আছং বুলিয়া খালকরিয়া আছিলুগ ।
মোর গাবিগং তোর বানাহান মূর্তি পালর—হুদিগং তোর নিংসিংহান
মাঠিরেয়া যাবগা । এসাদে ক'র মোর জনম এহান মিতইগা বুলিয়া আছিলুগ ।

মোরে বিয়া করেছে ঔগ—বামনগ । বিদ্যা না তালকরেছে বামনগ
নাগাই । বারপুয়ার আগ নবদীপে গিয়া সাধুগ অছেগা, ঔপেই গিয়া লেরিক
তাম করিয়া আহেছে পণ্ডিতগ । গাঙহানাংতো, লয়াগতো, দেশে বিদেশে
তারে নিয়াম স্বাকরতারা । ঘোকাট লেরিক লেইসোল থার । দৌর
সেবাগ থার । গীতা ভাগবত দেনাং শ্রদ্ধ কীর্তনে বার্তন পেয়া যাবগা ।
গরগং মি জিঙতা লেরিক আহান আছ, এহানতে আকখুঝো পাকরিয়া
চানা নামনার । বিত্তরগ হংকরানি না মনার লেরিক এহানাং কিতা আহেতা ।
তারং উলুয়ে খাছি লেরিক ঔতা বসন্তই শাকরেছে ফুল এগংতো জিঙেছে ।

এরে মানু এগরাং দিয়া মোর মালক বাপকে নিয়াম হারো অছি ।
মি হারো অছ না নাছ ঔহানতে হারপানি না মতেইতারা । মোর হারো সারো
এতার মূল্য নেই তানুরাং ।

বসন্ত, তিতে ঔতা মোরে পাহরলে নুয়ারলেতা । তোর খতাংত হুনেছ
মোর শাত এহান কতি হবাতা ! তি মোর শাত এহানর প্রশংসা করিয়া

দেহিলে চিঠি ঔড়া এবাকা আর নেই। ইমাই বিসারেয়া পুড়িয়া বেলা দেছেগ।
নেয়রাও থাক ঔ চিঠি ঔতার মেয়েক আকগৌ না পাহরেছু বসন্ত। তোর
মেঘাল। দিনর লেহাও রঙ'র কথা ঔতাই ঠইগ সাঙকরিয়া থছে মোর।

বসন্ত! তি যেদিনেংত পুরি মোর গারি এগর রকত এতা দুঃখর মধুর
যন্ত্রণাল হজাক দিলে ঔদিনেংত সংসারর চারিবারাহান চেয়া মানু এতা চেয়া
হারপেইলু এতার দুঃখহান জনমহান থাইতই, হারোহান বাহিয়া যিতইগ।
ঔতাউ মি মিকুপর খুংতল ঔহান অনন্তহান খাঙ বুলিয়া বরমাগলু। তোরাঙ
মাতলু—মোরে না এরাদি। তি এহান কিহান করলেতা বসন্ত! তোর
সালেদে মি হাবি কলঙ্ক গারি এগং গছে পারলুইছ। মি বামনিগ অয়া
জনমহান খাঙ নাবুলেছু। মি বসন্তর আশীর্বাদ পাছু ফুলগ অয়া শাতনির খোঁরাঙল
বাসেয়া থাইলু আরো তি মোরে রুকর দৌ আগর খয়াহানাং থ দিয়
কুরাঙ গেলেগাতা মাত! মি তোরে নাপাহরেছু, না পাহরানির জ্বালাহান
খুংতল পাছুগ তোরাংত। তিতে মোরে পাহরিয়া হারো অয়া থাক বেনাই।
তোর খুংতল ঔহানেই মোর সাদে দুঃখই বুজেছে অমৃতর তলাগ।

রাতিহান আধার আছে। দূরেই হাগহানাং তেরা আগই হাবিৎত ভালয়া
মোরে চার। ঔগ তি খাঙ!

পণ্ডিত গিরকে কোণী আহান ইকরের। মি আকখুলিগ খাটালগং
ফামহানাং পড়িয়া আছু। তোর কথা খালকরুরি ঔবাকা তি আয়া ডাকলেগা
পারা। খাঙ লাগিয়া আহিগি মেলিয়া চেইতে তি আহি দিয়গি রকতর
সাদে রাঙা আছে। মুরগংত রকত পড়ের মেইখঙ হানাদে। আঙেইহান
রকতে বাহেছে। তোর এ অবস্থা এহান দেহিয়া চিকারি দিলু। কিয়া
চিকারি দিলু মাতে নুয়ারতো, ডর পেয়া নাগই। এহানতে কি অবস্থাহান
অছেতা তোরতা। মানুহানমাহেই পুলইলা। আকতাই মাততারা তিরাজারর
দৌগই দরেছেতা, আকতাই মাততারা নুয়ারাহান।

কিয়া আইলেতা তি? কিয়া এরে রূপ এহানল আইলেতা তি কিয়াকা
আইলেতা! কি কথাহান মাতানি মনেয়া! তি মোরে খাঙ দেনাং আইতেই
ঔহান হপনেদউ না নিংকরুরি। ঔ দিনৌ মি ডর নাপাছু। মনহানাং
পাংকাল আহান পেইলু, তি আছুং বুলিয়া।

ঔদিনেংত পুরি তি নিক্কা আহানি অকরলে। মানু সিনা আইবাতাই
আহর। মি আর তোরে দেখলে চিকারি নাহরি। মানু রাঙো নাবাগাউরি।

কাদার জেলা আগই অয়া রাহিরি । তেইবে মাতলু—‘নাউ রাহিহ । মি ডর নাপাউরি । আর কিংতাউ নাইতই ।’ সেদাহান অইবতাই আপপানে গারি এগ জিরিঙ করে । হারো আহানে অয়া আতহানাং দরের । আপপানে কুরাংত সিংগারেইর গং আহান আহের । গং ঔহান পেইমতাই হারপাউরি তি অহিলে ঔহান । তোর নিংসার ফাপ পাউরি, তোর পারার শব্দ ছনোরি । আহির পানিল তোর পথ ঔগ কঙালা করে দেনা মনাউরি । কিসাদে করলে আকখুলিগ অনা পারতো, আধারহানাং থা পারতো ঔহান বিসারাউরি । আকদিন দোর দারিগর পিঠিয়েদে আধারগং উবা অয়া আছু ঔপেই কাদার জেলা ঔগই মোরে বিসারেয়া পেইলগা । —‘হাঃ, মাইনু, এহানতে কিতা করোরিতা । এ অবস্থাং আকখুলিগ নাথাই, দোয়ে বাবেইতাই ।’ তেই মোরে খাটালগং আনিয়া ঘুমজা দিল । তেই কাদাং বয়া রাহিয়া থাইলি । দারিগর কোনগং তি বাসেয়া আছং পারা । খাংতা ছনোরি দুরেইং রেল আহান যারগা । তেইবে আংকরলু—কতি দুরেই থাং, রেল সড়কগতে ? তেই মাতল—‘এপেইতে কুরাঙকার রেল সড়ক ।’ —‘কুরাংততে রেলর শব্দহান পাউরিতা ?’

—‘আপপানেহান মাইনু ! তি আপপানে ছনোরিতা ! ঔহানলহে আকখুলিগ নাথাই বুলোরিতা নাই । তি বার মাততে নাছনোরি ।’ আরতা কিতা কিতা মাতল নাউ ছনলু—‘তি কানে কানে কিহান আহান মাতানি মনেইলে পারা । ছনানি মনেয়া কানহান হিঙারেয়া থায়াও ধরে নুয়ারলু । মাত, বসন্ত, কি কথাহান মাতানি মনারতা মাত ! মি পঞ্চপ্রাণ ঠই হাতগ দিয়া কথা ঔহানরকা বাসেয়া আছু । মাত ! মাত, মাত, ! মাত । —মাইনু কিতা করুরিতা । কিয়া আকখুলিগই টটরাউরিতা । হইমা ডর আহান লাগের । ঔসাদে লাল্লাদে চেয়া নাথাই ।’

বসন্ত ! যেদিনেংত পুরি ইমাই তোর মোর সম্পর্ক এহান হারপেয়া এইগারে বাগেইল ঔদিনেংত পুরি মোরে কিসাদে কায়াং ঠাচা করতাই এরে চিন্তা এহানল এইগাই ইমাই গুম বেললা । মি দোর দারিগর পিঠিয়েদে সরাদেছু ইনাফি ঔহানি আনাং গেছুগা । তি ঔপেই আইলে । ইমাই মোরে কিতারকা বিসারেয়া আইতে তোরে মোরে দেহে বেলল । ঔদিনেংত পুরি দুয়াং নিকুলানি, ইঙ্কুলে যানা বন্ধ অইল । সেন্দা আরতিং তি মালঠেপে আইলে ইমাই রাহিয়া থাইরি । এরে রাহানি এতার হাদিতো

আহিৰে আহিছে কথা অইল।

মোর বিজ্ঞাহান লেপইল। বিয়াৰ দিন ঔহান কিসাদে বিয়াহান
অইল মাতে নুয়াৰতো। কিসাদে আতহান বাদতে য়াকরলু। কিসাদে
হাত বুলা দিলু কিংতাউ মাতে নুয়াৰতো। মি না কাদেছু। বিয়া এহান
শ্মশান আহানাং অইল পাৰা। কারতাউ মেইথঙহানাং হারোহান নেই।
হানি উঙয়া কথা টটরতারা, মোরে কিসাদে আকসাদে চেইতারা।

হারপেইলেতে মিয়ো ঔদিন তোর লগে আইলুইছ। পাচর বাত খানাং
আয়া হনলু য়ারিহান। মূর বুলেয়া পড়েছিলু ঔদিন। পানি কিতা ডালিয়া
আলকরলা। ঔদিন পরিকার করে, পফকরে তোর নারগ, তোর ডাকহান
হুনিয়া চারিবারাহান চেইতে তি নেই। কুংগ আগই মাতলা—‘হনাঙ
অজ্জারে ডাকদেই। মাৰেই গাছি দরে দিৰতা। উঙহানে ডরহানে
অংগে না।’

ইমাই না না বুলিয়া হনাঙ অজ্জারে মরিয়া সিকদিয়া আনানি নাদল। হনাঙ
অজ্জা গাঙে মেইপারল করেৰগ। পেট আতদানি, মাৰেই চানা জানে।
ইমাই আনানি নাদলতা কিতারকা মিহে হারপাছু নাই।

দসু খেলতে তি মোর আতহানাং দরেছিলে দিন ঔহান তোর আঙুলিগির
ভাষাহান হারপেয়া মোর গারি এগ হাবি নিক্করল। মোর জনম এহানাং
আরাক নুয়া কথা য়োনেই ভাষা আহানল মোর গারি এগ হাবি হজাক
করেদিল। বসন্ত! ইচুদিন মি গুমে আছিলু—তি আয়া মোর গুমহান
বাগেদিয়া নুয়া পৃথিবী এহানর নুয়া রূপ আহান দেহুয়া দিলে। বিয়ান
ফুয়েইল আর দেহুরি হাগ এহান, মাটি এহান, ডাল এহান, পৃথিবী এহানর
তঙাল হারোপা রূপ আহান। এহানে কানে কানে আয়া মোরে নুয়া পো
আহান দেব। কুংগদে গবর কাম লইকরলু, কুংগদে দৌর বাত রাধলু,
কুংগদে কিতা করলু মাতে নুয়াৰতো। ইমাই মাতল—‘আইংতে কিয়া
অমাটিক হারো হারো অংগতা’? ঔ বিয়ান ঔহান, ঔ বেলিটিক ঔহান, ঔ মাদান
ঔহানর হাবিতা তঙাল অছিল। বেলিহানাং হপন আহান গহে দেছিল। পাৰা
চারিয় বারাদে খোরাঙ আহান দিনহান অয়া শাতছে।

বসন্ত! তোর দ্বিয় আতর কলকরাং মেইথঙহান নঙেয়া শাতছিলু
দিন ঔহান মোর লাজহান হারোহান দেহে থাইবে। তোর খুংতল হান
পেয়া মোর জনম এহান থমথম করিয়া শাতছিল ঔহান।

মি দিন ঔতা নাপাহরেছু । ঔতা নিংসিং অয়া আছু । ঔতাই তি
কিতা নিংসিং করে দেনাং, কিতা মাতাং আহরতা? আর কিতা খুংতল
দেনা মনারতা মোর জনম এহানাং । দেহং খুংতল ঔতারে মোর গারিগল,
রকতল ঔইগল রককরিয়া থছু । কইগইতে এসাদে পাহি! মিতে তোরাংত
ঠই আগ পাছু ।

মি আরাক আহান আচানক অয়া খালকরুরি! মি যেদিন যেতা
খানা মনাউরি ঔতা ঔদিন ঔহান আগই না আগই লেইফামহানাং কাংকরতায়া ।
ক্ষীর, হেইনৌ, আতাফল, যেদিন যেতা খানা মনেইতৌ দিন ঔহান আগই না
আগই কাংকরলা । মি হারপাছু এতা রাধামাধবে দেরতা নাগই । এতা
তোর খুংতল । তি মোরে দিয়রতা ।

আকদিন কতিতে চিকরখানা মনাছিলু বুললেতে । ঔদিন সেন্দাং
তোরে দেখলু । রাতি হপনেদে দেখলু তি চিকর দরিয়া আহেছং ।
পিছেকার দিন মিয়াং জেলা আগই চিকর বেছাং আহেছিলি । ঔদিন
ফামহানাং পড়িয়া কাদিয়া থাইলু দিন এহান । মিতে তোরে কিতা
দিতু । আহির পানিসিটা সিচ্চিল আছে মোরাং ।

বসন্ত! আমি দ্বিয়গির সম্পর্ক এহান ব্যর্থ অইতই ঔহান মনহানাং
হমেইল মোরতা আকদিন । সংসার এহান হারৌল হংকরেছিহান নাগই,
ছঃখল হংকরেছি সংসার এহান মানুষে জারে নুয়ারতাই বুলিয়া দৌয়ে ফুটা
আকেইগি অমৃত হাদি হাদিং সিটা দিতারাতা ।

বসন্ত! হাদি হাদিং তোরে পাহুরানি মনাউরি! আছু সংসার এহান
খাপিয়া থানা মনাউরি । পণ্ডিত গিরকর, দৌর সেবাল নুয়া জনম আহান
পানার সালেদে কাদৌরি । মি এপেই হারৌ অয়া আছু বুললে ইমাই
এইগাই কতি হারৌ অইতাইতা । ইমা এইগা মি তোমারে হারৌ করে
পারতো । আগেকার জনম ঔহান পাহুরতো । তুমি দেহ এগরাং
মি নুঙেই অয়া থাইতো । বসন্তরে কিয়া পাহুরে নুয়ারতোতা ।

পাহুরিংহে বুলৌরিতা ইমা, কিসাদে পাহুরতু মাত । কিসাদে পাহুরানি
য়াকরতইতা । তুমি তোমার এরে পাপিনী জিলক এগরে ঙাককরে দেই ।

হে পণ্ডিত গিরক! তিয়ৌ মোরে খানি চেপকর এনে । মি বসন্তরে
পাহুরিয়া তোরেস থাইঙ ।

কিসাদে পাহুরতু তোরে বসন্ত! গোপন বর্তি আগ লাগাদেছং বর্তি

এগ গারিগং আহিথম ঙালয়া আছে। আরবেদে চানার সুযোগ নাপাউরি।
চেইলৌ তি নায়্য কিংতাউ নাদেহরি।

বিয়ার আগে ইমাই মোরে রাহিয়া থইল। থইলেতে কিতা অইব
বামনর গরগ, মুঙহানাং মালঠেপগ। কুমেই কিতা অর। এইগাই দৌর
সেবা করানি লাগের। যজমানর কাম কিতাং ইমাই যৌঅনি লাগের।

ঔদিন রাসপুর্ণিমা। লেইসাঙর কাদার সিংগারেই জারে থাককারাগ
দিয়া সিংগারেই শাতছে। মালঠেপগং রাস করতারা। এইগারে মলপাক
আগ দিয়া ফাম আহান পারে দেছি। এইগা রাস চেয়া আছে। ইমাই খানি
রাস চেইরিগা, বার আয়া মোরে চেয়া যেইরিগা। রাধাগ নিকুললি ঔবাকা
ইমাই খানি রাধাগ চেয়া আইংগা বুলিয়া গেলিগা। ঔবাকা তি আয়া মোরে
ডাকলেগা পিঠির দারিগদে। মি হাতেক করে পিঠির দুয়ার হানাদে গেলুগা।
বসন্ত! ঔ দিনকার বানা ঔহানরে মি কিয়া বাধা দিতোতা। মি না
না বুলেছু। ঔদিন তিতে কাদেছিলে। মিতে না কাদেছু বসন্ত। কিয়া
কাদতোতা! মোর অন্তর এগই জানে, মি অন্তায় নাকরেছু। সমাজহানে
অন্তায় বুলকা, মিতে ঔহানরে অন্তায়হান নাবুলেছু। বানাহানে ডাঙরতা
না সমাজহানে ডাঙরতা। মি অপবাদ ডর নাপাউরি। তোরকা বুলিয়া
পেইতো অপবাদ ঔতা মোর অহঙ্কার।

ঔতার কতদিন পিছেদে মোর বিয়া। কিয়া তি পিয়ার দিন ঔহান রেলহানর
তলে পড়িয়া মরলেগাতা। কিয়া তি বিয়ার পিড়াহানাংত কাড়লয়া
নানলেগাতা মোরে। বিয়ার সভা ঔহানাংত কাড়লয়া নিলেগাহে তোরে
মি ক্ষেত্রিগ বুলিয়া য়াকরলুইছ নাই। তি বিয়ার দিন ঔহান থাইলেইছতাউ
তোরাং ফুলডাল বরা দিয়া স্বয়ম্বরাগ আইলুইছ।

রাসপুর্ণিয়ার দিন ঔহানাংত আর তি নেই। কুরাং মাঙছিলেগাতা।
মিতে, তি মোরে এরা দিয়া গেলেগা বুলিয়াহে বিয়া এহান য়াকরলুতা নাই।

বিয়ার দিন ঔহান আকগয়ো মোরে য়ারি এহান না বাগাছি। পাচর
বাত খানাং যিতেগা য়ারি এহান ছনলুতা। আলথক অনার ঔবাকা
বেলহানাং কাইতে কুংগ আগই মোর আতহানাং দরিয়া থছিল।

বঙানি সাঙানি আহের। মুর বুলার, যেবাকাউ যেপেয়ো পড়ানি আহের।
আকদিন খাংতা মি রেলর শব্দহান পেইলু। চারিবেদে সিংগারেইর
গংহানে গঙালাছে। এপেইতে কুরাংকার রেল, এবাকাতে কুরাংকার

সিংগারেই ! গারি এগ রমকাটা দিল । রেলর শব্দ এহান, সিংগারেইর গং
এহান তি আহিতেই পৌহান অয়া আহের । তি আহর বসন্ত ! আই, মি বাসেয়া
আছু । পঞ্চপ্রাণ, ঠই হাতোগ দিয়া বাসাউরি । মালঠেপগর পিঠির দারিগদ
সরাদেছু ফুতি ওতা আনাং যিতেগা সিনাহান পারা অইল ঔপেই, কানে কানে
অয়া কথা আহান মাতলে । কি কথাহান বসন্ত ! কিহান মাতানি মনারতা !
কথা উহান ছনানিরকা বাসেয়া থাইলু ।

আকদিন মাদানেংত সিংগারেইর গং পানা অকরলু । হারো আহানে
বুজিল মন এহান । গরর কামে মনহান না লাগের । আকগর কথাউ ছনানি
নাহের । মি কুংগ ! মি কিতা বুলিয়া এতা করোরিতা । বসন্ত আহিতেই ।
হাবিতা বেলেয়া তারে ওককরানি, তারকা বাসেয়া থানা । — আর মোর
কিংতাউ কাম নেই । হাতে হাতে মালঠেপগর কাদার সিংগারেই ওজারর
তলে গিয়া উবা অইলুগা । গাছজারে আকগো সিংগারেই নেয়ছে । খানি
থায় দেহরি সিংগারেইজার ফুলগই বুজছে । থাইতে থাইতে দেহরি
মালঠেপগং রাস আহান অর । ঔরে এইগা মলপাকগং ওয়া রাসহান চার ।
গোপীয়ে নাছতারা—নবরে, নবরে নব বৃন্দাবন ..

—মাইনু, এপেইতে কিতা করুরিতা । আরতি আহান কাংকরিক করে ।
এইগারে মাতেদিছ খানি বাসাক বুলিয়া । একাক্তা বাজারে গেলগা থাংতে .. ।

রাসহান কুংগদে মাউইলগা । কুরাং গেলগা হপনহান । বরাচাউবি বুড়িয়ে
কিহান মাতিরিতা উপ নুয়ারিয়া থাইলু । বসন্ত, সংসার এহানে মোরে তোরাংত
দূরেই করানি মনেইতারা । তোরে পানা নাদতারা । ওতাউ মি তোরাংত
দূরেই নাইতো । তিয়ে দূরেই নাছংহান জানু । হাদির মাম যুখাল এহান
আকদিনতে সেচতই নাই । মি কোনদিনতো যুখাল এহান সেচেয়া তোঁর কাদাং
আহিমগ । তি মোর গারিগং দেছং বানার চিন এহানরে রাহিয়া থাইতেগা
তোরাং আহে নুয়ারিয়া আছুতা । মি তোরাং আহে নুয়াকরি বুলিয়া তি মোরে
দূরেই নাউ করেছেং । সিংগারেইর গংহান অয়া মোরাং আহর নাই ।

রাতি বার সিংগারেইর গংহান খানি খানি পানা অকরলু । পণ্ডিত
গিরকরে আংকরলু—সিংগারেইর গং আহান পারতা । মালঠেপগর বারা
ওহানাংত আহের পারা ।

— ‘এবাকতে কুরাংকার সিংগারেই ! পাগল অইলে খাউ ।’ খানি
থায় গগরা চলইল ।

পণ্ডিত গিরক, তি শৌ এগরে নিজরগ বুলিয়া ষষ্ঠী করলে, গর সেংকরলে
এগরে সমাজহানাং মানহান পেইব পথগ করে দিলে। তোরে মি হমা
দিয়োরি। শৌ এগরে মানুগ করেদে।

আর মি সিংগারেইর গং নাপাউরি, বেলর শব্দ নাপাউরি। বসন্তই তার
দানহান দিয়া বেলা দিয়া গেলগা — এখুরম পণ্ডিত এইগার বানাল এগ ডাঙর
অক।

(১৯৬১)

কীৰ্ত্তি চানৱ সমসকীৰ্ত্তি

কীৰ্ত্তিচান সমসকীৰ্ত্তি তামকৰিয়া গৰে আহিল আৰ গৱৰ মানুৱে পঞ্চৱতন বাহুৰ আগ জ্বৰম দেখে চানকপালি গেই আগৰ সেলকম, অমৃত যোগ আহানাং চিপিয়া কালবেলা, সুতহিবুক কিতা লালইল আৰ ক্ষীৰ ৱাদিয়া, গাঙৰ শৌ বুজন, ইমাইন্দন হাবিৰে বাৰ্তা কৰিয়া খণ্ডাইল।

গাঙৰ মানুৱে পঞ্চৱতন বাহুৰ এগ ডাঙৰ অয়া বলভাগ অইলে আলদৱানি য়াকৱতইতা, গেইগ চানকপালিগ অইলেৱগায়ো হিং নেইগ থাংতে বের বাগিয়া গিৰি ঔতাৰ বোনানিয়া পেই আহান খা দেহিলি। বামন এগ ক্ষীৰ ৱাদানি নাজানে, মৱলি বুড়ি বামনি ঔগই ৱাদলে কিতা অইলইছ, — ঔতাৰ য়াৰি দিয়া দিয়া গৰে গেলাগা।

খইখোৱা লকেইৰ গোৱাচানৱে আকপাতাৰ গঞ্জে নাদেছি কানখি ঔহানে নিয়াম নুঙেই নায়া গৰে নাগিয়া বয়া থাইল। কতহান থায়া কীৰ্ত্তিচানৱে মাতল,—‘তিতে ঔতা সমসকীৰ্ত্তি তামকৱেছ বুলিয়া অহংকাৰ কৱৱতা। মাততা চেইক তোৱ গীতা ঔহান পাকৰিয়া কিতা কানা। গীতা এহানাং ভগবান এগই ইতাউ অৰ্জুনৱে মাতেছে কথা ঔতা লইল আৱতে লইল। নালয়াৱে পাৰ্থ অৰ্জুনে—লালকাম নাকৱতো, বুলিয়া য়ামবুং মহাৰাজাৱেল বনবাসে গেলেগা, তোৱ গীতা ঔহান লেমেদে না মাঙইলইছ। ভাৱতহানৱ ... তোৱে মাতিয়াও কিতা কৱতু। ভাৱতৱ মৰ্মহান তি কিতা হাৱপেইতেইতা।

কীৰ্ত্তিচানে কথাহান কাড়লয়া মাতল—বৰ বাগৱৰ ভাৱত দেকুৱাগ নাগই। এহানল না তোৱ জেড়তাক ঔগৱে মিয়াঙৰ ছনুল পানাখাকুৱা বুললাতা। তিতে গীতাহানৱ কিতা হাপাহং থাঙ-এ! এগ উনি গাঙৰ ভাৱত দেকুৱাগ।

দেখতে, খুলতু তোমাৰ বংশৱ এবাৱত হান। তোৱ মামাকে লেৱিক দিয়া পাহিল পইসা ঔতাল মাছ লয়া খাছিলগ নাগইতা।

—অ! দেখতে তোমাৱতাউ পুৱানহান পুৱেইতুগা! তোৱ পিয়াতাকে অনুবাচীং আল ধৱেছিলগ নাগইতা। তোৱ বপাক আঙমতলে কাঙৰ দিনে না হিনেয়া দৌগ ৱঙ কৱাং থেঙছিলগ নাগই!

তোমাৰ জাঙাক আগই হোৱকৱে আঙাছিল আৰ পৱাচিং কৱেছিল। ঔহানতে নিঃশিং নাৱ!

- বাসা বাসা ; তোর হালাকার য়ারি ওঁতাতে নাউ দিয়র ।
- তোর পিয়াকার উহানতে পাহরলেতা ! গেলতি ওঁ বছর ..
- এউলটা তোর খুড়তাকে...
- কিতার গীতা তামকরেছু বুসিয়া বড়াই কররতা !
- আচানকর ভারত দেকুরাগ নাগই !

এসাদে পণ্ডিতর তর্কল, শাস্ত্র, বেদ, পুরাণ, ভাগবত, প্রভাস খণ্ডর কথাল চিকারি মিকারি, লৌদানি করানি অইলা ওঁবাকা গাঙহান থক থক নিককরানি অকরল । গাঙর মানুয়ে পইলা খালকরলাতাই বইচাল দের । পিছেদে কথাহান হারপেয়া গাঙর মানু দ্বিদাপা অয়া সংকীর্তন দুহান নিকাললা । দ্বিয় দাপার কুংতাই আগে মালঠেপগ কালকরানি বুলতে তমাল সিঙর বাহাসপার ওঁপেই অকনা অয়া করতানল বারাগরি দিয়া গরে আলথক অয়া গেলগা । গাঙহান দ্বিকরংগ অইল ।

বরাচাউবা মুক্তিয়ারে কীর্তিচান গাছিয়াং সেকলমে কাপকে খেয়া খেয়া মাংল — 'গোরাচানরে বার্তন থিঙকরো । তা লেরিকদের ওঁহান মি আগইতে মাউসাংতো ঠিক নাপাউরিগ । মাংতো মাংতো বুলতে ... হজ্জকারি জুয়াং আছেক !

বাজারর হজ্জক খাম্বিরা বরাহিতা ডাঙর ডলা আগল গরে গেলগা । গোরাচান গাছিয়াং বয়া গিরিধন পাঞ্চাইতে মাতলতাই—'মি মাতিং বুললেতে কাফাম এহানাং কীর্তিচান সম্পূর্ণ লালছে । ভারত নিন্দা করেরতা । কতি ডাঙর পণ্ডিতগ অগেহেতা, এতাহে পণ্ডিত নাই ! তা পাঞ্জিহান চেয়া মাংতই দিন ওঁহানাং আমি একাদশী নাকরতাঙাই । — নাহ্, আর নাবহিং । কালীজিরার বীজগুলি বিসারাং পড়ছু থাংতে...

যি.তগা গোরাচানর মালকে । কালীজিরার বীজ কত কাঠি আকতা বাদে দিল ।

রামপ্রসাদে আমার ঠারল রামায়ণ এহান লেংকরেরতা । শৌর মালক ওঁগই মাতিরি — তোর এরে মাগনা কাম এতাল কিতা করতে । রুকমেশুরি আগর জুগালিগ অইলেগাইহতাউ খানি আহান কানা অইলইছ ।

দলাদলি এহান মেইকখুগ অয়া অইলা ওঁপেই তেই সু.যাগহান হারপেয়া মাতল — যাগ ! আকতারে চুম বুলগা, আকতারে লাল বুলগা । ওঁহান অইলে ষষ্ঠী কিতাং বার্তন পেইবেতা ।

রামপ্রসাদে হারপাছে গাঙ এহানাত্তেইর গজে সিং মানু নেই ।
ঔহানে তেই স্বেহান মাতিরি ঔহানর খানি গজে গজেদে করানি মনার ।
আকদিনৌ তেইর কথা মাটিং না বেলাছে ।

গরর সাখাংহান পেয়া রামপ্রসাদে কীর্তিচান গাছির মাংকলে গিয়া
অকরলগা

রাম লক্ষণ জাম্বুবান হাবি হমা দেউরি ।

সীতার চরণ হানি

বুলিয়া হেকগ আচুলতে কীর্তিচানর মালকে মাংল—মাতামবালা গুমাজ
যারগা শৌগ, উঠব চেইছ-এ ।

ঔতা কিতা না বদিয়া রামপ্রসাদে এলাহান খুঙকরানি ভাল করিয়া দিল

সীতার চরণহানি চেংকরে দরৌরি ॥

রামপ্রভু স্বরাংগ আমার কীর্তিচান ।

আমার গাঙহান অযোধ্যা, কীর্তিচানে দিল মান ॥

কালুয়েই বুড়ি ঔগই 'ভালো ভালো' বুলিয়া স্নেহাম ছিড়াং গেলিগা ।

গৌরাচান গাছির দলরতাই ছনিয়া মাংলা—'এগতে না সুপৌ মানুগ
নাছে' ।

কালুয়েই বুড়ি ঔগই ভাল বুলল খাংতে হারৌহানে গৌরাচান গাছির
বেংকির সাঙগং গিয়া অকরলগা

রাম অবতার গৌরাচান বাবার কতিয়ৌ স্মারি দিতু ॥

তার তবৎ লক্ষার মানুহান অইতারা বিছু তিতু ॥

কীর্তিচানর খুড়তাক সিলটচাউবার স্মারি এহান ছনিয়া মাংল—আর
রামপ্রসাদরে এগদে আহানি নাদিয় । ঔতা আমি লক্ষার মানু অইলাঙতা
তারাত্ত !

দ্বিগবারারতায়ো দলেংত নিকলা দিলা লাজ ঔহানে দিন এহান
বিলগর পারে বয়া সেন্দার পরে গরে আইতে গরর ঔগই মাংল— 'গরে না
হমেই । হিকেইলুতাই আহান, করলে গাতাই আরাক আহান । মি এগর
কপাল এহান কতিয়ৌ থিয়া গেছেগাতাক !

এখুরুমতে গাঙহানাং দ্বিদিনে একাদশী, দ্বিদিনে কাঙ, দ্বিদিনে বিষু ।
আকতাই একাদশী করলে আরাক আকতাই দিন ঔহান মাচর গং নিকালতারা ।
আকতাই লাংবইচিঙে আল না দরতারা, আরাক আকতাই দিন ঔহান ডিলকরে

আলহান এরা দিতারা। দল আহানে বেজিহান থাইতে থাইতে দৌর
থংবেই দিতারা। আরাক দল আহানে দিতারাতাই আধার অম্মা হদেইলে।

গাঙহানাং আছিল। বামন দ্বিয় বেইবুনিরমা জেঠা ঔগ গেলগাতাই কীর্তিচান
গাছির দলে। খুলা গাঞ্জা পিয়ের ঔগ গৌরাচান গাছির দলহানরে যজার।

খেচুরির পালি এহান মাউসাংতো নৌদিন অর। গৌরাচান গাছিরতাই
দশদিন করানি বুলিয়া লেপকরলা। য়ারিহান হুনিয়া কীর্তিচান গাছির
দলরতাই মাতলা—‘দশমী দশাং পড়লাতানাই। দৌর কাম জুরে করানি
গম নেই। বেজুরেহে করতারা থাংতে।’

কীর্তিচান গাছিয়ে সাতদিনে ষষ্ঠী করানি বুলিয়া লেপইলা। হোঁতাই
মাংলা—‘আকসাটে গর সেঙইতে ষষ্ঠী করকা বেনাই।

এসাদে করতে করতে নি এহান খুতি থিয়য়া অইলা। কথা এতা
নাগই গদে মানা অকরল!’

গৌরাচান গাছির গেই আগ জরম দেছেতা। ঔগর সেলকম চর করৌরি
বুলতেগা কীর্তিচান গাছির তামফারে সৌদিয়া হিং বিদা দিয়া মহা পরলেই।
গৌরাচানর খুড়তাকর পুতক নিতাই চানে মাতল—‘অইতই নাই। গোরুগইতে
কিতা দল বেদল নাচিনিরি থাঙ! কৃষ্ণই উহানলহে কনাক এহান হাবিতা
বেলেয়া গোরু রাহাং গেলগা নাই। কিয়াতে মইচতে না রাহেহেগা।’

কতদিন থায়া কীর্তিচান গাছির দলর বিদ্যাসাগর গাছির মইচ লাবা
আগই ফিঙয়া গিয়া গৌরাচান গাছির দলর গোপাল ইসাং ঔগর বের বাগিয়া
অলিহান সানে দিয়া, মানু তাল করিয়া গেলগা। কীর্তিচানর পিয়াতাক কাতি-
কচানে মাতল ‘পশুগ বুলিয়া হেলা নাকরিয়। তারাতৌ ধর্মহান আছে। গীতা
নিন্দা করতারা ওতারে মইচগই পেয়া না এরাদের। যম রাজার বাহনগ না!’

এসাদে করে দলাদলি এহান নিয়াম বেদারা অনা অকরল। আকদিন
গৌরাচান গাছির দলর ধনেমানুয়ে কীর্তিচান গাছির ঔবারার গাহেংত
বেলিটিকে মাংকেই চরকরাং গেছেগাতা। কাইং বুলতে কালাদৌ আগই
থাঙ দিয়া তালকরিয়া গুবাটহান লালকরে দিল। ধনেমানু থতাদে কলপুক
নিকালেয়া তাপ উঠিয়া পড়িল। মেইপা আনিয়া, আজিরাং করিয়া,
পাহাংপার চাপাল দিয়া চুলর আগাদে জিংতা করলা। কীর্তিচানে
মাংল—দেখলাইতা! ভূতগ অইলেতে কিতা অইব, গীতানিন্দা করলে কিতা
করের ওহান দেখলাইতা! এগ কালাদৌগ নাগই পাউরি!

আমার বুড়া ঔগই দলাদলি অছি এহান হারপেয়া স্বর্গন্ত আমারে পাংকরানিরকা আহেছেতা।

কীর্তিচান গাছির বলদেব আকদিন বাজারেতে আইতে খঙহানর শয়তানগই বুলেয়া রাতি এহান লাকনা দিল। এগদে বাজারর মানুগরে খুচিদরাই নেছিগা বুলিয়া কাদা রহা, ডাহা ডাহি, লৌদা লৌদি, চিকারি মিকারি, বিসারা বিসিরি অয়া মহা পরলেই আহান।

গৌরাচানে মাংল—‘দেখলাইতা ভারত এহান কতিরগাই সেইখাংহান অগেহেগাতা। কলিহান বুলিয়া তি কিহান ঠাচা নাকরবে! আগদে এগরে শয়তানে বুলেইতে নাঙছিলাইতা! এগ নাই হাবিৎত জিঙে ভারত নিন্দা করেবগ! এগই না আমার ডেহিগ কুররে দেছিলগাতা।’

এবারার দৌয়ে হোতার গরেদে রাতি হিল উরা দিতারা। হোবারার দৌয়ে রাতি সাঙেৎত এতার গুরু এরা দিতারা। আর বয়া থানা নাইল। গাঙর মানুয়ে বিচার এহান পরগনাং বেললা। পরগনার মানুয়ে নুয়ারলা ঔপেই যুবকে মাংলা—বিচারহান আমি নিলাংগা। চান্দা আহান তুলেই।

রূপা এগারহান সিকিরে ধান দিকটি আধাই চান্দা উঠিল ঔতা নন্দ-বাবুর আতে থইলা। নন্দবাবুয়ে ঔতাল মামাকর গরে গেলগা।

যেগদে কহুতারা ঔগদে বেরা লাগের। কিসাদে হবানেই খেলতাম হানাং অকরেছি নিহান কিগই জানে।

বরাচাউবা মুক্তিয়ারে মাতল—মিতে আগেৎতো মাংলুগ এতা যুবকর কাম নাগৈ। শাস্তর কোলিং যুবক হমানি এহানতে হবাহান থাং। শাস্তর য়ারিং য়ৌয়ইতেগা দশকর্ম সুয়নি লাগের।

গিরিধন পাঞ্চাইতে গৌরাচান গাছিরাং বয়া লৌদানি অকরল—‘যেহানাতো যুবক আকতা পাছি। কিয়া, বুজন নেই থাঙ! তোমার এহানতে বুজন ঠানা না করানিহান। আমিতে তোমারাং মানু নাইলাং, নাগইতা! তোমার চান্দা ঔহানি মোরাং থনা নাকরেছিলতা! মি আগইতে তোমার এতা ঠিক নাপাউরি’।

দলাদলি এহান দিনে দিনে বেসেপ অয়া আহের। মানু গুরু, কুকুর মেকুর, ভূত পেরেত, গাছ বিরুক পেয়া য়ৌঅইলা। মানুয়েতে বিশ্বাসৌ নাকরতাই, গাছ বিরুকৌ নিএহানাং য়ৌঅইলা এহান। কীর্তিচান গাছির অজা জারর ভেঙ আগ চরকরিয়া হৌ দলর আগই বনুকর ভাটা আগ দিল

ঔগ দ্বিদিনো নাগেলগা। এবারার দলর আগই হৌবারার মাইসেনার গুয়ার চারা কতজার চরকরিয়া গাতেয়া থছিল ঔতা আপ্পানে বিনা আহান লাগিয়া মরিয়া গেলগা।

অইতে অইতে দলাদলি এহান নিংসাহানর সাদে, বাত কামড়হানর সাদে অইল। খেইতে, বইতে আটতে গুমজিতে দলাদলির স্মারি। এহান আর মীমাংসা অইব করে বিশ্বাস নেই।

এসাদে থাইতে থাইতে বাঘ আগ নিকুলিল। আজিও কিতা উজানেদে মইচ আগ মাঝেছে, কালিও কিতা লামুনিয়াদে গোরু আগ আচুলিয়া নেছেগা। পোরুও কিতা বের ফারিয়া মানু আগ কামড়াছে। এ গাঙেতে আজি পেয়াও নাহেছে। অইতেতে কই দিন! হবিয়ে মাতলা এগ হেতে মেতে বাঘগ নাগই। এগ মানু বাঘগ। আকতাই মাতলা—এগ জিরিৎত আহেছেগ; আকতাই মাতলা এগ ভানুগাছেতে এরা দেহিগ।

গৌরাচানে দলর মানুরে মাংল—আমারেতে সেকো নুয়ারতই। ভারত এহান সুন্দর হান থাঙ! ভারতহানাং আছেতা—যুধিষ্ঠির, ভীম, অর্জুন গাছি বাঘ অকনা অছি বুলিয়া? জনম এহান শণেবনে বুললাগা মানু। ভীমে কত কত হিনচাপা এহান মারল থাঙো বাঘর লগেতে উনা নাহে।

বেয়কর পুতক নিমাইচানে ‘ভালো ভালো’ বুলিয়া কাদিয়া প্রেম করল।

কীর্তিচানে মাংল—যেগয়ো যেতাউ মাতকা, গীতাহানে হাবির গজরহান। আমি গীতাহান স্মারিয়ার থাংতে আমারে কিংতাউ নাকরতই। লাহুলে ডর নাপেয়ো, কিমকুর্বত সঞ্জল—কিতা করে বেলতই থাঙ!

দ্বিয় দলর মানুয়ো হাই বুলিয়াতে স্মারলা, ডরহানতে নাগেলগা। মানু এৰাকা আর সিনা অয়া না আটতারা। রাতিউতি দলাদলির স্মারিল ডিলকুরা নেয়ইলা। সেন্দাহান অইবতাই দুয়ার গটিয়া গরে থাইতারা। পথেগাটে বাজারে ইমে মানু বাঘ এগর স্মারি। কুমপেই বাত রাদিরি নুয়া কইনা আগরে আচুলিয়া নেছেগা, কুমপেই গুরুরকলে গুরুগ বাদৌরি বুলতে মানু বাঘ এগ বাদিয়া খামড় খাছে, এসাদে হায়ে নায়ে স্মারিল মানু এহান হায় হায় করানি অকরলা। দলাদলির স্মারি পাহুরলা। গাঙে রাতি হিল উড়েইলা দৌ দুক ভূত পেরেত হাবি দাবদিলা।

এবাকাতে মানুয়ে য়েগ দেখলৌ মানু বাঘগ বুলিয়া ডর পেইতারা।

সিনাহান করে গোরু মইচ দেখলো মানুষাঘগ বুলিয়া খাঙ লাগতারা।
আর দলাদলির য়ারি নেয়ইল। গীতা, ভারত হাবি পাছরলা, রাতি দুয়াং
নিকুলানি ডর পেইতারা, গরে থানাউ ডরপেইতারা বের ফারিয়া মানু বাঘগ
হমেইতই বুলিয়া।

দিন আহান গররতা হাবি গুমজিলাগা আর রামপ্রসাদে রামায়ণ এহান
অরারতা—

রাম লক্ষ্মণ দুগ নাগই হুতুমেতে আকগ।

অযোধ্যাং জরম অছিল রাবণ রাজার মানু বা-ঘ-গ ॥

বুলিয়া সুরগ আচুলিয়া চিকারিহান পারা করে দিতে তেই গুমর হাদিং
খাঙ লাগিয়া—‘হইমা মানু বাঘগ, মেইল, গরে বিতরে হমাছে, নিলগা, জিংতা
করো’—বুলিয়া চিকারি দেনা অকরল।

তেইর চিকারিগং রামপ্রসাদে খালকরলতাই বেরহান ফারিয়া মানু
বাঘগ হমাছে। —‘বাঘগ, বাঘগ, কুংগ কুরাঙ আছোতা জিংতা করো।
মানুগ আচুলিয়া নেয়গা’—বুলিয়া লৌদিনি অকরল।

গাঙর মানু এবারাউ হারনেই, হোবারাউ হার নেই বাঘগ বাঘগ
বুলিয়া চিকারি দেনা অকরল। মিয়াঙ বাঙাল হাবি হজাক অইলা।
আকতাই টিন বারেইতারা, আকতাই লোকরতারা, আকতাই জির লুককা
লাগেয়া দা বানুক বল্লম জাঠা য়েগই য়েতা পাছি ঔতা দরিয়া নিকুললা।
এতা কিতা ছনিয়া রামপ্রসাদ আরাকৌ উঙরা কাদের, তেই রামপ্রসাদরে
দরিয়া কাদিরি—শোণিয়ে তানু দিয়গিরে দরিয়। চিকারি দিতারা।

ইলৌ পাল্লো এতার হাদিং এবারারতাই মাততারা হোবারার দলর
তারে মানু বাঘগই ধরেছে। হোবারারতাই মাততারা এতারে ধরেছে।
লয়ইতেগা হারপেইলা রামপ্রসাদরে বাঘগই দরেছেতা। দিয়বারারতায়ো মাতলা
বাঘ এগই দরলগা মানু ঔগ চেই। গীতাহানো নাকরের ভারতহানো
নাকরের ঔগরে চেয়া বাঘগই খেইলতাহে। কলিহান বুলিয়া তি কিতা

নাকরতেইতা!

বিয়ানহান ফুয়েইল আরো দেখতারা কারতাউ কিংতাউ নাছে।
দ্বিয়দলরতায়ো নিয়াম নুঙেই নাইলা হোতারে মানু বাঘগই না দরেছে
বুলিয়া।

যেতাউ অক ঔদিন দ্বিয়দাপাই তিলয়া সংকীর্তন আহান দিয়া

দলাদলিহান বাগলা । কিয়া বুললেতে গীতাহানো হাইহান, ভারতহানো
হাইহান । দলাদলি করানি মনারাই বুললে আরতাল করেনে । এতাল
দলাদলি করানি গমনেই । ওহানেহে বাঘর হইপং পড়িল নাই ।

দলাদলি এহান লয়ইল আরো আকদিন আতলে মাতের—‘আমার নি-
ওহানে নুঙেই অছিল । এবাকাতে করিল কাম আহান নেই, দিল ঝারি
আহান নেই, কতি হিনো গেছেগাতা !’

(১২৮২)

পিতা স্বর্গ

নুংলিপা ইউ আহানাং গুমহান বাগিল রাজেনরতা। কার্তিকর ধুম
বিয়ান আহানর ঙালহান বেরহান বার চালহানর হাদিয়েদে আয়া
হমাছে। রাজেন আহিগি মেলিয়া পইলা ঔহানতে দরে নুয়ারল কুমপেই
আছে ঔহান। মিকুপ আহান থায়া নিংসিং অইল এগ তার বাপকর
ভিটাং। তা জরম আছে ফামহান। খালকরল এপেই তার আইনর
অধিকার আছে। এগ তার নিজের গরগ। কতহান খালকরিয়াও এগ
তার নিজর গরগ বুলিয়া নিংকরে নুয়ারল মনহানাংত। তঙাল হারো
আহান না লাগিল। ঠইগর কোনগং আছে যা ঔহান এবাকাউ না
হুকেছে। আগেকার সাদে দুংখ নাদলেউ—নিংসিং করে দেব।

এবাকা কয়টা বাজেছেতা! তা ঙালল উঠেরগ নাগই। সাতটা কিতাং
উঠিয়া হিনেয়া ফুতি পিদিয়া সালয়া হাসপাতালে যিত্তেগা সাড়ে আটটা।
গাড়ি আহান লইলে ত আরাক আধাঘণ্টা আহান ফামহানাং থা পারতই।
নাহ্! নারসিং হোমগং খানি মনোযোগ নাদলে নাইল। মারুতি আহান
যেসাদৌ লনা। ইচুদিন বিয়ানেদে নুয়ারা নাচেইল। এখুক্রমতে দশগ
পারা আকতা বিয়ানে চানা অকরতই।

ঙালহানে মাতেরতা ছয়টা বাজে থাইব। ঔতার গজে নাইতই।
খেতি বারি নেই পরহান থাঙতে লপুকর শব্দল সময়হান হারপানিরো
উপায় নেই। টেবিলহানাংত ঘড়িগ আসুলদিয়া চানা ঔহান আটেল আহান
লাগিল। থায়াও থাক। সময়হান হারপেয়াও কিতা অইত। হাসপাতালে
যানা নেই। কাম নেই। মনেইতই ঔবাকা উঠলে লয়ইল নাই। দিনহান
ফামহানাং পড়িয়া থাইলেউ মাতকুরা নেই। উঠলে দাত দারানি আহিতই,
চা কাপ আহান পিনা আহিতই। সেঙয়া হিনেয়া করিয়া কাপ আহান চা
দিত্তে কতি ডিলকরতাই কিগই জানে! রাজেন মুকসি আহান দিল—চা
দিত্তাই নেই, সেলকম পি বুলতাই নেই। সেলকম দিলেতে মেইলা নাই।
ইচুদিন পিহেদে গোরুর সেলকম পিয়া পারতইতা! ঔতার সারুক এসাদে
পড়িয়া থানাই বালা।

মালক নেই বনক নেই কুংগ আগ কিগই জানে উঠানহান হুরতারা

খর খরিয়া আহানল। বুজন আগই খানি দুরেইংত ডাহিয়া মাতল—তরুলতা! হুনামানুতে আজি থাইতইগ!

হুনামানু রাজেনর কনাকর নাঙহান। তরুলতা না খুমকরিয়া থাইলি।

—কিয়াতে কালুয়েইগ অইলেতাতে! তোমার ডাক্তর ঔগ আজি থাইতইগ?

তরুলতা অর্থাৎ রাজেনর আনৌগ বনকে নুঙেই নায়। খুমকরল—‘দাদা আজি নাউ যিতইগা, বুড়া থুংপা!

—কিয়াতে নুঙেই নাইলেতাতে! শূল এহান এতাহাবি ডাক্তর মেইপা এহান দেহুয়েইতো বালা নার থাংতে, -তুমিহো আংকরলে ডাক্তর সারাই সানাহান।

—হবা করে আংকরবে নাই।

রাজেনে হারপেইল তারে লেইকরিয়া মাতল ঔহানরকা বনক নুঙেই নাইলিতা।

—“হাই তানুরকা আহেদেছেগনা! ইমেতে মিলেঙহান পেয়াও নাদের ঔগই আজিতে তার ঠেকাহান পড়িল থাংতে—” তরুলতাই গুজুরে গুজুরে উঠানহান ছরিরি।

—‘জনমহান নুয়ারা চেলয়া খার গাঞ্জা পিয়েকুরা ঔগর কথাল নুঙেই নাইলেতা। চালক করে লইকরিয়া হিনেয়া আইগা। তোর দাদা উঠলে চাহা রাদিয়া দিবেতা। শৌ আগ পেইলে সুধীরর দোকানেংত বিস্কুট খানি আনুয়েইমতা, চেইহতা।’

—অনিলরে ডাক আহান দিবে নাই।

—পানা ঔহান নাই! চেইং ঔতা!

যেতাউ অক। উঠলে চা কাপ আহান দিতাই। সেলকম পি নাবুলতাই। আজিতে কিসাদে করলে হিন নাপেইব ঔহান খালকরতার। মালক জিলকে তার সেবা যত্নরকা বিয়ানত গইগ অছি।

এবাকাংত উঠিয়াতে কিতা করত। আরাক আকখুরুম গুমজানির চেফা আহান করল। কতহান আহিগি জিপেয়াও আর গুমহান নাহিল। খাংতা আহানি আহিল তারতা। কনাকে এরে বানা এহান পেইলে তা ডাক্তরগ অনা নুয়ারলইছ পাউরি। অসহায় শৌগ বুলিয়া তারে দিলা দুংখ ঔতা নিংসিং অইলে এবাকাতে সৌঅনি নাউ আহের। আজি তারকা

মালক জিনকে খালকরে দিতারা এহানরকা হারো অনাউ নাহের।

ক্লাশ সেভেনে তামকরতে মালক মরলি। মালকরে সেবা করিয়া গরে আহিল উবাকাংত হারপেইল গর এগং তারতা আকগো নেয়ইলা ঔহান। কতিহান আকখুলাগ কতিহান অসহায়। এবাকা কারাং আয়া য়ারি দিতই। কারাং গিয়া কাদতইগা, কার লেইসি করতই। তারকা খালকরেকুরা আগ নেই, কাদকুরাগ নেই।

জিংতা অয়া থাইতে মালক ফামহানাং পড়িয়া আছিলি। তাহে মালকর সেবা করল। অইলৌ সংসার এহান হাবি মালকময় অয়া আছিল। এবাকাতে চারিয়বারা উদালা। ইমা বুলিয়া ডাহিল মানু আগ নেই। কুংগো নেই, কুরাঙো নেই।

মালক জিংতা অয়া থাইতেংত বাপকরে গরে নাদেহেছে। মালকর সেবা যত্ন, মালক জ্বর অইলে রাজার পুতক ঔগরে ডাহানি। মালকরকা দুকগাছ, গাছর বাকল, বেঙুলর পহন বিসারানি, দুহানি, খলগং উটিয়া খোয়ানি, মালকে কাদলে ঠেমকরানি, মালকরে দুয়াং নেনা, ইন্ধুলে যানা। যে হাবি কামো মালকর সালেদে।

রাজনগরর রাজার পুতক আগ এপেই হোরিয়রর গরে থায়া মেইপারল করল। কবিরাজী, খুললেই, বনালি, হোমিওপ্যাথি, হাবিতাউ করে কৌণ্ডি চেয়া দশার কামো করিয়া জরি কিতা দিলগ। তা মালকরে নিয়াম যত্ন করিয়া চেয়া হজক কিতা দিল। মালকে কাদলে মাতল—‘মদলেই, সুপ না খালকরি, মোর বিদ্যা এতা ছনা মানুরে হিকা দিতৌ। বিদ্যা আহান গরিগং থাইলে আর চিন্তা নেই। নাঙ করতইগনা! বুদ্ধিহানর চৌহাংহানে, শিঙহানে, শৌগুলি ঠিকপেইলুক! ডাঙর অইতইগ না।

রাজার পুতক ঔগর কথাহান ফলিল। আজি রাজেন হুংতুমেউ মেইপাগ আছে। রাজার পুতক ঔগরাং না হিকিয়া ইমে মেডিকেল কলেজে তামকরেছে ঔহান নাই।

খালকরতে খালকরতে কুরাংত কুরাং যারগা চিন্তা এতা। মালক মরলি আয়া বাপকরে দেখতে দুঃখ পাছেগ বুলিয়া হারপানির উপায় নেই। হজক শিয়া শিয়া, ফাক ফাক আহে আহে থাইল। রাজনে খালকরল মালক মরলি এহানরকা বাপক বিতর বিতরেদে হারো আছে অউহান লুকা নুয়ারিয়া প্রকাশ অরতা।

শ্রদ্ধ হান লয়ইলতাই গরর হাবি কামহানি গঞ্জে পড়িল। আলে যানা, ধান বানানি, বাত রাদানি, ফুতি দনা, হাবি কাম করিয়াও সুপ কাম নেয়ইল পারা। মালকর লেইসি ওতা হাবি তার কাম। এতা আকতাউ তার কাম নাগই। ওতাউ তা কাম করানি আটেল নাপার। মালক নেই, বনক আগ নেই—কুংগইতে কাম করতাই !

হাবিত্ত দুঃখহানতে যেহানাতো বাপকে গালার। লাহলে কিলার। কিলানি ওতাউ হবাই নাগই। লাগেছে টিকিগ গজহানাং বেলা দেৱ, মুরগং বারার, অহিগ লাক করিয়া চাপাড়ার, দাহানল উরাদেৱ। পুতকরে কিলানি নাগই—মারানি, নাইলে আতুরগ করিয়া থনা। রাজেনে বিসারেয়া নাপেইল কিহানরকা বাপকে তারে এমাটিক দেহে নুয়ারেরতা ! বাপকরে দেখবতাই উঙইল। কিসাদে করলে বাপকর মুঙে নাপড়তই ওহানরকা লুকা লুকা থার। খালকরিয়া নাপার কিহানাং বাপকরাং লালরতা।

কাদার থরসেনা মইয়ে মাতিরি—‘হিনচাপা এগই তোৱে খেদানি মনেয়া অছেগ না ! জেলা ওগেৱে আনাবগাতারকা ! তি আমারাং আয়া লুকেয়া থাইছ। মিতে বেকুগ থাং ! তোৱ মালকে মিয়ে নিয়াম কাদা কুটুমহান এনা, !

পরীক্ষাহান লেহে ফাস্ট অইল শো এগই ইস্কুলে যানা বন্ধ অইল। ইস্কুলে যিবগাতাই বাপকে দা দরের ! ইস্কুলেত্ত ডাহিয়া আনিয়া বনে দিয়া পেঠার। গৱে লেরিক চেইব ওহানো লেরিকহানি বিসারেয়া নাপার।

ইস্কুলে প্রতাপগড়র অজা আগ আছিল, অঙ্কই বিজ্ঞানে বাগা দিলগ ! হাবিয়ে বানুকর ডাটগ বুললা। তারে ডর নাপেইবা ছাত্র নেই। আকদিন বানুকর ডাট অজাই পথে দেহিয়া তারে ডাকল। অহ ! আজি কপালে গালি খানাহান আছেতাকো ! ডরপা ডরপা কাদাং গিয়া হমাদিলগ। পিঠিহান বুকুরগ পড়তইক।

অজাই মাংল—চরিত্রহীন মনুষ্য পশ্বাধম। পশু বুললে পশুরে অপমান করানি অর। তোৱ বাপক পশুগ নাগই নরকর কীটগ অনারো যোগ্যগ নাগই ! এসাদে পুতক আগ পেয়া... পুতরভুগরে চরিত্রহীনা আগরকা... তি কাম আহান করিছ যেব কা সময় পেইতেই ওবাকা মোরাং আয়া তামকরিছহা ! মি হাবিত্তা বাগা দিতো ! এসাদে ব্রেইন মি নাদেহেছ। হবা সুযোগ পেইলেইহেতে...তোৱ বাপক এগই মণিগ নাচিনল থাংতে...পড়া

বন্ধ না করিহ...নাইলেতে কিস খেইতেই...নিরুপায়রতা বিস্তাহানে উপায়
তোর বাপকে ঔগ “সাক্ষাৎ পশু পুচ্ছবিষাগহীনঃ ।”

ঔবাকা আরাক অচানক আহান অইল। মালকরে হপন দেখবতাই
বিপদ আহান পড়িল! বাপকে সাক্ষতি করে কিলেইতই, নাইলে যেতাউ
আহান। আকদিন হপনেদে মালকে আয়া মুরগ মাঠিয়া দিল। পিছেকার
দিন বাপকে দিল বাকুরি ঔহানাং তাপ উঠিয়া পড়িল। থরসেনা মইয়ে
গরে নিয়া রাজার পুতক ঔগরে ডাকদিল। রাজার পুতক ঔগই আয়া
মাংল—হজকতে দিয়োরি নাই। আরাক হজক আকতা বাগাদিং, সংসার
এহানাং বাকুরি খেয়া জারে নুয়ারলে জিংতা অয়া থানা নুয়ারতেই। এতার
লগে যুদ্ধ করিয়া জিঙে পারলেহে পৃথিবীহান তোরহান অইত নাই।

থরসেনা মইয়ে মাংল—‘এতা আপপানে কিলারত নাগই, জেলা ঔগই ‘তোর
পুতকরে খেললে তোরাং গর পাংতো বুলেহে থাংতে ঔতা পুতকরে খেদেরতা!
আকুখালা সংসারহানাংত খেদানি মনাহেতা। বাগরর জেলাগ নাগই,
ঔগর সালেদে এরে হুনাগ পারা শৌ এগরে হুংখ দেৱতা। পাপ বইতইএ।

রাজেনরে হজক খোয়েয়া, কান্হাহান হবা করে উয়া দিয়া, খেরিগং থৌ
ফুটি তপ্তা করিয়া গছেদে গছেদে মাংল—বাসা গিরক, তোরেও লেমেদে না
এরা দুিতৌ বাসা।’

গাঙে মুক্তিয়ারি করিরি জেলা আগ আছে। হাবিয়ে ইমাসিজা বুলিয়া
ডাকলা। ঔগই আয়া উঠানে উবা অয়া চিকারি দিয়া মাতানি অকরল—
‘সেনাতল, তি জেলা ঔগর সালেদে পুতক এগরে এমাটিক হুংখ দিয়রতা।
লাজ নাপারতা! ঔসাদে জেলেইর গজে সেপচারিঔ না বেলা দিয়ার।
ঔগরকা তি এতাপারা তামফাগ পারা পুতক এগরে মারতে করে অহংতা।
দেখতে, এববাকারগাই থানাং গিয়া দারগাপুলিগ আনতুগা। ফাটক খাটানি
মনাছংতা! মোরেতে হারপাছং নাই, আরাক আকথুরুমরে শৌ এগরাং
আতে ফাঙইলেতে কথা হবা নাইব। মরতেই। যাগা এববাকারগাই শৌগ
আনগা। মি থাইতে। বার হারপেইছ; শৌ এগরে হুংখ দিলেতে তি জেলা ঔগ
নাপেইতেই। ফুলর লগে দাবহুয়া দিতৌ।’ দুলিপকগর থতাং ছুন্ দেনাহান
পারা অইল। রাজেনর বাপকে পুতকরে ডাহিয়া আনলগা। ইমাসিজা
উঠানহানাং বাসেয়া আছে। —‘এসাদে মুনি শৌ আগ মানুয়ে দুর্গাপূজা
মানস করিয়াও নাপেইতারা। পাবেলেয়া ঔতা আকর গরা কাকে চড়েহংতা!

য়ারি ঔতা এবাকাউ আহিগং বাহের। আজি আকেইহান আকেইহান করে নিংসিং অর।

প্যাকেটগংত সিগারেট আগ নিকালেয়া লাগেইল। রাজেনর আনৌগ মালেক—‘মাংল, তরুলতা তোর দাদা হজাক অইলএ, চালাক কর। হিনেয়া চাহা ফুটি বহেয়া তরুলতাই কাৰে খাঙ ডাহিয়া মাংল,—‘ইমাইমা, তোমারতা সেলকম চিপলাতা? ফুটি আহান দেই এনে। দাদারকা চাহা রাদেদিক করে। আনার তাতে গোয়ালগ আইতে আইতে ঔরে হাংকা।’

এবাকা উঠানি নাহের! উঠিয়াউ কিতা করত। এসাদে ফামহানাং পড়িয়া থানা এহানে নুঙেই আছে।

বিতরর দুয়ারহানাদে মালক হমেইলি।—‘মেইথঙ দনারকা তপ্তাপানি দিতু? এবাকা উঠতেইগ?’

রাজেনে খালকরিয়া নাপেইল কিহান করানি থকইবতা। আনৌগ অইলৌ মালক নাই, গুরুজনগ। তেইরে দেহিয়া সিগ্রেটগ লুকানি থকর পাউরি। নাই লুকেইল। গাঙগরে মালকর মুঙে বিড়ি পিতারা। থরসেনা মইয়ে পুতকরকা হজক লাগা দিল।

রাজেনে মালকর মেইথঙহানাদে চেরা থাইল। চুল কতগাছ দলা আছে। মেইথঙহানাং খচ পড়েছে হেইরাপ! গালগিয়েদে মাছালি! নাইলেতে আরতা হাবি ইমে আপেকার মাদে আছে। রাজেনের বাপকরেল তিনহান ফাম লালছেগ। নাই। শাতহান অমাটিক হবা নাইলেউ, সাকতি লাগই। চামহানৌ দলা।

এসাদে চানা এহান গম মা থাইব! হাজার অইলৌ বাপকে বিয়া করেছেগ, মালকগ থকইরি।

—না এবাকাংত নাউ উঠিং। খানি থায়া উঠতৌ।

—হাই বাবা! নাউ উঠি। এবাকাংত উঠিয়াউ কিতা করতে! আরাক গুম আহান দে।

মালক নিকুলিয়া গেলিগা। আজিতে বাবা জুনা বুলিয়া ডাহিরি। কনাকে করল ঔহান নিংসিং অইল।

বাপকে তেইরে আনানির পিছেদে গরগ নরকগ অইল তারকা। চিকারি মিকারি কোলি গালি সুপ জিরন নেই—‘আইংত কিতা ফুল আহেছিলতা?’ —‘ফুলর লগে কিতা যারি দিলেতা?’

—তোরাং মি হাত বুল দিয়া, ফুলডাল বরা দিয়া আহেহুগ খাঙ, এমাটিক চিকারি দিয়রতাতে! কুরাংত পার পো এতা!

—পাউরি, পাউরি। মাতেকুরা আছি।

—ওতা পুতকরে থছংতা মালক রাহালি করানিরক।

এথুরুমতে গরে থানাহান চিলৈল। আনোগ মালকে গুজুরা গুজুরিতে নাকরিরি, ইমে বাতর হাদিং লেঙো ছালি, হোরমা নুনগ মাছেই। গুমজিতেগা দেহের ফামহান তিঙিয়া আছে। থরসেনা মইয়ে য়ারি ছনিয়া মাংল—‘সিঙইছ। পানি পিতে আগে ফুটা আগ জুহানাং দিয়া চেইছ। ছ দিতে ঠাচা নেই জেলাগ।’

ইমা সিজার ডরে বাপকে ইঙ্কুলে দিয়া পেঠানি অকরেছিলগ, এবাকাতে ওহানো বন্ধ অনাং পড়িল। ইঙ্কুলর পরে কাম নিকুলর। বাত নাহা নাহা থার! হারপেইলে থরসেনা মইয়ে নিয়া বাত খোয়েইল। ওহান হারপেইলো ছি আগ; ‘—ওতা আনোগ মালকরে চেলঠা করেরতা নাই।’

আকদিন বাপক গরে আহিল অ রো মাতল—‘এমাদেরে অইলেতে মি থানা নুয়ারতো। তোর পুতকরে বাবুগ হংকরানি মনারতা না, টাউনে নিয়া থগা। তার লেইসি, তোর লেইসি হাবিতা মি আকখুলিগই করে নুয়ারতো। তোর পুতকরে থানি পাংকরক বুল বেনাই। আরতা তামকরিয়াতে কিতা করত, এথুরুম গিরন্তি করক। ওহানো হিকানি থকর।’

রাজেনরতা ইঙ্কুল তামকরানিহান আকুবারকা লয়ইল! এমাটিক হিনপেয়া হুংখ পেয়াও রাজেন না কাদেহে। মালক মরতে কাদে নুয়ারেছে। এথুরুমতে আহির পানি বেলেয়া কাদের। আকদিন বানুকর ভাট অজারে দেহিয়া লুকেয়া থাইলগা। অজা দূরেই অইলগাতাই কাদানি অকরলা অজার ছাতি ওন দূরেইংত রংখা রংখা করে দেহের।

থরসেনা মইয়ে বার ইমা সিজারে মাতেছেগা পাউরি। ইমা সিজা খাংচেং বাড়িয়া কোলি লাগাং আইলি। উঠানে উবা অয়া লোদিয়া চিকারি দেনা অকরল—‘তুমি কররাই এহান কিহান! পাপ বইতারাইয়ে! ভস্ম অইতারাই। মালক নেই শো এগরে দিয়রাই হুংখ ওতাই নায়া লেরিকউ একয়েইলাইতা!’

—‘আমিতে যাগাহে বুলিয়ারগ। তাহে থানি নাকরিয়া এগদে হোংদে লুকেয়া থারগা।’

—হাই, এগ ইক্ষুল ডরপেয়া লুকেইতই শোণ না! বহরহান লেহে পরথম অয়া পাশ করিয়া বৃত্তি পার ছাত্রগ।

— মালকরে নিংশিং অয়া কাদে কাদে থায়া...

— ইক্ষুলে যানি নাদরাই আর কাদেরতা নাই।

চক্ষরা দুগ মেইকথুগ অয়া জম হংকরতারা। কনাকে এহান হাবি গুমজিয়া থাইলে মালক মাংল—‘গমনেই। বেলিহানে অয়া তোরে ফামহানাং না দেহক। বিয়ানে না উঠতারা উতারে বেলি রাজাই দেহে নুয়ারের, হার নাপাছং খাঙ।

মালকে কথাহান লেহে এলা দিল, য়ারি দিল তা পাকরল পদ্য উতা মুখস্থ করিয়া তারে হুয়েইল। য়েবাকাউ নামতা আংকরল। মালকর সালেদে তা পড়াং হবা অছিলতা। মালক হৌ দিনর পাঠশালা পাশ করেছেগ। মালকরং হিকানি এহান কতি নুঙেই অছিলতা কনাকে।

তা লেরিকে বইবতাই আনৌগ মালকে লেইসি খেইল। ফুল আইলে যেসাদৌ কাম আহানল দুরেই করে দিয়া পেঠরা মাতল—‘যাগা, মাতলু কাম এহানি লই করিয়া দেল্দার পরে আহিছ।’ কিয়াকা কিগই জানে এবাকাউ ফুলরে নিংশিং অয়া আছে। কথা মাততে পিচুম দ্বিয়গি জুড়া লাগিল। আহিগি খানি পিঙালা, নাকগ উচ, চুয়েইহান চহা, মেইথঙহান ডিগালা। বাপক গরে নাখাইবতাই আহিল।

আকদিন ফুল আহিলতাই আনৌগ মালকে তারে লেইসিল দিয়া পেঠেইল। তা মইরাং গাছির পিঠিয়েদে গিয়া বয়া থাইলগা। বেলিহান হমা য়ারগা। বাহা সপার হাদিয়েদে মিঙালহান খানি অয়া পড়েছে। মালকরে নিংশিং অয়া ঔগদে চেয়া আছে। চেইতে চেইতে দেহের মালক উবা অয়া আছে দুরেই অয়া। ‘ইমা’—বুলিয়া কাদাং গিয়া চার থাংতে কিংতাউ নেই। ঙালহানে হেয়াগই অছেতা। খানি কাদিয়া গরে আলথক অয়া আহিল। গরে হমেইতেগা খাঙ লাগিয়া ফুল নিকুলিয়া গেলগা। আনৌগ মালক পিঠির দুয়ার হানাদে নিকুলিয়া গেলগা।

ঔদিন রাতি বাত খেইতে বাতর হাদিং ছটি আগ পেইল। ছরকাং সোনামুখি ছটিগ। গিললেতে মরিল অইছ। উঙহানে ডরহানে—বাত নাহেয়া গুমজিলগা। রাতিহান গুম নাহিল। কারে মাংতগা, কারাং যিতগা! বিয়ান ফুয়ানির আগ ঔহানাং কালা চিঙখেইর পরে উঠিয়া—থরসেনা মইরে

গিয়া উঠেইলগা। তেই মাংল,—‘আর গরে নাথাই। এখুরুমতে তোরে মারতাই। এহানাং নাইল মাহেইতে ছ দিতাই।’ তেইরাংত পইসা খানি লয়া থরসেনা মইর জাঙাক আগ শিলঙে পুলিশর কাম করল ঔপেই দাবদিয়া গেলগা।

আনৌগ মালক বার হমেইলি—‘বাবা, আহেহুং বুলেলেতে তরুলতার গারিগো খানি চাদিছ। কিতারকা গারি এগ না হরতেরতা! এবাকাউ বিয়া নায়্যা থাইলি।’

আজিতে ডাক্তার আগ; আনৌগ অইলৌ পুতকগ নাই। ঔগরাং সাহায্য মাগিরি। রাজেনে মাংল—হাই, চা দিতৌ।

—তোর বাপকরৌ হজক কিতা দিহ, আইলে বুলেলেতে। অছে সলহানে।

এরে বাপক এগরৌ হজক দেনাং পড়েহেতা রাজেনে। মরলৌ দুঃখ নেই থাইলৌ কিহানল হারৌ অইত! মালকর ফুলহান নেনাং আহেহেতা হপন দেহিয়া। নাইলে জনমে না পাবা দিতৌ বুলিয়া আহিলগ।

হাতে হাতে রইদহান পড়িল মাংকল হানাং। রাজেনে উঠিয়া ব্রাশগং পেইন্ট লাগেয়া উঠানে নিকুলিল। মালকে খুচেইগল পানি আনে দিল। আজিতে ডর পেইলতা কিংতাউ নেই, ছ নাদতই।

কুকাল করিয়া হদেইল আর চাহাই বিন্ধুটে দিলা ঔতা পিয়ের। মাংকলে চকি আহান দিয়া ঔহানাং তরুলতাই বাপকরে আনিয়া বহাদিল। দাত দারা দিল, মেইথঙহান পুছে দিল। সেবা যত্ন করিরি। রাজেন কুপ করে তরুলতারে চেয়া থাইল। তারতাতে বাপকগ বুলিয়া সুপকরেউ বানাহান নাহের। কোন অনুভূতি আহান নেই। হাসপাতালে আহেহে নুয়ারা আগরে যেসাদে চার এসাদে করে চেইল। এগ তার বাপকগ থাং! না ইমে নাচিনেছে পেশেটগ, হাসপাতালে গররতাই দরিয়া আনেছিগ। সেবা করিরি ঔগ পেশেটগর জিলক। এখুরুম তরুলতারে চেইল হববা করে। বাপকরে কিতা মাতিরি ঔবাকা পিচুমগি জুড়া লাগের। আহিগি পিঙালা, নাকগ উচ, চুয়েইহান চহা, মেইথঙহান ডিগালা। কতি ফুল মালহেতা।

জিলকে বাপকর যত্ন করিরি হবা ঔহান চেয়া থাইতে থাইতে বেরয়া সিগারেট আগ লাগেইল রাজেনে।

(১৯৯৩)

[স্টেশনর প্র্যাটফর্মগ। সুটকেশগ ধরিয়। মৌ আগ হমেইলি। তেইরে দেখলে হারপেয়ার ডাক্তার, ইঞ্জিনিয়ার নাইলে ডাঙর অফিসার আগরাং থুঙেগ। শৌর মালকগ অনাঙ য়াকরের। তেই সুটকেশগ থয়া চারিয়বারা চেইল। বেক্স আহান আছে ঔহানাং বইলি। কুংগ আগ তেইর পিঠিয়েদে আহের সাং, তেইরে দেখল সাং বুলিয়া খাং লাগে লাগে চেইরি। লেমপালহানর বাগগংত কুমালহান নিকালেয়া খানি বৌদিল। বিবুলা অয়া ইলাফির চুটিংল খোনাগর ঘাম পুছল। উঠিয়া চারিয়বারা চেইল। বার বইলি। বার উঠিয়া গিয়া চেয়া আইলিগ। নিয়াম উভেজিত আছে। বয়া জিরানিহান পারা অয়া]

অসম্ভব। আর না! এবাকা আয়া কাদলেউ না। ঔজাত কাদানি দেহেছু। মি তোর কাদানি, অনুরোধ, মুকসি ঔতাল গলতৌগ নাগই। [ঘড়িগ চেইল] গলিয়াতে চেইলু নাই ইচুদিন।

ট্রেইনহানতে কইটাং খাং? মানু নেয়ছি পারাতাতে! বইলু ফাম এহানতে আয়া নাউ দেখতই। যিংগ। ট্রেইনর টাইমহান আংকরিয়া টিকেট কিতাল আইংগ।

[গেলিগ। গিয়া সি নমা পত্রিকা আহানল আয়া বইলি] এহানল মেইখংহান গুরলেতে আর দেখতইতা! নাউ দেখতই। অতিরিক্ত আইলতানা। নিয়াম আকইলতা। মোরতাউ মন আহান আছে হারোপিয়ম আহান আছে নাই। আর কতি সহ্য করতু। এখুরুমতে য়েগই য়েতাউ মাতকা, আর না। [পত্রিকাহান সুটকেশগর গজে বেল। তেই পত্রিকা ঔহানাদে নাউ আছে] মি হবা নেইগ, হবা নায়াউ থাইং। তি হবাগ, ডাঙর অফিসারগ, তিহে হবা আয়া থাক। প্লিজ। মোরে আকখুলিগ থানা দে। প্লিজ প্লিজ। মি গেলেনা তি নাউ মরতেই। মিউ না মরতো। [পত্রিকা ঔহান দরিয়া পাতাখানি উলটেইল। ঔগদেতে নাউ আছে] নিংসিংতে অয়া থাইছ, এরে দিলু পারা এহান আর আলথক নাইন্তই। নো, ইটস ওয়ানস ফর অল। বার আরাকো আহান হারপেয়া থইছ, মি

তো'র হুনা, রূপা আকতাও নানেছু। এতা হাবি মো'র মালক বাপকে
 দেহিতা। এতা মো'রতা। তো'রাং এ জনমে দন না মাগতো। তো'র
 জয়েন্ট আকউন্ট'র রূপা ওতাউ সুপ না সকইতো। তো'রেতে এরা দিয়া
 আহানি, তো'র লগেতে সম্পর্ক নাখনি বার তো'র দয়া, তো'র কৃপাতে লনা।
 নো, নেভার। পিছেদে ওতাল খুটা কারতে করে। না, না, তো'র রূপাউ
 না, তো'র সংসার হানো না; তো'র শৌ জিপুতো না। মুন মুনিয়া হাবিরেতে
 এরা দিয়া আহে পারলু বার তো'র কৃপাতে সকইতু। থাকা, মুন মুনিয়া
 তো'রাং থাকা। চেইতো মালকগ নায়া কিসাদে তানুরে উমহান দিয়রতা।
 তানুর কপালে যেহান আছে ওহান অইতই। চেইক, মি নায়া কিসাদে
 তি তানুরে ডাঙর করবতা।

[পত্রিকা ওহান পাকরানিরকা লইল, পাতা উলটেয়া]

তি না মো'রাংত জিঙে মুন, মুনিয়া'রে বানা পেইতেইতা। তো'র অফিস,
 ফাইল, পারটি, টুর ওতাল খাইতো নারগাই। তো'র সংসার এহান কুংগই
 চলেয়া থেহেগ! আকখুক্রম উলটিয়া চা দেহিলেতা! কিহান কিতা আংকরেছি-
 লেতা। এরে ম, যেগরে তি মানুগ করে না গগর ওগইহে সংসার এহান
 হাবি দরিয়া থদেছু নাই। ওহানতে আকদিন নিংসিং অছিলেতা। মো'র
 নিহান দেহেছিলেতা! বানার কথা আহান দেহিলেতা।

থাক! ওতা আর মাতিয়া কানা নেই। এবাকা হারপেইতেই গিরক।
 বার মো'রাং আয়া কাদিয়া আত জুড় করতেই, মাপ মাগতেই। [মুকসি
 দিয়া] একটিং করতেই। ওতা একটিংল আরতারে বুলেইলেউ মো'রেতে
 নুয়ারতেই। ওহানতে হারপেয়া থইছ।

প্লিজ, মো'রাং তো'র অভিনয় ওতা নাদেহেই। যাগা তো'র মিস
 শর্মা'রাং ওতা দেহায়া। তেইহে ওতা দেহিয়া বুলক। তেই নুয়া দেহিরিগ।
 মিতে দেখতে দেখতে বুজন অইলুগ। আই হ্যাভ এনাফ অব ইট।
 [পত্রিকা'হান খুলিয়া চেইল বার বন্ধ করল]

তি এসাদেগ এহান মানু'য়েতে বিশ্বাস নাউ করতাই। কতি হবা
 অফিসারগ, কতি ভদ্র, এ পারফেক্ট জেন্টলম্যান। ওগই এসাদে
 করের বুললে মো'রেহে লাল বুলতাই। অভিনয় ওহান দেহিয়া মানু মুঞ্চ
 অইতাই! মিওতে অছিলু। আকদিন মিও তো'রে হবাগ বুলিয়া নিংকরেছিলু।
 খাইতে খাইতে চিনলু। এবাকা তো'র আগল রূপ ওহান দেহিয়া

হারপেইলু। এখুরুম তোর মিস শর্মাই তোরে হারপাক। [গিরেয়া] কতি এফিসিয়েন্ট, কতি কাম জানেতা, স্টাইল জানেতা। এহানো মিস শর্মা, হোহানো মিস শর্মা। দিনহানাং মিকুপ আহানো মিস শর্মার নাঙ ওহান পাহর এনে।

আমিতে কতিয়ো অক নাছিতা তোরাং! আনবেগানাই তোর মিস শর্মা ওগরে! সাজহান দেহিয়া মুগ্ধ অছং, লিপস্টিকর রঙহান দেহিয়া বিভুলা অছং, রুজ দেহিয়া গলেছং। আসল মিস শর্মা হবা করে চিনবেতা, আনবেগা নাই!

আমিও মানু বুলানি জানি। দিনহান সাজিয়া থাইলে তোর মিস শর্মা অপরূপা ওগ আমার জাঙর নখর কুনি আগর লগেউ মাননা নাইতৈ।

তোরেউ, কি মানুগ কিগৈ জানে। ওগরে দেহিয়া বুলেছং ওহান না! চি! ওহান তোর রুচিহান! এমাটিক বিদ্বান গুণীবান মানু এগই! হোয়াট এ শেইম। কারে কিতা বুলতে! [ঘড়িগ চেইল, পত্রিকা ওহানল খানি বোদিল, পাতা আহান উলটেয়া চেইল, ব্যাগগত টিকেটহান নিকালেয়া চেয়া বার থইল]

আহানতে হারপেয়া থইছ। মি সিন্দুরতে না পুহতো। তোরে ডাইভোর্স নাদতো। মি কোর্টে নাযেইতোগা। মোরে ডাইভোর্স করে পারলেতে জিংতাহে অর। বাট, নো। তোরে ফুর্তির সুযোগ দেনারকা মি সংসারহান বেলেয়া, মুন মুনিয়ারে এরা দিয়া যাউরিগাতা নাগৈ। মি নাথাইলে পেইতেই হিন ওহান আহিল দেহিং বুলিয়া। হারপেইলেতা! [আহিয়া] আশা না মিটতৈ তোরতা। যেহান খালকরেছং ওহান নাইতই। মিও কমগ নাগই। তোরে আকুবালা এরা দিয়া যাউরিগাতা আপপানে নাগই। [ডাটিয়া] হারপেইলে! মি তোরে এরা দিয়া যাউরিগাতা কুমেই চানারকা। ডাইভোর্সতে না। তি কোর্টে গেলেগা মানুয়ে তোরল আহিতাই, বন্দাবনহান প্রকাশ অইতই, কৃষ্ণলীলাহান তোর কলিগ হাবিয়ে দেগতাই। তিহে লাজপেইতেই, মি নাগৈ। ওহান হারপেয়া থইছ। [বইলি, ঘড়িগ চেইল] ট্রেহনহান লেইট অছেতা না কিতা! সাড়ে চারিটা। মুনতে চারিটাং আহেরগ। মুনিয়া সাড়ে চারিটাং আহিবি। আয়া কিতা করে থাইবাতা! মোরে বিহারা থাইবা! কুংগই খানারতা দিতাইতা! এহ! দিন এহান নাহেয়া আহি শৌগিক। এতারে তোর মিস শর্মা ওগই যত্ন

করতইতা? চেইতো। মুন! মুনিয়া! না কাদিয়ো, মোরে না বিহারেয়ো।
 অজিৎত পুরি মি তোমারে এরা দিয়া যাউরিগা। থানাহানতে নাইল নাই।
 তুমিহে নুঙেই অয়া, পুনচি অয়া পালয়া থাই। [হকগল] মি যিংগা।
 তোমার বাপকরাং তুমি থাই। মোরে পাছরিয়ো। [আহির পানি পুছলো]
 মোরে এসাদে দুখে দিয়া তিতে গিরক নুঙেইপার বাত খেইতেই ওহানতে না
 নিংকরিহক। হারো অয়া থাইতেই বুলিয়া আশা না করিহ। মোরে দুখে
 দিয়া, মোর শৌগিরে মালকরাংত খেইকরিয়া, তি ফুতি করিয়া থাইতেইতা!
 নো, নেভার! নাইতই! [ঘড়িগ চেইল] অফিসেংত আহে থাইব। এখুরু
 মতে! চেইক কিসাদে সেবাদাসীগই তোর সেবা করতারাতা! চেইক।
 বিহারা গিরক, বিহার। শৌরাং আংকর। হাবিরেউ আংকর। নাপেই-
 তেই। মি জনমকারকা তোরে ছাড়িয়া যাউরিগা। চা. বিসারানে কতি
 বিসারারতা! এঁয়া! এখুরুম মুটকেশগ নেইহানাং হারপেইলেতা, মি তোরে
 বেলিয়া যাউরিগা ওহান! কিহানতে করতে। [খানি আহিয়া] কিহানতে
 করতে! থাক, তোর সংসারহানল তি থাক। গরগ বুজে কামর মানু আহি
 ওতাই তোরে চেইতাই! মি আকখুলিগ নেয়ইলেতে কিতাইল। থাক, তিহে
 নুঙেই অয়া থাক। কিয়াতে মোরে বিহারার। হাঃ হাঃ হাঃ। খালকর চেইক
 মি কুরাং গেছুগা। হাই আন্দাজতে করতেই। হারপেইতেই মি ট্রেইনে যাউরিগা
 ওহান! হারপেয়া এপেই আইতেই, আয়া মায়া ডাক দিয়া বুলিয়া বার
 আলথক করে নিতেইগা। [ঘড়িগ চেয়া] সময়হানো আইল। বিসারানি
 অকরে থাইব। [ঘটি আগ পড়িল] বিসারা, প্র্যাটকরমহান হাবিহান
 বিসারা! মোরেতে নাপেইতেই। পেইলেউ কিতা। মি গিয়া দিলেগাহে নাই!
 ওতাউ মেইখংহান খানি লুকেয়া থইং। নাইলে মানুর মুঙে সিন ক্রিয়েট
 করিয়া লয়ইতেগা মোরে লালকরতই। [মেইখংহান মাগাজিন হানল
 গুরল, খানি থায়া ওহান সেচেয়া] বিসারারতা! বিসারা। কতিহান
 বিসারারতা চেইক। কিয়া লুকেইতোতা দেহক, দেহিয়া আহক, কাদক,
 মিউ কমর ডাটগ নাগৈ আলথক করে দিতো। না বুলে দিতো। থাকগানে
 তোর মিস শর্ম্মারেল। মোরাংতে কিয়া আলথক অয়া আইলে। বাগা নে।
 না বুললু ওহান, না। মাতলু নাই না বুলিয়া, প্লিজ গো ব্যাক, লিভ মি
 এলোন! মি তোর লুকুমর চাকরগ নাগই। আই এম নোবোডিজ সার্ভেণ্ট।
 মি তোর ক্রীতদাসীগ থাং! তোর কথায় কথায় আটতোতাতে, তোর

আদেশ ছনতৌতা ।

নাদেখল পাউরি ! মিতে দেহক বুলুরিতা । এরে মি ! এপেই আছু ।
এরে চা ! নাহ, মানু এতার হাদিং কুরাং মোরে বিসারেয়া পেইতইতা !
না পেয়া আলথক অয়া যিতইগা । না, নাহিলতা ! অ ! তি মোরে গ্রাহ
নাকররতা । গেলগা যাগা, থাইলে থাক । গরর কামিলিগ—পারলে
থাক, নুয়ারলে যাগা । অ ! এমটিক ঠানা নাকররতা । অ ! মি গেলগা তি
নুঙেই অরতা । ওহান তি লেপকরেহুতা । মি গেলগা মিস শর্মারে
আকুবালা আনতেগা করে । মোর মুন, মোর মুনিয়া কুরাং থাইতাই,
কিসাদে থাইতাই ওহানতে নাউ খালকরলে । তানু তোর সালেদে ডেই
ডেই হারা দিতাই । [হকগল] মি নাথাইলে তানু কিহান অইতাইতা, কিসাদে
থাইতাই, কিতা খেইতাই ? কিসাদে ডাঙর অইতাইতা ? তানুরে মিস শর্মার
আতে—ও সাইরেন ওগরাং সমর্পণ করতু, মি মালকগ অয়া ! মিহে তানুরে
জরম দেছুগ নাই । [কাদিয়া] মু-ন, মু-নি-য়া তুমি কিসাদে থাইতারাইতা ?
তোমারে কিসাদে বেলেয়া যিতুগা ? কারাং দিয়া যিতুগা ? ইঙ্কুলেংত অয়া
মোরে না পেয়া কতি হিনপা থাইবাইতা । কতি বিসারা থাইবাইতা তোমার
মালক এগরে ! তোমার বাপকেতে গ্রাহউ নাকরে দিল । [ঘটিগ পড়িল ।
ট্রেইনহান আহের বুলিয়া মাইকে এনাউনস করতার] ট্রেইনহান আহিলতা
পেয়া নাইলেতা ! ওতা মি গেলগা তি হারৌ অরতা । না, মি তোরে
হারৌ অন্য নাদতৌ । মোর সংসার হানাং আরাক আগই রাজত করানি ।
আমার ফটো, আমার স্মৃতি ওতা সেচেয়া কুরাংকার নাটকি আগ অয়া
পালনি । না না । ইম্পসিবল । গিথানক । তি বুলেয়া মানু এগরে
এহান করে পারলেতা ! কতি সরল হবা মানু এগরে, তি মোরে আলথক
করে নেনা নাদৌরিতা । তাতে সরলগ না, দৌগ পারাগ । তি বুলেয়া নাই,
চক্রান্ত করিয়া মোর সংসারহান গুড়া নাশা করতে করে লাগেহুতা ।
এমটিক হবা মানু এগরে তোর রাক্ষসীর মায়াজালহানল বেড়েয়া—অ ! তি
এহান নিংকরেহুতা ! মোরে খেদিয়া তি সিজাগ অইতে ! হাই দিতৌ,
বাসেয়া থাক, আহৌরি । মোরে খেদিয়া পিছেদে মোর মুন-মুনিয়ারে বিষ
দিয়া মারিয়া তি আকখুলিগ [চিকারি দিয়া] না নাইতৈ । মোর সংসারহান
বেলেয়া—মোর শৌ জিপুত বেলেয়া—সংসার হান তোরাং এরা দিয়া—না
—নুয়ারতৌ । নাদতৌ । তিহে নিকুলিয়া বিবেগা । মোর মানুগ তি

কাড়লি ! অবাই, পাংহান নাগৈ । এগৌ কিতা তোর সাদে মানু বুলাকুৰাগ
থাং ! গিথানক ! তি গিয়া আরজারে বুলাগা, মোর সংসারহান না
কাড়লি । নাষেইতোগা । তেইহে যিবগা । মিতে কিয়া বেলেয়া যিতুগা ?
তিহে যাগা, মিতে মোর শৌ জিপুত কায়াং দিয়া যিতৌগাতা ! [সুটকেশগ
গইল] আহৌরি । মুন, মুনিয়া, মি আহৌরি । না, মি নাষেইতোগা ।
চেইক, মোর সংসারহানাং কুংগই আয়া পালয়া থাইতারাতা [ট্ৰেইনর শব্দ]
মি আহৌরি, আলথক ঘন্না আহৌরি । [গেলিগা] ।

(১৯৮৩)

দারির ছোয়াগ দ্বিবেঙর চুয়া গেলগা মাপা উহানাং কদাল আহান দরিয়া তনু বিলেদে সালইং বুলতে কুকুরগই গেঁউ উ-উ করিয়া কাদানিহান পারা করে ডিগল রহন আহান দিল। কুকুরগর নাঙ বাঘা। কনাকে বাঘর তেল খওয়াছেগ, ঠোয়ক বুলিয়া। চানাহানো বাঘগ পারা। বুলন দিয়া বাঘারে চেয়া মুঙেদে কাকেইহান কারিং বুলতে বাঘাই দাপদে আয়া তনুর খুংতেইহান কামাড়েয়া থাইল। তনুয়ে মাভল,—‘আজি কুকুর এগই করের এহানতে কিহান থাঙ-এ! খানি খামকরোতা। না নুয়ারা কিতা অইলতা। সেলকমরমা মাংকেই খানি গলেয়া খওয়া দেই। বাহার চুঙগন্তে আছেগ না।’

শৌগর মালকর নাঙ মায়ে। মায়েই,—‘তু তু, আই বাঘা আই’ বুলিয়া ডাকলতাই ফালহানল মায়ের মুঙে গিয়া ‘কেঁউ কেঁউ’ করিয়া নখল মাটিহান আচুরানি অকরল।

তনুয়ে সুরাকহান চেয়া কাকেইহান দিতে মুঙর হেইনো জারির মরা ডেঙ আগং কওয়া আগই—কা কা’ করে রহিল। কিতার অমঙ্গল আহানে তনুর গারিগ জিরিং কবল। ‘রাম রাম, হা—উইস’—বুলিয়া কওয়াগ খেদানিরকা করতে যানা নকরের। হিল আগ বিসারতেউ নেই।

আকথুরুম খালকরল, না যেইবগাতা না কিতা! না গেলেগাও নার। এউলটাতে ইমেউ গাতগ খুলানিহান ডিলইল। ওঁতার গজে জবর করে বরণ আহান দিলে বিলগ পানিয়ে বুজতই ওঁবাকাতে খুলানিও নাকরতই। এবাকা গাতগ খুলিয়া জপুরা বেললেহে লাংপালে ওঁগ হিচিয়া মাছ কতগ পেইত নাই। গেলতি ওঁবছরতে হবা করে মাছ পাছিল।

তনু বিলগদে সালইল। আজি বেলি এহানো অনথকপা মরা রঙ আহান দরেছেতা! চেইতে অলমি লাগেছেহান পারা আছে। মুঙর জাঙালগং নিকুলতে ছরকাঙ বৌবুলুনি আগই লেঙো খানি ফরহুরেয়া নিলগা।

বিলগর কাদার শনর কান্দি ওঁগং ডাঙর তিরা আকজার আছে ওঁজারে লাংটিয়া গুট আহান বয়া আছি। কারতা গুরু মইচ কিতা মরেছি পাউরি নাই!

তনু কদালহানল গাতগ খুলানি অকরল। চারি বারাদে মানু গুরু আগর চিনে নেই। আপপানে ডর আহান লাগিল তনুরতা। আজিতে বেলিএহান আছে অংতা এহান মাদানে বোবরন দিতইতা না কিতা! গরর খুটিগিয়ো না মিলকরেছে। সেংকা আগ হুগ পাৱা দেনা থকছেতা।

কত সেদ দিল ঔবাকা অরর সিটা আগ আহিগং হমেইল। পুছিয়া আহিগ মেলিয়া চেইতে বিলগর পানি ঔতা হাবি রকতগ করে দেহের। জাঙহানাং সেদ কিতা পড়িলতানা কিতা! হবা করে চার খাঙতে রকত নাগই! আহিগ মুজুরেছিল আরো ইমে রাঙাগ করে দেখলতা পাউরি! বার গাতগ খুলানি অকরল তনুয়ে! গাতগ খানি লুঅইল ঔবাকা কদালহান ট-ঙ করে কিগ আগং থেঙইল। ইস্ কিগ খাঙ! কদালহান বাগিল তানা কিতা! কিগ খাঙ বুলিয়া আতহান বরেন্না চেইতে লুয়ার টুমাহান পাৱা আছে। আতহানল তুলিয়া চার খাঙতে দেহের কুকির দা আহান। রামহান আছে। জিরিক জিরিক করেৱ। কল্লিং কিতার জরা আগ নেই। কিতার ডর আহানে গারিগ জিরিঙ করল। উঙয়া দা উহান বেলল আতহানাংত। দা হানতে যে হবা আছে। তারতা ইমেউ দা আহান লাগেরগ। বাজারর কামার ঔগরাং ইসপিরিঙর টুমা আহান দেখিলতা দা আহান হংকরে দেখাৱকা। কামার ঔগ কুৱাং বেলা দিয়া গেছেগা। তার লুয়া ঔতাউ আর নাপেইল। এসাদে চহা দা আহান থাইলে বনে কিতাং যিতেগা কতি কামে লাগতইতা। আতাং নাকরে দোয়ে তারে দা এহান দিলাগ আজিতে। ইমে আপপানে ডর পেইলতা। তাই তাই লাজপেন্না চারি বারা চেইল। জীব পক আগ নেই। খানি আগে তিরা জারিং আছিল লাংটিয়া ঔতার আকগউ নেয়ছি। দিনে মাদানে, বেলিটিকেতে কিতার ডর!

গাঙেদে ছতা বেহাং আইতারা কুকি ঔতারাং এসাদে দা আকেইহান থার। কুকি আইতারাহান হারপেইলে কুকুর এহান ডরপেন্না লুকেইতারাগা। দূরেইংত কিসাদে গং পেন্না লুকেইতারাগা কিগই জানে।

দা ঔহান হবা করে চানা অকরল। আহি মিচিল করেৱ। আপপানে আহিগি জিপেইল। আহিগি মেলিয়া চেইতে দা ঔহানাংত টপ টপ রকত পড়ের। দা হান রাঙাগ আছে রকতগই। চারি বারাহানো রাঙাগ আছে পাৱা। গাতগর পানি ঔতা হাবিঔ রকতর সাদে রাঙা আছে।

বিলগর মা জেলা আগই কাদিরি পায়া। অহো! এগতে বিলগর মাছ খোরি ডাইনি জেলা ঔগই করিরিহান থকছে। নাই, এপেই আর সিনা অয়া থানা নাকরেছে। আতহানাং দাহান থাইতেগা কাদাং চেপো নুয়ারিয়া দূরেইংত ডর দেহেইরিতা না। ডাইনি এগরে তনুয়ে আকথুরুম নাঙছিলগ। চুলর আগাদে জিংতা অছিলতা দিন ঔহান। গরে গিয়া ওম আহান দিয়া বামনগরাংত কবচ আগ আনতইগা। কালি কবচ ঔগ পিদিয়া আয়া জাপ কিতা বেলতই।

দা ঔহানে কদালহানে দরিয়া গরদে সালইল। কুমপেই হিম্মাল আগ রহিল। দিনে হিম্মাল রহানি, রাত্তি কোয়া রহানি এহান গমনেই বুলিয়া বামনগই খনার বচন আহান ছনুয়াছিলগ না। তনু চালাক করে আটানি অকরল। পিঠিয়েদে বুলন দিয়া চেইতে দেহের বিলর পানি কিংতাউ নাছে। দাহান চেইতৌ কিংতাউ নেই। ডাইনি জেলা ঔগ লগহান এয়া দিল পাউরি। খাঙ দিয়া চেইলতা ইমে।

উঠানহানাং পারাহান দিতে বাঘা ডরপেয়া কুঁই কুঁই করে কুংগদে মাঙইলগা। তনু দা ঔহানে কদালহানে গুরুর সাঙগং থয়া মাতল—‘হজক আককারি দেইতা।’ শৌগর মালকে হজকারিল আয়া মাংল—‘কিতাতে খুংতেইহান হাবি রকতগল বুজেছেতাতে! তুলিপক কিতা দরেছিতা?’ তনুয়ে চার থাংতে ফুতিহান হাবি রাঙাগ আছে। গাটে গিয়া হবা করে হিনানি থকছে।

তনুর পুতক মূক্তাশৌ খেলিয়া আছিলগই থাংতা উঙয়া—‘ইমা!’ বুলিয়া চিকারি দিয়া মালকরে কলকরিয়া দরিয়া কাদানি অকরল। মালকে হরে কৃষ্ণ হরে কৃষ্ণ বুলিয়া হরি নামহান সলকরিয়া শৌগ কলকরিয়া গরে হমেইলিগা। ‘কিতা অইলতা’ বুলিয়া তনু মালক পুতকরে চেয়া থাইল।

মায়েই মাংল—‘যেইগা চালাক করে হিনেয়া আহোংগা।’ হজকারি থয়া তনু হিনাং গেলগা। কইতে ফুতিহানাং রকতর ফুটা আগৌ না লাগেছে। গরে আয়া দেহের শৌগ দারিগং খেলিয়া আছে। আংকরিয়া হারপেইল ইমে আপপানে খাঙ লাগেছিলতা না। কিংতাউ নেই।

বাত পেয়া উঠিয়া কুকুরগরে বাত দেনারকা ডাহের—বাঘা, বাঘা, আয় আয়, বাত বাত বাত...।’ নেই কুকুরগ। কুরাং গেলগাতা? নিককাত্তে বাসেয়া থারগ বাতরকা! ‘বাঘা, বাঘা বুলিয়া কত ডাক দিতে

নাহিল ঔষাক ষাটাঙহানাং বাতগি থদিয়া কুকাল কৰিয়া গৰে হমেইল।

গুমজেহ ঔগই চিকাৰি আগ হুনিয়া উঠিল। 'শৌ এগ কিতাৰকা খানি খানি থান্না খাং লাগেবতা? বামনগরাং খানি যেইগা।'

ভর আহানে গাৰিগ জিৰিং জিৰিং কৰানি অকরল। বিলর মাহ খৌরি ডাইনি ঔগতে লগহান না এরা দিয়া গৰে আন্বা শৌগৰে দরেছেতা! খাল কৰে খাল কৰে বামনগরাং গেলগা। বামনর দাৰিগং বাঘা গুমজিয়া আছে।—'বাঘা' বুলিয়া ডাকলতাই বাঘা আহিগি মেলিয়া তনুৰে দেহিয়াই লেজগ বেলেরা দাপদিয়া কুংগদে মাঙইলগা।

বামনগরাং পূৰ্বাপর স্মারি এহান দিল। বামন ঔগ গাঙহানাং কবিরাজিও কৰেৰ। তাবিজ কবচৌ দেৰ। মাংল—'কিংতাউ নাগই, বায়ু প্রবল অছেতা। বায়ু প্রকুপিত অইলে এসাদে অর। এহান দৌর বাতাস কিতা নাগই। মধ্যম নারায়ণ গছে দেগা শৌগৰে।' তিও গছিছ।

—ইমা থারানি। সিকি আগর মধ্যম নারায়ণ দেতা। তোমার বইতল আগং দিছ, মি আলথক কৰে দিতৌ।'

গৰে আইতে সেন্দাহান অইল। মায়ে শৌগৰে বুকগং চেপকৰিয়া দৰিয়া আহির পানি পুছিৰি। মানু মরেছি গরগ পাৰা অছে। গরগই গাঙহানার মুঙেদে টিল্লা আগং সিনাহান পাৰা অয়া আছেতাই রাতি উতি থক থাক মানু পানাহান চিলইতই।

কুকুরগ এবাকাউ নাহেছে। রাতি হিয়াল দাপা আহান রহিলা। আর দিনতে হিয়াল রহিবাতাই বাঘাই গেউ গেউ কৰেৰগ। আজিতে মূপ ইৰিং পাৰিং নেই।

হিয়াল রহানিহান এবলাতাই রাতিহান নিজুম অইল। চিং চিং কৰেৰ। গংগরার রহন ছাড়া আর রহন নেই। শব্দ নেই। গাৰিগদে মাকড়গ মাহেই আটিয়া ষিতাৰাগা পাৰা। শৌগতে খানি গুমহান অয়া গেছেগা। ঔগৰে উঠেয়া বাত খৌয়েইং বুলতে খাঙ লাগিয়া উঠিল। উঠিয়া হৌ ঔতা দেহিয়া কাদানি অকরল—'রকতল হৌ রাদেছ মি নাহেইতৌ, নাহেইতৌ। ইমা।' বুলিয়া চিকাৰিগ দিলতাই মালকে কলকৰিয়া হৰে কৃষ্ণ হৰে কৃষ্ণ বুলিয়া হরি নামহান সলকৰানি অকরল। শৌগর আতহানল নাকগংত নিনি আহান মোয়েয়া ব্রহ্মতালু ঔহানাং মধ্যম নারায়ণ গছে দিল। তাউ ফুটা আগ গছল।

শুঁমর আনিং সানিং হানাং চিকারি দেৱতা না, এখুঁরুম শুঁমজিতই ।
কতহান থায়া শোঁগই চিকারি আগ দিল—ইমা, কুকি আইলা আমাৰে
সেদেইতাই । মালকে লেউৱ আঠি ছিটা দিল, মলগৱ তলে তিৱাৱ আঠি কতগ
থদিল । মালকৱ আহিগি লাঙ লাঙ অহে । কিহান কৱত বিসাৰেয়া নাপাৱ
তনুয়ে ।

তনুৱ মালক মনথই বুড়ি চাৰি কুড়ি লালছেগ, গেলগা বৰিষাৱ উবাৰাংত
ফামে পড়িয়া আছে লালতু বেলতু অয়া । বাত খেইল নাহেইলতাউ হাৱ
নাপেইরি, কথা নিংসিং নাইরি, লাল্লে আহিৰি কাদিৰি । মৱেছে জিলক
ঔগৱ লগে য়াৰি দিৰি, তনুৱ বাপক মৱেছে ঔগৱে বাত নাদলা, লেইকৱলা
বুলিয়া গুজুৱিৰি । ঔগই মাতল—সাঙা, কিতা কৱোৱিতা, চালাক কৱে
লুকাগা । মুইয়া আহিতই, পেইলেতে হাবিগিৱে মাৱতই । গৱ বেলিয়া
বনেদে দাপদেই । মইলাই আইংতে । কুকি হাবি সলেছি । কিয়া গৱে
থাইলাইতা, দাপদেই ।

কাৱে সাঙা বুলিৱিতা, কুংগ থাং বাৱ মুইয়াতে ! তনু ৰাৱ মায়াই
আগৱে আগই চেইতাৱা । মায়াই আংকৱল—ইনে, কুংগ থাঙ সাঙা না
কিতা বুললে ঔগতে ?

—কুকি জেলা ঔগ নাই । মুইয়াই বিসাৱাৱগ তেইৱে মাৱানিৱকা ।
এপেই আছে বুলিয়া পো পেইলা । চালাক কৱে লুকেইগা । তোমাৱেউ
মাৱতাইগা । শোঁগৱো মাৱতাই ।

মায়াৱ কাদিয়া মাংল—বেন্না ! ঔগাদে না মাতি । গমনেই । ইমেউ
নুয়াৱা অছে শোঁগ । তনু নুঙেই নাইল—কিতা হায়ে নায়ে গুজুৱিৱিতা, ৰাতি
উতি গৱ বেলিয়াতে কুৱাং যিতাংগা ।

বুড়ি এগৱ কথা এতা ছনিয়া নিয়াম ডৱ পেইলা দ্বিয়গি । কিতাৱ
অমঙ্গল আহান চিন্তা কৱিয়া শোঁগৱে বুকগং চেপকৱিয়া মালকে লেহে দিৰি ।

কাদাৱ হেইনো জাৱে মাকু আগ ৱহিল । ৰাতি নঙেই এহানাং কিহান
কৱতা, কাৱেউ ডাকতা । গাঙহান হাবি ইমপানি অছি ।

থানি থানি থায়া শোঁগ চং চং ফালদেৱ । মালকৱে কলকৱিয়া 'ইমা ।
আইলা'—বুলিয়া চিকারি দেৱ । মালকে কলকৱিয়া হৰি নামহান সলকৱিৰি ।

তনুয়ে উঙয়া মাতেৱ — কিহানতে কৱতাঙ ? আধাৱ এহানাং গৱ
বেলিয়া কুৱাঙো যিতাংগা !

মায়ের উত্তর মাতল—‘যেহানো আহান করো বেনাই। হরে কৃষ্ণ হরে কৃষ্ণ, শৌগ কিহান আইল—এ।’ মায়ো কাদানি অকরল। লগে তনুয়ো উত্তর কাদের। গরগই গাউহানাৎ খানি দূরেই অছেতাই ডাকলে নাউ ছনতাই। নুয়ারা শৌ আগ থয়া কিসাদৌ গরগ বেলেয়া ষিভগা। আজি বিলে ষানা এহানর গাই লালছেতা। মাহ খোরি ডাইনি এগই মানু এহান দিরি হিন এহান।

—মানু ডাকদে নে, শৌগ জিংতা নাইতয়ে! তনুয়ে চিকারি দিয়া মানু ডাহিং বুলতে নারগ না নিকুলিল। ফামহানাৎ থয়া বুড়ি ঔগই কিতা গুজুরিরি। তনু কাদাৎ গিয়া ছনেরগাতা—মুইয়াই কুকি দাপা আহানল আহের। মরতারাই, দাপদেই বুলতে গরৎ নিকুলানি নাকরিয়া থাইলাই। সাঙা, সাঙা, তি আকখুলিগ আইলৌ দাপদিয়া যাগা।’

শৌগই থতাদে কলপুক নিকালানি অকরল। তনুয়ে মায়োই আকসাটে চিকারি দিয়া কাদতারা, শৌগ জাঙ আত টিংদেছে।

গাঙেদেউ, লৌদা লৌদি কাদা রহা, ছনতারা। বুড়ি ঔগই মাতল—‘আইলা কুকি। ঔরে মানু কাপতারা।’ খানি থয়া মানু গুট আহান ছির লুককা দরিয়া তানুর ঔগদে দাপদিয়া আইলা। ডরহানে তনু বার মায়োরতা মাত মাতইল। ঔরে আইলা, মুঙর পথগদে কথা ছনিয়ার, উঠানহান পেইলা, মাংকল হানাৎ আয়া চিকারি দিতারা—সাঙা, সাঙা, মুইয়া মুইয়া।

তনু বার মায়ো উত্তহানে শৌগরেল বারনর তলে হমেইলাগা। —সাঙা, সাঙা, ছয়ারহান আংকর। মুইয়া মুইয়া। কিতা আইলাইতা গরর মানুতে?

গরে বিতরে শব্দ নেয়ছে। মানু ঔতা ছয়ারহান আংকরিয়া হমেইলা। গাঙর মানু এনা। এতা বারনর তলেৎ নিকুললা। গাঙর মানুয়ে আংকরতারা—‘কিতা অছে থাং? কিয়া চিকারি দিলাইতা? কিয়া বারনর তলে লুকাছগাতা?’

মাইসেনাই মাতল—কিতা অছেতা, এহান হাবি আঙাঙ, আঙাঙ বুলিয়া ডাকতেতে কিয়া না খুমকররাইতা?

সেনাপতিয়ে মাতল—মিয়ৌ এহান হাবি মায়ো, মায়ো বুলিয়া ডাহোরিগ। সুপ না খুমকরতারা! আমিতে তোমার চিকারিগ ছনিয়া আয়ারগ। কিতা অছেতা?

তনুয়ে শৌগরে দেহাদিল। আতজাঙ দরা অছে, আহিগি জিপেছে, থতাদে

কলপুক নিকুলের খানি খানি। মাইসেনাই মারেই গাছি চেয়া মাতল—
দলাবাউ, চালাক করে বামনগ ডাহিয়া আনোনা। কৃষ্ণকুমারে কিতাই যেইগা।
চালাক করে হজকল আহক বুলিয়ে।' তনুগাছিরে আংকরল—কিয়া হুয়ারহান
না আংকরলাইতা?

মায়োই মাতল—আমি হুনিয়ার তাই—সাঙা সাঙা, মুইয়া মুইয়া। আমি
মনেইলাংতাই কুকি আইলা।

—কুকি? কুরাংকার কুকি এপেইংতে?

খানি থায়া বামনগ আহিল। শোগর মারেই চেয়া আংকরল—কিতা
অছেতা?

তনুয়ে মাতল—আজি বিলে গেছিলুগা ঔপেই মাছ খোরি ডাইনি ঔগ
লগ দরিয়া আয়া শোগরে দরেছেতা। এইগারেতে মাতলু নাই।

বামনগই আহিগি কিতা চেয়া মাতল—'না কিংতাউ নেই। ডাইনি
ঔগই খাংদিরি পাউরি নাই। নাড়ির গতি হানে মাতেরতাই মহাভয় আহান
হমাছে। পানি খুচেই আহান দেইতা। তুলসী পাতা আহান আনোনা। না
ছিড়িয়, রাতি গমনেই। জাকারেয়া তলে পড়তই ঔতা আনিয়ো।

পানি ঔতাল আহিগিদে জট জট সিটা দিলতাই কলপুক বেলানিহান
আলইল। তুলসীর পাতা ঔহান সলকরিয়া মুরগর গজে থদিল।

—বেঙুলর পহনতে আছে! মকরধ্বজ খোরাক আহান খওয়া দিঙ,
চানাপা আলইবতা। কিতাউ নেই বালা আইতই।

মানু এতা হাবি দেহিয়া তনুরতাউ সাহসহান হমাছে। আংকরল—
কিয়া মোরে না দরিয়া শোগরে দরলগাতা!

মাইসেনাই মাতল—গরগর হাবিরেউ খাঙদিরি ঔহানতে!

বামনগই মাতল—তিও, আজি কৃষ্ণ চতুর্দশীর দিনে আকখুলাগই বিলে
গেছংগা খাংতে সিনা অয়া!

শোগরে মকরধ্বজ খোরাক ঔহান খওয়া দিয়া মাতল—আর ডর নেই।
এতা খাটি মকরধ্বজ। মরা মানু জিংতা করেবগ। আলইতই শোগ।
ডাইনি ঔগ খেদানিরকা সল আহানো দিলু। রাতিহানো ফুয়ানি বিংতা
অইল, ষিকগা চেইক গুমশো আকেইহান দিয়া পারিয়ার নেই।

মাইসেনাই মাতল—কিতার কুকি, কুকি বুলিয়া পাঙ লাগরাইতা?

তনুর মালক ফামহানাং থায়া কাদিরি—কুকি আইলা বুলতে গরগ

এরা দেনা নাকরলা, আজি কিহান অইতই কিগই জানে!

—ওহো! বুড়ি এগই মানুগি উঙ করে দেহেতা না! বিয়ানহান ফুয়েইলে ইঙেলই বুড়িরাং য়িয়েগা। সল আহান দিয়া দিবতা।

হাবি যানারকা করলা আরো মায়েই গাবুরাপুয়া দুগরে খাম করিয়া থইল। মায়েই তনুরে মাতলো—‘ছনরাইতা, তুমি ফামহানাং হমেইগা।’

গাবুরা পুয়া দ্বিয়গিয়ে হজক আককারি লাগেয়া মাংকলে গেলাগা। মিকুপ আহান পিছেদে গরে হমেয়া মাতলা—না, না, উর আহান লাগের। বিতরে বহিক।

আড়িগ থয়া খানি লুকানিহান পারা করে উপারিগল হজক ঔকারি পিলা।

বিয়ানহান ফুয়ানিতে ফাতনেই ইঙেলেই বুড়ি হই হই করে আইলি। চারি কুড়ির গজে অইলিতাউ কেং কেং করিরি।

—তুমিতে ঔতা সাঙার বাপকে মন্ত সল করেছিল কুকির দা ঔহান আনেছেতা! মি রাতি এহান গুমজে নুয়াবেরু। আহিগি জিপেইমতাই দা ঔহান দেহোরি। দাহানে চাম নাছে, রকত মাংগের।

তনুয়ে আংকরল—সাঙাতে কুংগ থাঙ?

—সাঙা আমার বপাক ঔগর নাঙহান। মোর বপাক ঔগ ডাঙরে ডিগলে সাতহানে খাই গাবুরাপুয়াগ পারা অছিল। তা জুমেংত হতা, মকতি কিতা আনিয়া বেপার করলগ। মিতে নাদেহেছু, য়ারি ছনলুতা।

কুকির গাওবুড়া ঔগর জিলক আগ আছিলি সাঙা বুলিয়া। মুইয়া বুলিয়া কুকি শৌ আগই বিয়া করতই বুলিয়া লেপ করেছেন। সাঙার বাপকৌ জিলকরে মুইয়ারাং দিতৌ বুলিয়া কথা দেছিল। ঔগরে আমার বপাক ঔগই দাপহুয়েয়া আনে বেলল। আকতাই মাতলা সাঙার মালকে জিলকরে সাল করে দেছে।

কত দিন থায়া সাঙার বাপকে বার মুইয়াই সাঙারে বিসারেয়া আইলা। সাঙার বাপকে দা আহান তানুর দৌ ঔতারং কাংকরিয়া মুকক আগ য়ারিয়া সঙ্কল করেছিলতা—তারে এমাটিক লাজ দিল জিলক ঔগর রকতল দাহান হিনা দিতই।

কুকি মানু মায়াং আইলা বুলিয়া গাঙর মানু য়েগ য়েগদে পারলা ঔগদে দাবদিলা। সাঙাগাছিতে এহান হারপেয়া আগেংত গাগারাপারে গিয়া

লুকাহিগা। গাগারার সেনাখয়্যাই সাঙারে সেকরিয়া নামহান দিল।
ঔপেইংত তানু সিবরাংগনে গিয়া থাইলাগা। ঔতার নাভিনকগ নাই মিভে।

সাঙার বাপকে বার মুইয়্যাই এতারে বিসারেয়া নাপেয়া আলথক অয়া
ষিভেগা সাঙার বাপকরে বিলগর পারে হরপে কামাড়েয়া মরিল। পিছেদে
কুকিয়ে অয়া মড়াগ তুলিয়া নিলাগা। সঙ্কল্প করেছিল দা ঔহানে এবাকাউ
রকত মাগের।

দা ঔহান তি পাছৎ নাগইতা। চালাক করে দূরেই কর। রকত
পিনাহান চামনাছে দাহান গরে নাথই। মোরাং দে বেলা দিংগা।

তনুয়ে দা ঔহান আনিয়া ইঙেলেই বুড়িরাং দিয়া দিল। ইঙেলেই বুড়ি
ঔহানল গেলিগা।

খানি থায়া দারিগদে বাঘাই 'গউ' করে রহিল। তনুরে দেহিয়া
ফালহানল গজে কানরকা করেব।

—'অহ্! গেঙিতকর পুতকগই সকদিলো নাই। দূর-এ!' কুকুরগ
কাদাংত সেচানি নাকরের।

বামনগই অয়া দেহের শৌগ খেলাং লাগছে।

—মকরধ্বজর গুণহানিতে দেখলে নাই মায়ে। মরাগ পেয়া জিংতা
অইতারা এতা খেইলে।

ঔদিন মাদানে তনুর মালক বুড়ি ঔগ মরলি। দাহানেউ দিন ঔহান
রকত পিয়া চামইল।

ইঙেলেই বুড়িয়ে দা ঔহান গাটে বেলাদেনাং ষিভেগা ইনচান আলিয়ে দা
ঔহান দেনারকা মাভেছে। বুড়ি এগই দেনা নাকরিরি, তা নিভগা। ধান
দ্বিকাঠি দিতৌ বুলতে পেয়া নাকরিরি। —'এহান নিভেগা অমঙ্গল অইতই
নানিগা, বুলতে নাকরিয়া নেছেগা। মাদানে অয়া ধান দ্বিকাঠি নিছগা বুলিয়া
ঔহানল গরে ষিভেগা দেহের নারিকলর চারা ঔতা ছাগলে খানাং লাগেছি।
ঔতাংত আরাক মিয়াঙ আগর লগে তর্কাতর্কি অইতে হৌগই লাঠিগল দিঙ
বুলতে দা এহানল আকসেদ এগই হৌ মিয়াং ঔগর মুরগ তুপকরে দেছে।
দারগা পুলিখ অয়া ইনচানরে বাড়িয়া নেছিগা। দা-হান থানাং আছে।
ইনচানরে হাজতে থছি। হাকিমগই জামিন দেনা নাকরের।

ডাক্তার বাবুর শৌগ

রঞ্জিৎ পোহাট মেডিকেল কলেজে পাস করিয়া পয়লা চাকুরিহান পেইলতা।
চা বাগান আহানাং। তার কোয়ার্টার্সগং নেমপ্রেটহান লাগাছে—
ডঃ রঞ্জিৎ সিনহা, এম, বি, বি, এস, মেডিক্যাল অফিসার, ইন / আউট।
পাস করিয়া সরকারী চাকুরি নাপেয়া চা বাগানে জয়েন করেছতা।
তারততে এবাকা চাকুরি করানি নাহের। আরাকো তামকরানি মনার।
ডাক্তার আই স্পেসিয়েলিস্ট আগ অনা ওহান তার হপনহান।

গরেংত তারে আর খরচ দেনা নুয়ারতাই। এতাউতে কতি হিনপেয়া
তাম করুয়েইলাতা, বি কিতা বন্ধক দিয়া। বাপকরে ডাক্তার বৈষ্ণবগ বুলিয়া
পরগনার মানুষে নিয়াম স্নাকরতারা। ধর্মসভা কিতাং তা নাথাইলে নার।
গীতা ভাগবত কিতা দেব কর্ম কাহাং। মানীয়া মানুষ, বরাবালাগ নাগই।

পাস করিয়া বাপকরে হমা দিলগা ওবাকা বাপকে কাদিয়া মাংল—
পরান, এসাদে করে জনমহান মোর মেইখঙহান ডাল করানি তালকরিছ।
মি ধন পইসা, রূপা সামপাল না মনউরি, সম্মান এহান, ইজ্জত এহানতে মি
নিয়াম মনাউরিক বাবা।

জয়েন করল দিন ওহান ম্যানেজার ওগ উনা অনিং আহেছিল। —এনি
ট্রাবল, এনি দিককং ডঃ সিনহা? কোন অসুবিধা অইলে মোরে মাতিছ।
নাউ ইউ আর এ ডিসটিংগুইশড মেম্বার অর আওয়ার ফ্যামিলি। আউর
ফ্যামিলি মেম্বারকো দেখনা ইজ মাই ফর্জ।

—নো ট্রাবল। থ্যাংক ইউ মিঃ সোমানি।

—এপেই আগ্না পয়লা লোনলি ফিল করতেই। বাট ইউ ক্যান ওভারকাম
ইট। মতলব, আই হ্যাভ এ ভেরি গুড ইলাজ ফর লোনলিনেস। স্টার্ট
ড্রিংকিং ইয়ার, এভরি থিং উইল বি অলরাইট। অভ্যাসতে আছে নাই।

—নাহ, জীবনে না সকছু।

—কোই বাত নেই, আমি মালকর পেটেংত অভ্যাস করিয়া আহেছিলা
নাগই। হোয়াই নট টুডে! মোর বাংলাগং মিকগা! রাতি ওপেই
ভিনার করতাঙাই।

—থ্যাংক ইউ মিঃ সোমানি। কিন্তু তি মাতর ঔতাতে না সকইতো।

রাতি ডিনারর আগে সেলারগৎত সিভাস রিগাল নিকালল। —‘খাটি
স্কচ। এতা এপেই নকল ফ্লেবার দেখিছা নাগই।’

—ডু ইউ নো ডঃ সিনহা, মোর ফ্যামিলি দিল্লীং থাইতারা শৌর লেখাপড়ার
কা। মি এপেই দুগ মিষ্টেসল খাউরি। আগ ক্যামেলিয়া সাইনেনসিস—
রণজিতে আহে বেলল। তা হারপাছে চা’র বোটানিকেল নাউহান
ক্যামেলিয়া সাইনেনসিস।

—আহরতা, আরাক আগ স্কটল্যাণ্ড কি ছুকরি’ বলত মজ্জদার। ইউ
অলসো ক্যান হ্যাভ দি স্কটিস মেইডেন, বুলিয়া আতহানর গ্লাসগ দেহেইল।

রাতি ফামহানাং পড়িয়া নুয়া জীবন এহানল খালকরের। মিঃ সোমানিরে
নুঙেই লাগিল তারতা। রসিক মানুগ’ জোকগ মাছেই জানে। অমাটিক
বোরিং নালাগতই থানাহান।

এপেই আধুনিক চিকিৎসার কোন সুযোগ নেই। নুয়ারা চানা,
হজক, মিকচার, দেনা—ঔতার গঞ্জে করিলত। কিংডাউ নেই।
কমপ্লিকেটেড কেস অইলে মেডিকেল কলেজে রেফার করানি। চা বাগানর
লেবার এতাই দামী ব্যয়বহুল চিকিৎসা করানি নাউ পারতাই।
তানুরমা লিভারর নুয়ারা নিয়াম। অপুষ্টি ঔহানেই ডাঙর সমস্যা-
হান। তানুরতা চিকিৎসা না লাগের, পেট বুজে খানারতা দিলে নিয়াম
পারা নুয়ারা বালা অইতই। তলব পেইতারা ঔতা পাট্টাং খরচ করিয়া গরে
আয়া শৌ জিপুত মোয়েই কিলেয়া, হাল্লা চিকারি দিয়া বস্তা আগং হমেয়া
গুগজিয়া থাইতারা। এসাদে করে করে লিভার কিডনি হাবি ড্যামেজ
করিয়া থছি। এতারেতে কি চিকিৎসা করানি।

হাসপাতালে লেবার রুমগ খানি হবা, মোটামুটি কাম চলের। নার্স আগ,
কম্পাউণ্ডার আগ বার ড্রেসার দুগ আছি।

তার কোয়ার্টার্সগ ডাঙর। মালক বাপ করে আনিয়া কতদিন থনা
মনাছে। তানুহে য়াকরে দিতাইতা।

হাতে হাতে দিন এতা লালয়া য়ারগা। তার মালক বাপকতে আহানি
নাকরতারা, কইনার মালক বাপকহে হাদি হাদিং আইতারা। রণজিৎ এবাকা
বিয়া নাকরতই। আরাকৌ না তামকরেছে পেয়া বিয়া করানির প্রশ্ন না উঠের।

চা বাগানে সমাজর তিনহান নির্দিষ্ট শ্রেণী। হাবির তলে বাগানর

লেবার। কুরাং কুরাংত আহেহিতা। এবাকা আর আগেকার দেশ-গর
উতার লগে সম্পর্ক নেই। তানু এবাকা এপেইর মানু, তঙাল মানু, বাগানর
লেবার। আর কোন পরিচয় নেই।

উতার গজে বাবু অর্থাৎ কিরানি দাপা ঔহান। তানুর সমাজ
তঙাল, তিলনি করানি তঙাল। জিপুত টাউনে লেরিক তাম করতারা।
ডাঙর অইলে বাগানে কিরানির চাকুরিং হমেইতারা।

রগজিং গাছি হাবির গজর শ্রেণীহান, সাহেব। ম্যানেজার, এসিস্টেণ্ট
ম্যানেজার কিতায়েল এরে সমাজ এহান। তানুরতা, গাড়ি আছে, ক্লাব
আছে, স্কচ আছে। শৌ জিপুত দিল্লী কলিকাতাং তামকরতারা। ছুটিং
আয়া কতদিন থায়া যিতারাগা।

রগজিং গাঙর শৌগ। তানুর গাঙেদে বাগানর কুলি আয়া মাটি
কাম কিতা করতারা, পছরিংত কুচিয়া দরতারা। তারাং শ্রেণী
বিভাগ এহান অমাটিক দরা নাগই। পয়লাগদে আয়া কুলি এতার
লগে তিলনির চেষ্টা করল—নুয়ারা পানি চা দিল, সেম্পল ফাইল কিতা
দিল। ঔবাকা মিঃ সোমানিয়ে মাংল—ডঃ সিনহা, প্লিজ এপেইর ক্রাস সিস্টেম
এহানর এগেনস্টে না যেইগা। এতারাংত তঙাল অয়া না চললে এতারেল
কাম করুয়া নুয়ারতাঙাই, ওয়ান মাস্ট বি অ্যা গ্লেভ ডাইভার, অ্যা
মাটিনেট। আজি কালি ইউনিয়ন কিতা করিয়া এতাই মুর তুলানি মনাছি।
ব্রিটিশে করলা ঔহানে ঠিকহান। পইলা জাংদালহান দিয়া পিছেদে কথা
মাতলা, হুকুম করানির আগে চাবুক মারলা। তানু কুলি কন্ট্রোল করানি
জানলা।

রগজিং ঔবাকাংত নিজরে তঙাল করিয়া থনা অকরল। সময় পেইবতাই
মেডিক্যাল জার্নাল কিতা পাকরের। আহির বিষয় এহানল আরাকৌ
গজেদে কানা, এহানেই তার সাধনা হান।

আকথুরুম বাপক আয়া মিকুপ আহানৌ থানা না করিয়া গেলগা।
বেজাতির আতে পানি সিটা পেয়াও নাপিতই।

তার বপাক মানিকবুড়া ক্যাটারেকট অয়া আহিগি নাদেখল। ঔহানে
মাস্টরিহান এঁরাদেনাং পড়েছিল। আহিগি নাদেহিয়াও রগজিতরে অঙ্ক
বাগাদিল হবাহান। তারাং তামকরিয়াহে। রগজিং অঙ্কং অমাটিক হবা
অছিলতা নাই। ম্যাট্রিক অর্থাৎ এই এস এল সিং অঙ্কর মা হাইস্কোল

মার্কসেণ্ড নম্বর আগ শিচ্চিল কম পাহিলতা। বপাকে আংকরল—তি ডাক্তর
অইলে কিগ অইতেই?

রগজিতে মিকুপ আহানো না খালকরিয়া মাংল—আহির ডাক্তরগ।

—কিয়া?

—বুড়াবার আহিগি বালা করে দিমতা।

ঔবাকা বপাকে সংস্কৃত শ্লোক আহান দিল

বৈদ্যরাজ নমস্তুভ্যং ত্বং যমো জ্যেষ্ঠসৌদরঃ।

যমঃ সংহরতি প্রাণান্ ত্বস্ত প্রাণান্ ধনানি চ।

অর্থহানতে হারপেইলেতা! বৈদ্যরাজ অর্থাৎ ডাক্তর বাবু, তোরে
হমা দিরোরি, তি যমরাজার জেঠা বেরকগ। যমরাজাইতে প্রাণহান শিচ্চিল
নেরগা, তিতে প্রাণ বার ধন দ্বিয়তাউ নিয়রগা। রগজিতে দিন ঔহান
সঙ্কল্প করেছিল—তা ধনর ঔগদে নাইতই মানুর সেবাল জনমহান থাইতই।
কামে লামিয়া হারপেইল, মানুর সেবা করানি এহান কতি হিনতা।

বপাকরে মেডিকেল কলেজর আই ডিপার্টমেন্টর প্রফেসর ঔগরাং
দেহুয়াছিল। প্রফেসর ঔগই মাতল ম্যাটিওর নাকরেছে। ম্যাটিওর করলে
অপারেশন করতাঙাই। তা থার্ড ইয়ারে তামকরতে বপাক মরিল।

বপাকর চিকিৎসার সুযোগ নাপেইল এ জনমে। ঔহানল আরতারে
চিকিৎসা করিয়া, আরতার আহি বালা করিয়া বপাকর আত্মগরে হারো
করানি মনার।

দিনে দিনে এপেইর পরিবেশ এহানাং অভ্যস্ত অনা অকরল। তার
বন্ধু বান্ধব ডাক্তর ঔতাই উনা অইলে মাংতারা—কিতা কররতা চা বাগান
আহানাংতে! কোন স্কোপ নেই, প্রাইভেট প্র্যাকটিশ নেই, ঔপেই থাইলেতে
আছে বিদ্যা ঔহানো মাঙইতই।

উপায় নেই। এবাকা হবা চাকুরি আহান পা বেললে আর তামকরানি
নাইতই, গজেদে কানা নাইতই। তার হপনহান অন্তত ডি ও এম এস,
পারলে আরাকো গজেদে কানা। এতা তার গোপন হপন। সফল
অক নাক, হপন দেহানি লালহান নাগই।

মিঃ সোমানিয়ে মাতের—কিয়া অমাটিক গ্লাম অয়া থারতা, কিহান
খালকররতা? তি তোর বিষয় আহানর ডাক্তরগ। মিউ ডাক্তর আগ
বুলানি যাকরের। মোর হজক এতা সেন্দাং থোরাক আকেইহান খেয়া চেইছ।

আমার বিজ্ঞাপন হানতে দেহেছ—দি কাপ দাট চিয়ার্স? আরে ইয়ার
অসলি মে দি গ্লাস দাট চিয়ার্স.' সোমানিরাং সফট পর্নোর ক্যাসেটগ
মাহেই আছে। ওতা চানারকা নিমন্ত্রণ করের। রণজিং অমাটিক না
মনেইলৌ হাদিং হাদিং যারগা নিয়াম জোর করলে।

সোমানির দুঃখহান তারে ড্রিংক করুয়ানি নুয়ারেছে। মাতের—ডঃ
সিনহা, মোর কথাহান না থইলে নাই! দেখতেই, ইয়ে দুনিয়া ইজ
ভেরি সেলফিশ। ইমে রুপিয়া চিনতারা এণ্ড নাথিং এলস। মাই ওয়াইফ এণ্ড
ফ্যামিলি দিল্লীং থাইতারা, তানুর আকহান ডিমাণ্ড, রুপিয়া এণ্ড মোর
রুপিয়া। এতাল পাহুরিয়া থাউরিগ দুনিয়ার হাবি দুঃখ। তিয়ৌ দুঃখ
পানা অকরতেই ওপেই সহ্য করানি পারবেতা স্টার্ট ড্রিংকিং ইয়ার, এণ্ড
স্টার্ট টু ডে।

বিয়ানে উঠিয়া ক্যালেণ্ডারের পাতাহান পটেইল রণজিত। আজি এপেই
ভারত ছয় মাহা পুরা অইল। কিসাদে দিন এতা লালইতা! এসাদে
থাইতে থাইতে জাঙেংত মারা নিকুলতইতানা কিতা! ওহানতে অনা নাদতই।
এপেই জেনারেল প্র্যাকটিশ করানি লাগেরে। সাহেব ওতার চিকিৎসা করানি
লাগের। ডি, ও, এম, এসগ অইলে হাবি এরা দিয়া আহিল থাইতই।

গাঙে যারগা ওবাকা গাঙর মানুর চিকিৎসা করের, স্যামপল ফাইল
দেব। পিছেকার খুরুম গেলগা দেহের—তা দেছে হজক ওতা নাহেয়া
ডাক্তর দেহয়েয়া দোকানেংত হজক লয়া খেইতারা।—বাই, মাগানা হজক
বিলেয়া নাঙ কামারতা উনি ওতা।

এতা ছনে ছনেউ যারগা খুংতিঙে নুয়ারা চার, হজকদের। আহির
ডাক্তরগ অয়াউ মানুর সেবা করতই। বালা করতই মানু ওতার আহিগিল
বপাকে স্বর্গংত পৃথিবী এহান চেইতই।

মাদানে মিঃ সোমানি আয়া মাংল—ডঃ সিনহা, মি লিভে যাউরিগা।
মোর জিপুত দ্বিগি দিল্লীং কনভেন্টে তামকরতারা। কই দিন অইলতা
তানুরে না দেহেছু, ফ্যামিলির লগে না তিলছু। মিসেসরে চেয়া আইংগা
ওয়েইস্ট লাইনহান কতি ডাঙর অছেতা। তোরকাতে কিতা আনেদিবু,
হবা স্যুটি লেংথ আহান?

—থ্যাংকস্, কিংতাউ নালাগতই, তিহে ছুটগান এনজর করগা, বন ভয়েজ।

—আরে ফ্রেণ্ড কা ওরকসে এ স্মল প্রেজেন্ট, মি যেসাদৌ আনতো।

সোমানির গুপ্ত নুসারা আহান চিকিৎসা করিয়া বালা করে দেছিল।
ঔতারতা রূপা নালছে রণজিতে।

—কোন দিনতে যাবগা?

—আজি, এবাকা। কালিকার ফ্লাইটে কনফার্মড টিকেট। আজি রাতি
হোটেল খাইতো, ফ্রেণ্ড আগ দুগর লগে মূলাকাং করতো। গাড়ি হানাং
মাল পত্র কাকরিয়া হদাছি। বাই, ডঃ সিনহা।

—বাই, মি: সোমানি, সি ইউ এগেন।

—আই উইল বি ব্যাক সুন। বাগান এহান এরাদিয়া মি সিটিং থানা
নুসারতো।

হ্যাণ্ডশেক করিয়া সোমানি বিদায় লইল।

রাতি দশটার উবাকা সার সার বুলিয়া ডাকতারাহান ছনিয়া ছুসারহান
আংকরিয়া চার থাংতে তারে নেনারকা হাসপাতালেংত মানু আহেছি।

—লেবার পেশেন্ট আগ অ্যাডমিশন লছে, ব্রিডিং অর, কণ্ডিশা খাবাপ।
আমারে সিষ্টারে দিয়া পেঠেইলতা।

গিয়া চারগা থাংতে কুনি জেলা আগ, বয়স আঠার উল্লিশ অইতই,
সম্ভবত বিয়া নাহেগ, শাতহানো হবা অছে। গরে প্রিমেচিওর ডেলিভারি
করানি তালকরতেগা সিভিয়ার আন্টি পারটাম হেমায়েজ অয়া শক অছেগ।
নার্সগরাংত হারপেইল নাঙহান ফুলমতিয়া, সাত আটমাহ গারিং অছে।
তা বাগানে আহানির আগে সোমানির বাত রাদিয়া আছিলি। রূপা
চরকরেছে বুলিয়া ছয় মাহা কিতা অইল সোমানিয়ে খেদে দেছেগ।

শক কণ্ডিশনের পেশেন্টগ, জ্বিতা নাইতই। ব্রিডিং বন্ধ নাছে। বন্ধ
করানি সম্ভবো নাগই। তেইরে অ্যাডমিশন দিয়া মানু ঔতা হাবি বেলা
দিয়া গেছিগা।

নার্সগরে ইনস্ট্রাকশন দিয়া গরে আহিল। পেশেন্টগর কণ্ডিশন চেয়া
প্রয়োজন নিংকরলে ডাহানি।

ঘণ্টা দুহানর চুয়া থায়া বার ডাহাং আইলা। গিয়া দেহেরগা পেশেন্টগ
মরে যেইরিগা।

—সিষ্টার, স্ক্যালপেল, কুইক।

নার্সগই স্ক্যালপেলহান দিলতাই পেটগ কাপিয়া শোগ নিকালেয়া আনল।
কিটেল ডিসট্রেস অইলেউ শোগ নামরেছে, হার্ট বিট অছে।

জিহ্বা অনির অন্ত্র লক্ষণ ঠিক নেই, এসফিকসিয়েটেড আছে। খোঁচা
সেংকরে দিয়া, অক্সিজেনেশন করিয়া, ডেকাড্রন ইনজেকশন আগ দিয়া, সামান্য
খানি ম্যাসেজ করে দিলতাই শৌগ চিকারি দিয়া কাদানি অকরল।
নার্সগরাং শৌগ দিয়া অফিসে আসা বহিল। সোমানিয়ে দিয়া গেছেগা ফরেন
সিগারেটের প্যাকেট ঔগৎত সিগারেট আগ লাগেইল। এবাকার কামহান
অইলতাই ডেথ সার্টিফিকেট আহান দিয়া মরাগই শৌগই গার্গেনর আতে
দিয়া দেনা।

শৌগ জিহ্বা করে পারল এহানরকা হারো আহান লাগিল তারতা।
এগ মিঃ সোমানির শৌগ অছেহান থকছে। সোমানি কিতা ফুলমতিয়ার
অবস্থাহান হারপেয়া আকদিনে সালয়া গেলগাতা।

পো পেয়া মানু কতগ আইলা। মদগ মাহেই পিয়েছি। মরাগতে
নিতাইগা কিন্তু শৌগ নেয়া নাকরলা। পাঞ্চাইং বইতাই, বিচার অইতই,
ঔতার পিছেদে যেহান অইলতা অইতই। শৌগ হাসপাতালে থাক।

মরাগল গেলাগা আহেছিলা মানু ঔতা। শৌ এগ এখুন্ম কিহান
করানি! শাহান আছে হবাহান—অন্তান্য কুলির সাদে নাগই। রণজিতে
ঠিক করল সোমানি নাহেছে পেয়া শৌএগ হাসপাতালে থইতই। নার্সগই
ষত করতই, আগা আগ থদিতই রণজিতে। সোমানি ছুটিংত আইলে বাধা
করতই শৌ এগরে গ্রহণ করানিরকা। সোমানিয়ে পিতৃ স্বীকার নাকরলেউ
শৌগর দায়িত্বতে লনা লাগতই। প্রয়োজন অইলে রণজিং কোর্টে ষিতইগা।
শৌ এগ লেমেদে মাঙনি নাক।

নার্স বার আগার ষতং শৌগ মা দুহান ফানা বিংতা অইল। শাহান
যে হবা আছে, বানা নাপেয়া উপায় নেই। শৌ এগর প্রতি মায়া আহান
হমাছে রণজিতরতা। শৌগইতে দোষ নাকরেছে নাই। তার অধিকারহানাংত
কিয়া বক্ষিত অইতইতা।

আহানিয়ে আহের। শৌগরে হাবিয়ে এবাকা ডাক্তার বাবুর শৌগ
বুলতারা। ঔহানেই শৌগর নাঙহান আছে বুললৌ স্নাকরের। রণজিতে থ
দেছে আগা ঔগই মাদানেদে পেরান্বলেটার হানাং বুলাং নিরিগা ঔবাকা
শৌগরে যেগই দেখতারা ঔগই মাংতারা—ডাক্তার বাবুর শৌ এগ কতি
হবা অছেতা।

এবাকা পেয়াউ মিঃ সোমানি ছুটিংত আলহক অয়া নাহেছে। পো কিতা

পাছে পাউরি নাই জয়েন করানি নাকরেরতা। কুরাংতে ষিতইগা,
আকদিনতে যেসাদৌ আহিতই নাই। ঔবাকা শৌগর দায়িত্ব লনা লাগতই।
লনাহান বাধ্য অইতই।

সোমানি এবাকাউ আলথক অয়া নাহেছে। মাহা তিনহানর গজে অইল
বাসেয়া আছেতা। তা মানুর শৌ এগল কিহান করত! লেবার ঔতারে নেইগা
বুলানি নুয়ারতই। লয়ইতেগা এগ হানতে তানুর সাদে লেবারগ অয়া
মাঙইত।

আগ দুগরাং য়ারি এহান দিয়া সোমানির দিল্লীর ঠিকানা বার ফোন
নম্বর কিতা আংকরল। ঔতাই মাতলা—ডঃ সিনহা, সস্তা কুলি দরদীগ
নাই। শৌগরে তানুর আতে দিয়াদে। এতাং না হমেই। সোমানি
সাংঘাতিক শ্রুড মানুগ না।

রগজিতৌ কমগ নাগই, লেমপা লকেইগ। তাও চেইতই কিসাদে
সোমানিয়ে শৌ এগ না গছিয়া পারেরতা। কালি শহরে গিয়া উকিল
আগর লগে পরামর্শ করতইগা, কুলি ঔতারেল মকদমা করয়েইতই।

পিছেকার দিন সোমানির রেজিগনেশন দেছে পৌহান আহিল। সোমানি
আর এপেই আলথক অয়া নাইতই। নর্থবেঙ্গল না কুরাং টাটার চা বাগান
আহানাং জয়েন করেছেগা বুলিয়া হুনল রগজিতে।

এখুরুমতে! এবাকা আর সোমানিরে শৌগ গছা দেনা সম্ভব নাইল।
ফুলমতিয়ার গরর মানুরে শৌগ সমজা দিত! না, তা অ্যাডাপট করত।
এগরে অ্যাডাপট করলে অইতই সামাজিক সমস্যা ঔতার সমাধানতে
কিসাদে করানি। মালক বাপকর মেইথঙ হান দেহের। মালকে কাদিরি
পারা। বাপকে এরে বেজাতি শৌ এগ গছানি নাউ য়াকরতই। খালকরতে
খালকরতে মুরগ গরম অইল ঔবাকা কামপোজ আগ থেয়া গুমজিল।

পিছেকার দিন হাসপাতালেংত অয়া দেহের বাপক গেইট হানাং উবা
অয়া আছে।

—হা! বাবা, কিতা আছেতা, দুয়াংতে কিয়া উবা অয়া আছংতা?

বাপকে না খুমকরল। রগজিৎ বাপকরে হমাদিং বুলতে বাপক সেচিয়া
গেলগা।

—তি মোরে না সকই! জাত মাংপাগ!

রগজিৎ বাপকর মেইথঙ হানাদে ডাকয়া চেইল। কিংতাউ হার নাপেয়া

ইমপানি অম্মা থাইল ।

—এসাদে করে মোর মেইথঙ হানাং ছুন্ কালি গছে দিতেই এহান নাতে
নিং করেছিলুক ! এহানরকা তোরে নাহেয়া নাপিয়া ডাক্তরগ হংকরলুতা
এহান মোরে দিলে দহিনা হান ?

—কিতা অছে থাঙ বাবা ?

—তি লুকেম্মা থইলেউ সংসারহান হাবিয়ে হারপাছি। মেইথঙ হানাং
লাজহান নেইতা, কুল্লি জেলা আগ থয়া ঔগরাং মুনিশো আগ অম্মা, চি,
মোর পুতকগ অম্মা এহান করলেতা ! থাম্মাতে কিতা করতু ?


—বাবা !

—তি মোরে বাবা নাবুলি। মোর পুতক আজিঙ নেই, মরিল। গরে
গিম্মা টুপি-আরি বেলতোগা। আর গরে নাহিছ। মি তোরে তাজ্যপুত্রগ
করলু। মি মরলে মোর কর্ম নাকরিছ তি।

—বাবা, বুলিম্মা জাঙহানাং পড়িঙা বুলতে বাপকে মাতল—না সকই। তি
সকইলে হিনানিং পড়তো।

বাপক আলথক অম্মা যারগা। রণজিৎ বাপকরে চেয়া থাইল। চেইতে
চেইতে আহিগি আদার করল।

১৯২৮



ব্রজেন্দ্রকুমার সিংহ কবিগ বুলিয়া পরিচিত অইলেউ
তার পয়লা প্রকাশিত রচনাহান য়ারিহান, সিকাডেইনি ।
ঔতার পিছেদে হাদিৎ হাদিৎ ইকরেছে য়ারি ঔতারমা
ষেহানি এবাকা পেয়া না মাঙয়া আছে ঔহানিল
লৈরিক এহান । 'বেলিহান হমানির পরে'—য়্যারি
ঔহান কলিকাতার অহংকার পত্রিকার উত্তর পূর্বাঞ্চলর
প্রতিনিধিত্বমূলক য়ারি সংকলনে অনুবাদ অয়া
প্রকাশিত আছে ।